

# WANTOK

NIUSPEPA BILONG OL PAPUA NIUGINI STRET

Ernst & Young audited/  
circulation 15,177

40 pes

Namba 1001

Wik i stat long Fonde, Sept 9, 1993.

40 toea

## Meri bilong olpela PM Namaliu dai long asde apinun

MARGARET NAKIKUS, meri bilong olpela praim minista, Rabble Namaliu i bin dai long Mosbi long asde apinun.

Em i bin dai long Mosbi haus sik long 10-pela minit i lusim 2 klok.

Tasol bikipela sori tru em long taim em i dai, Mista Namaliu i no bin stap arere long haus sik bed bilong em. Mista Namaliu i stap nau long Saiprus wantaim Spika Bill Skate. Tupela i stap long bikipela kibung bilong ol Spika long wol.

Ol famili bilong em i tok stat long las mun i kam, Mis Nakikus i bin stap long bed tasol. Bikos em i no bin pilim gutpela. Na klostu long belo asde, em i bin pilim bagarap olgeta olsem na ol i kisim em i go long haus sik.

Long asde apinun, tok save i go kamap long Mista Namaliu na em i lusim Saiprus pinis. Taim em i kamap long kantri, ol bai tokaut long wanem hap bilong planim meri bilong em.



• Margaret Nakikus...em i dai long Mosbi haus sik long asde. Tasol man bilong em Rabble Namaliu i no bin sanap arere long bed taim em i dai, bikos em i stap long ovasis.

## Parol Bod brukim lo long rausim ol 17 kalabus

GODFRIED NIAKA i raitim

ILUK olsem wok Parol Bod bilong PNG i mekim long rausim ol kalabus aninit long skim bilong en i no bihainim lo.

Bod i bin brukim lo na rausim 17 kalabus stat long mun Mas i kam inap long mun Ogas insait long kantri. Bod i mekim olsem aninit long PNG Parol Skim.

Wanpela ripot i tok i tru olsem Nesenel Palamen i bin oraitim Parol Ekt long 1991 bihainim ripot bilong memba bilong Wewak, Bernard Narokobi.

Tasol ripot i tok stat long dispela taim i kam inap nau, dispela ekt i no kamap yet olsem wanpela lo. Bikos Gavana Jenerel Sir Wiwa Korowi i no bin putim hanmak bilong em antap long pepa

bilong dispela ekt. Inap long taim em i mekim olsem, dispela ekt bai stap nating yet. Na husat i laik mekim olsem bai brukim tasol lo.

Samting Gavana Jenerel bai mekim bai kamap long buk bilong gavman em ol i save kolim olsem Gavman Gaset. Nau em i lo tru bilong bihainim.

Bihain long Parol Bod i paitim toktok na rausim dispela 17 kalabus, CIS Komisina, Sam Nuakona i luk-save olsem Bod i brukim pinis lo.

Olsem na Mista Nuakona i raitim wanpela pas na givim i go long saveman bilong lo long Dipatmen bilong CIS, Peter Tamagle.

Insait long pas, Mista Nuakona i tok save long Mista Tamagle olsem samting Bod i wokim long rausim ol dispela 17 kalabus i no stret. Na tu Bod i no inap long paitim toktok ol yet na rausim ol dispela lain.

Komisina i tok wanem samting Bod i mekim i rong. Olsem na plis inap holim ol dispela kalabus na salim ol i go bek long haus kalabus.

Wantok Niuspepa i ringim opis bilong Parol Bod long kisim toktok bilong siaman bilong ol, Nicholas Kirriwom tasol em i no bin stap.

# NESENEL PRIMIA KAUNSIIL DAUNIM TU MICAH RIPO

CLEMENT MIRIA i raitim

... planti tok long bruk lusim Papua Niugini

BUNG bilong olgeta primia bilong kantri i bin kamap long asde.

Na long dispela bung, ol i tokaut olsem ripot bilong Bai-patisen komiti long wok bilong ol provinsal gavman i no gutpela. Olsem na nesenel gavman i mas rausim i stap arere na i no ken toktok moa long en.

Nesenel Primias Kaunsil (NPC) i tokaut long dispela tingting bilong ol long wanpela spesel kibung

bilong ol long Mosbi asde.

Ol primia bilong Niugini Ailan rijon i tok ol bai bruk na lusim kantri sapos gavman i go het na yusim ripot bilong Bai-patisen komiti long kamapim senis long sistem bilong provinsal gavman.

"Dispela i no min olsem mipela bai bruk na lusim PNG. Nogat. Ol hap bilong kantri we nesenel gavman i ranim bai bruk na lusim mipela," ol primia

bilong Niugini Ailan rijon i tok.

Ol i tok ol pipel i gat pawpawa na ol pipel yet i bin makim ol. I no olsem nesenel gavman i makim ol provinsal gavman. Olsem na ol pipel i givim ol pawpawa long ranim provinsal gavman.

Primia bilong Manus, Stephen Pokawin i tok em bai go bek long provins na redim ol pipel bilong em long kukim dispela ripot bilong Bai-patisen i go moa long pes 3

### STRONGPELA TRU NA INOPILAI NABAUT TRAK

**DELTA**  
DABOL KEBIN BILONG DABOLIM  
PLANTI MOA MANMERI INSAIT

## Ela Motors

OLGETAHAP LONG PAPUA NIUGINI



EM4489





# Isten Hailans plis bai yusim nau pawa bilong komyuniti

## SAPE METTA i raitim

PLIS long Isten Hailans bai givim pe long wanem man i holim na bringim ol bikhetman husat i wok long pretim ol pasindia namel long rot bilong Goroka; Lufa na Okapa i go long plis stesin.

Ekting Provinsal Plis Komanda, Inspekta Edward Kinamun i bin tokaut long dispela samting long Tarabo long Okapa. Dispela hap i bagarap nau bikos pasin

bikhet i kamap bikpela moa. Inspekta Kinamun i bin tokim moa long tu tausen pipel long wanpela wanbel bung olsem plis i painim hat tru long mekim samting. Olsem na bikpela wok nau i stap long han bilong ol pipel long holim ol dispela lain na bringim ol i go long plis.

Na bihain ol inap kisim liklik prais long dispela hatwok bilong ol.

Em i tok ol bikhetman i gat sotgan na ol arapela samting bilong pait. Tasol pawa bilong ol i no inap long pawa bilong

komyuniti husat i bung wantaim na go bungim ol.

Mista Kinamun i tok taim olgeta pipel insait long komyuniti i bung wantaim, dispela bai mekim ol bikhetman tu i pret. Na kwiktaim ol inap senisim dispela kain pasin bikhet bilong ol.

Long bung, wanpela bikpela toktok i bin kamap em long wok bilong stretim Okapa rot. Nesenel gavmah bai givim mani bilong stretim dispela rot. Tasol dispela wok tu bai bagarap sapos kain ol man nogut olsem i stap yet.

Olsem na wanpela bikpela

rot bilong stretim dispela nau em long yusim pawa bilong komyuniti.

Ol komyuniti lida husat i bin kamapim dispela bung i luk-save pinis long wanem hap ol dispela pasin bikhet i save kamap long en. Na olgeta i tokaut long wokbung wantaim na pinisim dispela pasin nogut.

Deputi primia bilong Isten Hailans, Kasen Nahe wantaim ol arapela gavman opisa tu i bin kamap long dispela bung. Bikos ol tu i gat bikpela wari long wanem samting i wok long kamap nau.

## Bikman sapot long rausim Morobe provinsal gavman

### ARI GUH DANDEE i raitim

WANPELA bikman bilong ples Pepekani long hap bilong Wau long Morobe provins i askim nau nesenel gavman long go het na pinisim provinsal gavman sistem. Na kamapim ol provinsal atoriti.

Nem bilong dispela man em Giding Tony. Mista Tony i tok klostu 19 yia nau sistem bilong provinsal gavman i stap long Papua Niugini. Tasol insait long dispela 19 yia, no gat wanpela gutpela wok o samting ol provinsal gavman long wan wan provins i bin kamapim. Ol pipel i no kisim gut ol sevis bilong gavman olsem long wok edukesen, helt, wara saplai na egrikalsa.

Em i tok tingting bilong gavman long pinisim sistem bilong provinsal gavman i moa gutpela. Bikos taim provinsal atoriti i kamap, ol pipel bai kisim gutpela sevis bilong gavman.

Em i tok long lukluk bilong em, tingting bilong gavman bilong Wingti i moa gutpela na. Bikos ol i laikim olsem ol pipel i mas kisim tru ol sevis. Na dispela bai helpim ol long i developim ples na stretim ol sindaun bilong ol.

Bikos long dispela tingting bilong em, em i askim nesenel gavman long go het na pinisim Morobe provinsal gavman.



*Klia long em...Dispela bolros bilong Manus i no plil long samsam long las Sarere long bikpela plil graun bilong Mosbi long Sir Jon Gulse Stadium. Em i wokim Manus danis long bikpela bung bilong Erima Katolik peris.*

## Ol boda pipel paul long haitwok bilong ol gavman opisa

### WINIS MAP i raitim

OL pipel bilong ples Wutung long Wes Sepik provins i paul nau long husat em ol bai lukim long stretim

hevi em i kamap long boda namel long Indonesia na Papua Niugini.

Dispela i bihainim wanpela hevi em i bin kamap long Ogas 1, 1993.

Long dispela taim,

tupela soldia bilong Indonesia i bin go long ples Wutung. Tupela i karim gan i go long ples na tok ol i laik lukim sampela gavman opisa bilong PNG.

Dispela tupela soldia i bin lusim narapela

tupela soldia wantaim tupela draiva bilong buldosa long rot. Ol Indonesia i wokim rot i kam klostu pinis long ples Wutung.

Long dispela taim ol plisman long Wutung i laik holim na sasim tupela long kalapim boda na kam insait long PNG. Tasol kiap husat i lukautim Wutung gavman stesin i tokim ol plisman long larim tupela.

Tupela i bin kamap long ples na kolim nem bilong ol gavman opisa husat tupela i laik lukim.

Long dispela taim ol lain long ples i kirap nogut olsem tupela man ya i save long nem bilong ol gavman opisa long Vanimo.

Wanpela mausman bilong ples Wutung i tok olsem dispela tupela man i bin wetim ol gavman opisa inap ol i kamap. Na taim ol i kamap, ol i tok ol bai sekim rot em ol lain bilong Indonesia i wokim i kam long Wutung.

Tasol ol lain bilong ples i kirap nogut taim ol dispela opisa i kalap wantaim tupela soldia ya long bot bilong Indonesian Konsulet em i bin wetim ol long Wutung nambis.

Ol i bilip ol dispela lain i no bin go sekim rot. Ol i mas go long Jayapura. Bikos ol dispela lain i bin stap na kamap bek long Mande, 2 Ogas.

Dispela kain pasin ol gavman opisa long Vanimo i mekim nau i wokim ol lain bilong ples Wutung i paul long husat em ol bai go lukim long stretim kain hevi bilong boda.

Wantok i bin traim kisim toktok long opis bilong Foren Afeas long Vanimo long dispela ripot. Tasol mipela i no inap long toktok wantaim wanpela opisa.

Ripot i kam long Vanimo i tok ol lain bilong Indonesia i wokim rot pinis i kamap klostu long ples Wutung. Na ol i wokim pinis tripela haus na wok nau long rot.

## Ol ovasis manmeri no ken wok long pablic sevis-Konga

SAMPELA pipel bilong ol arapela kantri husat i kamap sitisen bilong Papua Niugini i wok long yusim posisen bilong ol long bagarapim lo, ol grasrut pipel na ol lida long helpim ol yet. Na taim ol samting i kamap hat long ol, ol i save hait na stap isi.

Nesenel memba bilong Gasel, Nakikus Konga i mekim dispela toktok.

Mista Konga i mekim dispela toktok bihain tingting bilong nesenel memba bilong Kundiawa, Joseph Onguglo.

Mista Onguglo i bin toktok long kamapim wanpela lo bilong tambuim ol manmeri bilong ol arapela kantri husat i kamap sitisen bilong PNG long holim ol bikpela gavman wok.

olsem ol sitisen ol i save mekim wok long helpim bisnis bilong ol yet na ol wantok bilong ol.

"Dispela ol lain i no save kaikai kaikai bilong mipela, stap long ples bilong mipela na tu ol i no save wokbung wantaim mipela long ol sosol na kalsarel wok bilong mipela. Ol i save stap bilong ol yet. Na wok long kisim bikpela mani," Mista Konga i tok.

Toktok bilong Mista Konga i go long sampela pipel bilong ol arapela kantri husat i kamap sitisen bilong PNG na stap long Is Nu Briten provins. Bikos ol i wok long mekim kain kain samting long paulim ol lain long Warangoi long wok bilong katim timba.

Em i tokim ol pipel olsem nau em i stap lida na memba bilong ol, em bai go het long toktok egensim ol lain husat i laik bagarapim ol manmeri bilong Papua Niugini.

# PLIS RIPOT



### HAGEN:

Tupela man long ples Poka long hap bilong Wurup long Maun Hagen i lusim moa long K2,000 taim haus bilong tupela i paia.

Provinsal Plis Komanda, John Wakon i tok sampela lain i kukim haus bilong dispela tupela man. Bikos ol lain ya i bilip olsem tupela man ya wantaim ol wanpinis bilong tupela i stilim wanpela pig.

Komanda Wakon i tok pastaim long dispela hevi i bin kamap, tupela grup wantaim i bin bung na paitim toktok long stretim dispela hevi. Tasol ol i toktok i go pait i kamap. Em nau ol lain bilong pik i belhat na i go kukim haus bilong dispela tupela man.

Mista Wakon i tok tupela man ya i bin go long taun long salim kopi bilong tupela. Na i no bin save olsem pait i kamap na ol man i kukim haus bilong tupela.

Em i tok ol plisman i save long man husat i kukim haus bilong dispela tupela man. Tasol i tok olsem tupela grup wantaim i ken sindaun paitim toktok na stretim dispela hevi.

### SIMBU:

Ol plisman long Simbu i holimpasim pinis tripela moa kalabusman em ol i bin ranawe long Barowagi haus kalabus. Ol plisman i holimpasim tu wanpela raskol man em ol plisman i bin wok long traim long holimpasim.

Provinsal Plis Komanda, Nema Mondiai i tok ol plisman i holimpasim tupela bilong dispela tripela kalabusman long las wik Fraide nait. Taim ol i karim aut wanpela operesen ol i kclim "Klinim Simbu." Na arapela ol i holimpasim em long Mande long Kundiawa maket.

### MOSBI:

Long las wiken ol plisman i holimpasim na sasim wanpela sumatin bilong Yunivesiti Bilong Papua Niugini bihain long wanpela hevi i kamap long skul.

Ripot i kam long skul i tok tupela sumatin i bin spak na go insait long skul. Na mekim nabaut long tupela sumatin (wanpela man na wanpela meri) bilong Madang provins. Na tu tupela i bagarapim ol samting bilong skul.

Ol bikman bilong skul i tok ol i no klia o save long as bilong dispela hevi.

Ol plisman i arestim dispela sumatin long Sande moning taim em i go na wok long kaikai i stap long haus bilong kaikai.

Plisman husat i arestim dispela sumatin i tok sumatin ya i beil aut long K100. Na i wok long wetim ol plisman long sasim em long sampela arapela bagarap em i bin kamapim.

### KAVIENG:

Wanpela plisman long Kavieng i kamap pinis long Kavieng Distrik Kot long sas bilong yusim dainamet long painim pis long solwara.

Nem bilong dispela plisman man em Konstabel David Smith. Konstabel Smith i gat 30 kris-mas na i bilong Tong ailan long Manus provins.

Sinia Majistret Raymond Gavuri husat i harim kot bilong Konstabel Smith i tok em bai askim Plis Komisina long rausim Konstabel Smith long plis fos.

Sinia Majistret Gavuri i sasim Smith long baim kot long K200. Sapos no gat orait em bai kisim tupela mun kalabus.

### ENGA:

Wanpela man Enga i kamap pinis long Maun Hagen Distrik Kot long sas bilong kukim Enga provinsal hetkwata long mun Mas long dispela yia.

Ripot i tok nem bilong man ya em Silion Lamb. Silion i gat 32 kris-mas na i bilong ples Paivas klostu long Wabag taun.

Ol plisman i bin holimpasim em long las wik Fraide. Na sasim em long kukim Enga provinsal hetkwata long mun Mas long dispela yia.

### WEWAK:

Is Sepik plis i wokim pinis wanpela sepsel operesen ol i kolim "New Broom" long painim ol raskol man long provins.

Ol i bin statim dispela spesel operesen long las wik Tunde na bai stap inap long wanpela mun olgeta. Provinsal plis komanda, Giossi Labi i tok em bai yusim olgeta plisman em i gat long provins long karim aut operesen.

Tasol em i askim olgeta lida long ples long wok bung wantaim plis long taim bilong operesen.



# Ol hailans lida egensim intenel sekyuriti ekt

## SAPE METTA i raitim

OL bikman bilong gavman long hailans i no amamas long intenel sekyuriti ekt em nesanel gavman i laik kamapim.

Ol i tok dispela lo i no gutpela. Long las wik, ol provinsal asem-bli Spika bilong hailans, wanpela primia na edministreta i bin bung long Goroka. Na ol i paitim toktok

long dispela nupela lo.

Ol dispela lain bikman i paitim toktok i go na kamapim 20 bikpela tingting bilong ol long dispela intenel sekyuriti ekt. Long wankain taim, ol i autim tu ol arapela hevi em dispela lo bai kamapim long ol pipel insait long kantri na wanem samting inap kamap long senisim dispela.

Spika bilong Isten Hailans provinsal asem-bli, John Mipo i tok

dispela intenel sekyuriti ekt bai rausim pawa na laik bilong ol pipel. Long mekim dispela, em bai givim tasol moa pawa i go long ol politisen.

Mista Mipo i tok aninit long dispela lo, planti man husat i laik tok-tok egensim gavman long wanem samting bai kisim bikpela mekim save.

Em i tok dispela lo i bilong helpim tasol ol pipel. Bikos olgeta pawa bilong ol pipel i stap aninit

long dispela lo. Olsem na ol i no inap mekim wanpela samting. Na pawa wantaim wok bilong ol bikman bai siap fri tasol.

Mista Mipo i tok, "Dispela intenel sekyuriti ekt i no inap daunim hevi bilong lo na oda long kantri. Bikos ol politisen bai kamap olsem ol risman na pawaman na ol pipel bai pait hat yet long daunim ol."

Em i tok tu olsem i gat ol narapela lo na rot em gavman i bin

kamapim bilong pait wantaim hevi bilong lo na oda. Tasol ol politisen i go het na kamapim dispela lo bilong intenel sekyuriti ekt.

Long dispela bung bilong ol, ol bikman bilong hailans i tokaut long kisim wanpela saveman bilong lo long glasim gen dispela intenel sekyuriti ekt. Na long taim olgeta primia bilong wan wan provins i bung long narapela mun, ol bai toktok gen long dispela samting.



• Em i taim bilong san long Mosbi na planti ples i sot long wara. Ol lain i stap long Sabusa Somil ausait long Mosbi i sot tru long wara. Ol Katolik mama long Godens plis bareks i lukim olsem na sori tru. Orait, wanpela bilong ol Misis Maria Hayes i askim Fairdeal Liqour long sampela emti dram na kampani i tok yesa tasol na givim ol dram long Tunde. Na ol bai karim i go givim long ol lain long Sabusa.

# Ol PNG dokta paitim toktok nau long pinisim sik malaria

## LOUISE VARI i raitim

SAMTING olsem 200 dokta insait long Papua Niugini i bung long aste, Trinde Septemba 8.

Long dispela bung bilong ol long Mosbi, ol i toktok long sik malaria insait long kantri.

Minista bilong Helt, Francis Koimanrea i bin go na opim dispela bung bilong ol dokta.

Dokta Pulotu bilong ENT klinik i tok ol arapela lain husat bai stap tu long dispela bung em ol helt opisa, mausman bilong Medikel Rises Institut long Goroka na ol arapela ovasis manmeri.

Em i tok ol dokta bilong ol bikpela kampani olsem Chevron Niugini na Shell tu i bin kamap long dispela bung.

Long dispela bung bilong ol, ol dokta bai toktok long ripot bilong ol

wok painimaut em ol i bin mekim.

Dispela bung bilong ol dokta bai pinis long Sarere, Septemba 11.

Seketeri bilong Papua Niugini Medikel Sosaiti, Dokta Nakapi Teafuarani i tok wanpela man husat bai givim bikpela toktok long dispela bung em Profesa David Warrel. Profesa Warrel i bilong Oxford Yunivesiti long Yunaited Kingdom.

Em i tok Profesa Warrel em i wanpela bikpela saveman long sik malaria insait long wol.

Em i tok malaria em i wanpela bikpela sik long Papua Niugini we i save kilim planti manmeri. Olsem na long dispela bung, ol bai toktok long painim gutpela na strongpela marasin bilong pait wantaim sik malaria.

Em i tok moa olsem dispela bung bai helpim ol dokta long painim ol gutpela rot na marasin bilong daunim sik malaria insait long kantri long taim bihain.

# Hevi bilong ol papa graun stapim wok bilong Wongwong

## GODFRIED NIAKA i raitim

WANPELA hevi namel long tupela lain papa graun i stapim nau Wongwong Timba kampani bilong Is Sepik provins long

katim diwai long namba wan blok emol bai katim diwai long en. Dispela hevi i stap namel long ol lain papa graun bilong ples

Suambugau long Wewak lokol eria na ol lain bilong ples Rainumbo long Hawaii.

As bilong hevi em i olsem, Wongwong i laik statim wok na katim diwai long

namba wan hap em kampani bai katim diwai long en. Tasol ol papa graun bilong Rainumbo i tok nogat long dispela.

Long arapela han, ol papa graun bilong Suambugau i tok yesa long kampani i ken go het na statim wok.

Wanpela papa graun bilong Rainumbo i tok lain bilong em i no laikim kampani long statim wok. Bikos graun em namba wan blok ol bai stat katim diwai long en i no bilong ol lain Suambugau tasol. Em yet wantaim ol lain bilong

em tu i papa long dispela hap graun.

Bihainim dipela hevi, ol provinsal fores opisa i go-na lukluk raun long dispela hap graun. Na ol i stapim tu kampani long no ken go het na katim diwai.

Dispela papa graun bilong Rainumbo i tok man husat i go pas long Wongwong kampani, Robert Passu i save olsem i gat hevi i stap. Tasol em i no bin tok save long ol forest opisa long dispela. Olsem bai ol inap sekap long dispela hap graun. Mista Passu i go het na tokim kampani long stat katim diwai.

# Minista tok PNG no nidim ol ausait lain

WOK bilong gavman em long bringim bek gutpela sindaun i go long ol pipel bilong Bogenvil.

Na em i no wok bilong ol ausait man olsem Mike Forster long tokim gavman na pipel bilong en long wanem rot tru yumi i mas bihainim long painim gutpela sindaun.

Minista bilong Stet na Bogenvil Afens, Mishael Ogio i bin mekim dispela toktok long bekim singait bilong Mista Forster husat i laikim gavman lor j hariap wantaim ol progrem bilong stretim gen sindaun bilong ol pipel long Bogenvil.

Mista Ogio i tok ol pipel i no laik stap moa aninit long lukaut oilong ol rebel paitman (BRA). Bikos ol i bungim planti bikpela hevi pinis. Olsem na planti oilong ol i wok long lusim bus na ples hait bilong kisim helpim bilong gavman.

Ol ausait man olsem Mike Forster i wok long giaman tasol ol pipel long samting we ol i no inap tru long kisim.

Orait ol hevi long lukautim sindaun na laip bilong man i stap tu long kantri bilong en.

# NPC daunim tu Micah ripot

i kam long pes 1

komiti. Dispela em long soim olsem dispela ripot i no gutpela.

Sauten rijon tu i kamap wantaim tingting bilong bruk na lusim PNG sapos nesanel gavman i go het na yusim ripot bilong Bai-patisen komiti.

Primia bilong Sentral provins, Paul Kipo i tok ripot bilong Bai-patisen komiti i bilong senisim tasol nem. Samting em nesanel gavman i laik kamapim gen em taim bilong kiap na

eria atoriti.

Suspended primia bilong Morobe Tutumang, Titi Christian i tok nesanel gavman i mas givim bek provinsal gavman bilong Morobe provins. Sapos nogat, ol bai stapim ol samting bilong go antap long hailans sapos nesanel gavman i bihainim ripot bilong Bai-patisen komiti.

NPC i givim nesanel gavman stat long nau i go inap long pinis bilong mun Septemba.





# WANTOK

NIUSPEPA BILONG OL PAPUA NIUGINI STRET

## Bekim i strong tumas

Long dispela wik, ol primia bilong kantri i bung long Mosbi.

Ol i toktok long planti samting, tasol wanpela bikpela tru em long ripot bilong Ben Micah komiti long wok bilong ol provinsal gavman.

Em i gutpela olsem ol i toktok long dispela. Tasol kain tingting na bekim ol i autim long kibung i kamapim planti moa tingting. Sampela i tingting long bruk lusim PNG, primia bilong Manus i tok long go bek na bungim olgeta pipel long kukim dispela ripot.

I gutpela olsem ol primia i autim dispela wari. Tasol toktok ol i mekim i strong tumas. Em inap kamapim pret namel long ol pipel bilong ples.

Ol liklik manmeri bilong ples i no klia tumas long kain pait bilong pawa nau i kamap. Na taim ol i lukim kain samting olsem, kwiktai ol i go na mekim kain kain pret toktok.

Tasol no gat man inap go stret na tok olsem ol primia i asua. Bikos as tingting bilong ol tu i no kamap klia yet.

Dispela toktok bilong provinsal gavman sistem i no wanpela samting tasol. Nogat. Em i gat ol kain kain arapela hap i stap. Na long mekim olsem, tok klia bilong dispela olgeta samting i mas kamap.

Wankain tu long planti nupela lo na senis em gavman i laik kamapim long wok yut, wok sios, wok politik na ol arapela wok bilong bringim sevis i go long ol pipel.

## Ol ripot bilong ol wok kamap long Not Solomons provins

# Komiti kamap long bosim ol wok kamap

### ALOYSIUS SAMI i raitim

OL i kirapim pinis wanpela komiti bilong bosim ol wok kamap na senis insait long Not Solomons provins.

Komiti ya em ol i kolim long Infrastraksa Kodineting Komiti we edministreta Sam Tulo yet i siaman long en. Ol narapela memba bilong komiti em ol ya, Provinsel

Seketeri John Siau, edministretiv Seketeri George Lessi, nesanel Seketeri bilong Mani, Woks, Difens, Viles Sevis na Provinsal Afeas.

Long dispela taim tu, Mista Tulo i no amamas tumas long wok em ol progrem menesa, teknikol wokman na ol distrik menesa i wokim long go hetim wok bilong PIP projek long dispela yia. PIP projek em ol Pablik Invesmen Pro-

jek. Mista Tulo i tok ol lain wokman i no bung wantaim long go hetim ol wok kamap long ol projek ya.

Long ol ripot Mista Tulo i kisim, ol wokman i slek long ol wok bilong ol na liklik wok tasol i kamap we i no amamas long en.

Narapela asua long hevi i kamap em long ol wokman i sutim toktok i go i kam long wanpela na arapela. Kain

pasin olsem i no gutpela bikos em bai daunim tasol ol wok bilong stretim sindaun long Bogenvil.

Mista Tulo i singautim wanpela miting bilong lukluk long ol dispela hevi. Na em i tokaut tu long nupela bosman bilong Woks seksen. Man ya em Lukas Romaso bilong Buka yet.

Mista Romaso i stap nau long Buka bilong go hetim wok bilong em long hap.



*Balus sutim nus...*Dispela em i no ples balus, em bikpela ples taiswara bilong Waigani long Mosbi. Tasol dispela balus bilong Wantok Aviation i bin laki olsem em i go pundaun long hap drai graun liklik long Mande. Olgeta 9-pela pasindia wantaim pailot i orait.

## Siwai holim bel isi bung tumora

WOK bilong redi long holim wanpela pis seremoni long Siwai insait long saut wes Bogenvil i go het nau. Na ol pipel sanap sambai tasol long en. Sere-

moni ya bai kamap long Fraide Septemba 10 long Monoitu Katolik misin long Siwai yet. Sampela gavman minista wantaim ol arapela bikman bilong gavman, oposisen, ol man husat i makim ol Hai Komisen bilong ol ovasis kantri, ol nius-

man na ol arapela man bai stap long dispela bung. Na ol sief bilong Siwai bai givim ol samting bilong pait i go long han bilong gavman na ol sekyuriti fos.

Long dispela sere-

moni, tupela grup bilong Siwai yet bai sekan na kamapim bel isi. Em ol lain resisten paitman na ol man husat i memba bilong Bogenvil Revolusineri Ami (BRA) bipo na nau ol i helpim ol sekyuriti fos na ol sief long kamapim gutpela sindaun long ples.

Long wankain taim tu, sindaun long hap bilong Nagovis i wok long kamap orait isi isi.

Long wik i go pinis, ol rebel paitman i bin kilim tupela soldia, wanpela resisten paitman na kamapim bagarap long tupela narapela memba bilong resisten grup husat i stap nau long haus sik long Rabaul.

Gutpela wokbung namel long ol siefs, sekyuriti fos memba wantaim tu helpim bilong ol resisten paita.

## Moa helpim go long saut na sentrel Bougenvil

### VERONICA HATUTASI i raitim

TUPELA oganaisesen husat i mekim bikpela wok long helpim ol pipel bilong Bogenvil wantaim ol kaikai, marasin na klos samting em long Red Kros Sosaiti wantaim Nesanel Disasta na Imejensi Sevis (NDIS).

Planti pipel long hap bilong saut na sentrel Bogenvil i wok long kam nau long ol kea senta we i stap aninit long lukaut bilong gavman long tupela hap ya.

Long dispela wik, foapela sip i bringim ol kaikai, klos na ol arapela samting bilong kuk na kaikai i go long ol pipel bilong kea senta insait long sentrel na saut Bogenvil.

NDIS yet i stretim rot bilong ol samting ya i go long ol pipel bilong ol kea senta long Wakunai, Buin na Siwai. Pe bilong ol kaikai na klos samting em inap long K300,000.

Sip M.V. Kazi i lusim Rabaul long dispela wik Mande wantaim ol saplai bilong Wakunai. Na tupela sip ya em long M.V. Astrolobe 1 na Tikana i bringim ol beil klos, rais na tinpis, ol sospen bilong kuk wantaim ol plet, spun na ol arapela samting moa i go long ol pipel husat i stap long ol kea senta long Buin. M.V. Huris i mekim ron bilong em i go long Mamagota long Siwai wantaim ol saplai bilong klos na kaikai bilong ol pipel long Tonu na Monoitu kea senta.

Ol saplai bilong ol kea senta insait long sentrel Bogenvil i redi na stap long Rabaul wetim tasol sip bilong karim ol i go long Loholo.

Long tupela wik i go pinis, opis bilong NDES long Buka i bin salim sampela marasin, klos, kaikai, sel haus, ol sospen na plet samting long ol pipel bilong ol dispela kea senta long Bogenvil.

Long wankain taim tu, provins i nidim mani inap long K500,000 bilong peim helikopta long kisim ol saplai i go long ol kea senta na tu bilong mekim ol arapela wok long stretim na kamapim gut sindaun bilong ol pipel long Bogenvil.

## Red Cross kirapim opis long Wakunai

WANPELA nupela opis bilong Red Cross bai stap long Wakunai long bikples Bogenvil sampela taim long neks wik.

Gavman i oraitim pinis askim bilong PNG Red Cross Sosaiti long wokim wanpela opis long Bogenvil bilong lukautim olgeta wok bilong ol long ailan.

Ripot i kam long opis bilong minista bilong Stet na Bogenvil Afeas i tok olsem Wakunai i gutpela hap bilong kirapim opis. Bikos em i gat ol haus pinis long wok bilong en. Na tu

Wakunai long stap long namel bilong ailan we i mekim isi long ol wokman i tilim ol klos na marasin samting i go long ol pipel insait long ol kea senta long bikples Bogenvil.

Namba tu siameri bilong sosaiti, Sue Darby i tokaut olsem ol i redi tasol long kirapim dispela opis. Bikos Wakunai i stap namel long ailan na bai mekim ol wok bilong lukautim ol kea senta i isi moa.

Wanpela meri bai go pas long Wakunai opis. Meri ya em Pauline Onsa bilong Buka ailan.

# WANTOK

NIUSPEPA BILONG OL PAPUA NIUGINI STRET

P.O. Box 1982 BOROKO  
Telepon Namba: 25 2500  
Feks Namba: 25 2579

## PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00







**KANAGE** i go limlimbur long Goroka taun long wanpela potnait wik Fraide. Em i limlimbur i stap na lukim wanpela meri Simbu i werim wanpela ovasais sket na wokabaut i kam na abrusim em na i go. Taim meri Simbu ya i abrusim Kanage na i go, Kanage i kirap na tok: "Wiyaka, Wendy putim jamba sket na kalap long windo o." Meri Simbu ya tanim na askim Kanage: "Bras, yu kolim nem bilong mi long wanem ya?" Kanage i no bekim. Em nau meri ya i tokim Kanage olsem: "Yu harim, yu kolim pinis nem bilong mi long pablik ples. Nau long nait, taim yu slip bai yu driman olsem yu kaikai popo i no mau." Taim Kanage i harim olsem, em i tokim meri Simbu ya olsem: "Wendy yo, dispela popo yu tok ya, mi no laik kaikai long nait. Mi laik kaikai long nau tasol." Meri Simbu harim Kanage i tok olsem na em i saitim as tasol na tekov i go. Kanage kirap na singaut i go long meri ya olsem: "Yu hambak. Sapos mi holim dispela popo ya bai yu lukim paradais."

**Max Pondale Wala Ku Nava, WEWAK**

■ **PIKININI** man bilong Kanage i go skul long Australia. Klostu holido na em i salim tok olsem em bai kam long ples. Bihain long wanpela wik na em i kam. Em nau Kanage i kisim ka na i go wetim pikinini man bilong em long ples balus. I no longtaim na bikpela balus bilong Air Niugini pundaun long ples balus. Na pikinini man bilong Kanage i kam ausait. Kanage i go sekan long pikinini bilong em pinis na tupela kalap long ka na go long ples. Long hap rot, pikinini bilong Kanage i tokim papa bilong em olsem em i hangre. Em nau Kanage i stapim ka long wanpela stua. Em i go insait long stua na tokim stuakipa. Stuakipa ya i bilong Yangoru long hap bilong Is Sepik, "Java, givim mi wanpela paket fres lem." Yangoru ya i paul na askim Kanage, "Yu laikim wanem?" "Hei, yu askim mi long wanem? Mi lukim samting i stap na mi tokim yu long givim mi. Em ya, givim mi wanpela paket fres lem." Kanage i tokim Yangoru ya. Samting tru Kanage i laikim lem fleps. Tasol maus i abrus na em i tok fres lem.

John Buana, RABAUL.

□ **KANAGE** i save wok olsem wanpela man bilong salim bia long Malangan lodge long Kavieng. Wanpela taim em i wok i stap na tripela meri Yauro i go insait na i go sindaun long wanpela kona. Taim Kanage i lukim ol tingting, bilong em i paul olgeta. Long wanem long bipo yet, Kanage i save gat laik long wanpela bilong ol. Kanage tingting planti stap na dispela meri we em i save gat laik long en i go long kaunta na tokim Kanage, "Hei mai pren, givim mi tripela bia plis." Kanage tingting i go nogat na tok, "Hei mai pren, Mi bin luksi yu long Namatanai na mi bin seksek fo yu." Em nau Kanage i go na kisim tripela bia i kam na givim long meri ya pinis na tokim em, "Mai pren, mi pinis wok long 3 klok long apinun." Na meri ya i kirap na tokim Kanage olsem, "Gutpela, bihain orait yu kam na painim mipela." Taim meri ya i tok olsem, Kanage amamas nogut tru. Tripela meri ya i dring i stap yet na em i pinis wok. Orait, em i wokabaut i go long ol. Em nau meri ya i kirap na tokim em. "Mai pren, yu mas kam long haus. Yu slip bet na mi praipan long yu." Yupela, taim Kanage i harim olsem, olgeta gutpela tingting na amamas bilong em i ranawe long skin bilong em.

Ronnie Hillus, KAVIENG.

moa tok pilai long pes 20

# Lae yut opis givim tok lukaut

**YAKAM KELO i raitim**

**PLANTI** yut grup insait long Lae siti husat i bin rejista aninit long nupela yut program bilong Nesenel Yut Sevis (NYS) i bungim hevi nau na ol i wok long go bek askim Morobe provinsal yut opis long helpim ol.

Dispela NYS em nupela rot nesenel gavman i bin kamapim bilong mekim ol wok bilong ol yut. NYS i opim opis bilong em long Lae long dispela yia. Tasol i no longtaim na dispela opis i pas gen.

Eben yut kodineta bilong Morobe provins, David Sila i tok ol lain husat i rejista aninit long NYS i no gat rot bilong go nau. Ol is no save bai NYS wantaim ol bos bilong ol

long Hom Afeas na Yut Dipatmen long Mosbi i helpim ol olsem wanem.

"Mipela ol yut insait long Morobe provins i wok yet long painim helpim, tasol no gat wanpela gutpela rot i op yet. Ol lida i mekim planti mauswara tumas na kamapim ol kain program olsem nau, NYS, long giamanim bel bilong ol yut nating. Tasol kaikai tru bilong wok i nogat."

David i tok ol i no lukim yet wok bilong Nesenel Yut Sevis na hariap tru ol i pasim opis gen. Dispela i mekim na mipela i longlong tru long wanem samting tru em gavman i laik kamapim ya, David i tok.

Em i tok Kraim Briged Skim tu i wanpela pasin giaman o program. Bikos planti yang-

pela i joinim pinis tasol i no gat trening na ol wok skul bilong ol i kamap yet.

Olsem na David i tok strong olsem Yut Dipatmen na ol opisa bilong em long Mosbi i no ken go moa long Lae na toktok gen long ol dispela kain program we i no gat as bilong en.

Em i askim nesenel minista bilong Hom Afeas na Yut, Andrew Posai long lukluk moa insait long dispela hevi.

Em i tok opis bilong em i wok long kisim liklik helpim i kam long Dipatmen bilong Morobe. Tasol dispela i no inap long stretim ol hevi bilong ol yut nau i pulap long opis i stap.

"Taim ol i pasim opis bilong Nesenel Yut Sevis long Lae, mipela i lainim olsem mipela i olsem ol longlong man we

sampela lain i laik giamanim mipela tasol." Olsem na David i tok gavman i no ken kisim ol nupela lo na program bilong ol i kam long Lae we ol yet i no save long as na wok bilong em log bihain. Ol i mas traim pastaim long Mosbi na lukim sapos em i gutpela, em nau ol i ken karim i kam soim mipela bihain.

Narapela nupela program tu em long Komyuniti Development Volentia (CDV) we ol memba husat i joinim tu i wok long wetim yet ol wok bilong ol. Dispela em i wanpela program we ol yut i ken raun long ovasis long mekim ol eksens program wantaim ol.

Ol opisa bilong Morobe provinsal yut i no amamas tru taim ol i lukim ol yut insait long dispela program i paul nabaut nau.

## Toktok bilong Arona Veli haiskul bai stret nau

**SAPE METTA i raitim**

**WANPELA** nupela haiskul nau bai kamap long Arona Veli long hap bilong Kainantu long Isten Hailans provins.

Arona Veli i stap klostu long Yonki haidro projek long Kainantu.

Nesenel memba bilong Obura/Wonenara, Peter Gaige i stat pinis long stretim ol samting bilong wokim dispela haiskul. Dispela haiskul em i wanpela bilong ol develop-

men wok em bai bringim i go long ilektret bilong em.

Mista Gaige i toktok pinis wantaim Lektrik Komisn long Yonki na tu wantaim Arona Veli Developmen Atoriti (AVDA) long graun em skul bai sanap long en. Na wok bilong sanapim ol haus bai stat taim nesenel gavman i skelim mani.

Em i tok Elcom na AVDA i makim na stretim pinis graun bilong wokim skul. Tasol

tupela oganaisesen ya i no givim yet graun i go long Edukesen Dipatmen long statim wok bilong dispela projek.

Em i tok em i lukim na toktok pinis wantaim Isten Hailans provinsal gavman long tokim provinsal projek na edukesen tim long stretim ol samting.

Arona Veli haiskul i wanpela bilong ol tripela nupela haiskul em nesenel gavman bai wokim long Isten Hailans provins. Narapela tupela em Okapa na Daubo haiskul.

## Malala haiskul laikim K600,000 bilong kamap nesenel haiskul

**BEN TAUMAI i raitim**

**MALALA** haiskul long Madang provins i nidim samting olsem K600,000 bilong stretim olgeta samting pastaim long em i ken kamap olsem wanpela nesenel haiskul long 1995.

Het tisa bilong skul, Sista Jane Frances i mekim dispela toktok taim ol niusman i go lukluk raun long Malala haiskul.


Malala haiskul long Bogia bai

kamap olsem wanpela nesenel haiskul long 1995. Dispela i bihainim tingting bilong gavman bilong Prais Minista Paias Wingti. Long dispela yia, i gat tupela gret 11 na gret 7 klas.

Long narapela yia, bai gat tupela gret 7, 4-pela gret 11 na tupela gret 12 klas. Ol bai mekim olsem tasol i go inap ol lain husat i wokim gret 7 long dispela yia i mekim gret 10. Na bihain ol i go na mekim gret 11.

"I gat planti samting mipela i mas i go moa long pes 12

## Wotong laikim nupela bes kem long Mukili



• Spika John Wotong...laikim nupela bes kem long Mukili misin stesin.

**ARI HABA i raitim**

**SPIKA** bilong Sandaun provinsal asembli, John Wotong i laikim wanpela nupela gavman stesin long mas kamap long Mukili misin stesin.

Mista Wotong i mekim dispela toktok bihain long Sandaun provinsal asembli i oraitim sabmisen bilong em. Sabmisen bilong em i bin toktok long kirapim wanpela nupela bes kem.

Em i tok dispela bes kem i mas stap klostu long ples we i gat planti pipel. Bikos em bai helpim gavman long givim ol sevis olsem helt, edukesen na wok didiman i go long ol pipel. Em i tok tu olsem Mukili misin stesin i stap moa klostu long Nuku.

Wotong i tok olsem ol pipel bilong Maimai/Wanwan konstituensi long planti yia i go pinis i no save kisim gutpela sevis bilong gavman. Olsem em i taim nau bilong wanpela nupela bes kem long kamap long dispela hap.

"Nau mi stap olsem memba bilong Maimai/Wanwan konstituensi, mi laik olsem dispela bes kem i mas kamap. Na Sandaun provinsal asembli i mas sapotim tingting bilong mi. Na ol pipel i mas kisim gutpela sevis bilong gavman," Mista Wotong i tok.

Tasol wanpela mausman bilong ples Namblo i tok Mukili misin stesin i no ken kamap olsem nupela gavman stesin. Bikos Mukili i stap moa klostu long Nuku gavman stesin.

Em i laikim nupela gavman stesin i kamap long ples Namblo. Bikos ol pipel bilong Namblo long bipo yet i kam inap kirapim nau i no save kisim gutpela sevis bilong gavman.

Em i tok Mista Wotong i mas lukluk gut na kirapim nupela gavman stesin long wanpela namel ples. Na em i askim Provinsal Eksekutiv Kaunsil long lukluk na kirapim nupela gavman stesin long wanpela namel ples.



• Ol lain gret 11 studen bilong Malala haiskul long Madang i sindaun i stap wantaim Sista Jane Frances husat i sanap namel stret wantaim ol sumatin. Long kamap nesenel haiskul, Malala i mas gat narapela K600,000 bilong stretim ol samting.



# TU MINIT TINGTING

## YUMI MAS WOKIM OL GUTPELA BRIS


YUMI olgeta i save bris em i wanem samting. I gat kain kain bris. Sampela taim yumi save katim wanpela diwai na wokim bris long en. Long hailans. yumi save hangamapim ol bris long ol rop bilong bus. Tude yumi gat ol rot na ol i save wokim ol bris long simen o diwai o ain.

Maski long kain kain bris, olgeta bris i gat wanpela wok tasol: ol i mas pasim tupela sait bilong wara bai ol pipel i ken wokabaut gut na i no mas wokabaut insait long wara. Bris em i no samting bilong hambak. Long wanem, long olgeta de ol pipel na animel na ka i save krungutim em aninit long lek bilong ol. Ol bris i save helpim ol pipel long go long wanpela hap. Tasol ol bris yet, ol i anka i stap. Ol i no save limbur liklik.

Long olgeta de long laip bilong yumi, yumi save mekim wok

bilong ol bris. Long taim yumi toktok, yumi wokim bris wantaim yau bilong narapela man o meri. Long taim yumi raitim pas, yumi wokim bris wantaim narapela man/meri. Redio na telipon, tupela i save wokim bris i go longwe. Ol niuspepa na buk i wokim bris namel long ol rida. Ol kaset bilong arapela kantri i wokim bris wantaim yumi, olsem na nau yumi singim ol song bilong ol. Long taim yumi sekan, yumi save wokim bris wantaim narapela man o meri. Taim man na meri i marit, tupela i wokim bris namel long tupela famili.

Long taim Jisas i kam daun long graun. em i kisim bodi bilong yumi na em i wokim bris namel long God na yumi man-meri. Em i wokim bris namel



FRANK MIHALIC i raitim

long heven na graun. Ol papa-mama i olsem bris namel long ol pikinini na ol bubu bilong ol. Long taim yumi skulim narapela

man/meri, yumi givim save long em na dispela i wokim wanpela bris namel long em na olkain save. Long taim yumi tingting long God o yumi beten long em, yumi wokim bris i go long em. Gutpela eksampel bilong yumi wan wan i save wokim wanpela bris namel long yumi na dispela man o meri i bin lukim dispela eksampel bilong yumi.

Hia long PNG, sampela taim yumi save lukim wan wan bris i stap longwe long wanpela wara. Bilong wanem? Wanem samting i bin kamap? Yumi gat planti wara olsem Sepik na Ramu na Makam i save raun nabaut olsem wanpela bikpela snek. Sampela taim i gat bikpela ren na dispela i senisim rot bilong kain wara olsem, na nau wara i

ron long narapela hap i longwe long bris bilong em. Sampela taim wanpela guria i ken senisim rot bilong wara. Na wantaim moa em inap ron longwe long bris bilong bipo. Yu lukim! Ol dispela i no asua bilong bris. Nogat. Em i sanap i stap yet na i redi long wok sapos wara i kam bek.

Long laip bilong yumi i gat wankain samting i ken kamap. Ating yumi bin wokim gut bris bilong yumi long famili o long skul o long sios. Tasol nau ol dispela pipel i bin yusim yumi na wokabaut antap long yumi, nau ol i go longwe longwe. Ol i no nidim yumi moa. Tasol maski, em i orait. Em i no asua bilong yumi. Ating bikos yumi bin mekim gutpela wok bris, nau planti arapela pipel i bin brukim wara na i bin go het long laip bilong ol. Kas bilong yumi!

## Luteran Sios konprens soim planti hevi bilong sios

SANANG ZAZORING i raitim

DISTRICK konprens bilong Simbu long Yondumugi i soim planti hevi Luteran Sios i wok long bungim nau.

Dispela i soim hevi ol arapela distrik tu i gat long nau.

Bihainim hevi bilong mani, planti toktok i kamap long painim rot bilong strongim wok sios, na tu long strongim olgeta sios wokman insait long ol distrik, seket, peris na long olgeta kongrigesen.

Planti taim ol distrik i save lukluk long Nesenel Sios long givim ol baset bilong mekim wok bilong sios. Tasol taim nupela fainens dairekta i givim ript, em i soim rot olsem ol distrik i mas givim man i tona pesen long sios long mekim wok bilong sios.

bilong God.

Long toktok bilong givim, stuadsip em i wanpela rot ol sios lida inap skulim ol memba long pasin bilong lukautim na givim. Ol pasto i bin soim long hevi ol i gat long ol kongrigesen i mas lukautim ol. Tasol ol evanjelis tu i singaut long sios long lukluk long pe na hevi bilong ol.

Husat em i sios? Konprens i soim olsem, sios em i ol manmeri bilong God i stap long kongrigesen. Olsem na sapos ol wokman olsem pasto na ol evanjelis i laikim helpim, orait, namba wan samting ol i mas mekim em long skulim ol Kristen memba long pasin bilong sios.

Wanpela de ol long



• Long taim bilong konprens i gat ol singsing tumbuna tu i kamap bilong amamasim olgeta man, meri na pikinini husat i kamap long bung. Konprens i bin kamap long Yondumugi.

Konprens i bruk long tupela hap. Long wanem, sampela i tok, dispela em i pasin bilong kisim biknem long brukim distrik.

Tasol narapela hap i tok wok i bikpela tru

insait long Simbu. Olsem na long helpim, yumi mas brukim distrik i go long tupela hap. Tasol bung i tok, moa wok painimaut i mas kamap na givim ript long distrik kaunsil

bilong Simbu Distrik long lukluk long en.

I gat planti hevi bilong distrik ol i toktok long en na painim rot bilong helpim wok sios i go moa yet

## Wau redi long bikpela Baibel kem

ARI GUH DANDEE i raitim

WANPELA bikpela Baibel kem bilong ol lain memba bilong Kristen Sios bai kamap long Septemba 16 na 17.

Dispela Baibel kem bai kamap long Wau. Na ol lain long hap i wok long redim nau ples na ol samting bilong dispela bung.

Tasol ol ript i tok olsem ol lain husat bai go pas long dispela Baibel kem em ol lain yangpela bilong Towamo Luteran yut grup long Mosbi. Ol i laik mekim dispela bikos em bai givim sans tu long ol pipel bilong Wau long kamap long dispela bung.

Ples bilong holim bung em long Wau Forestri Koles.

Ol lain husat i wok long redim samting i tok klostu bai olgeta wok i pinis.

Wanpela mausman bilong ol, Bruder Gideon Kipusing i tok dispela tupela de em bai taim bilong amamas. Bikos ol bai tingim tu de em Papua Niugini i bin kamap olsem wanpela indipenden na fri kantri.

Bruder Kipusing i tok planti samting bai kamap long dispela tupela de. Olsem na i gutpela long ol arapela Kristen brata na susa long go na stap wantaim ol long dispela bung. Bikos dispela Baibel kem i no bilong ol Luteran tasol. Em i bilong olgeta memba bilong Kristen bilip insait long kantri.

Het tok bilong dispela Baibel kem em "King of Me"

## Nupela pater lukautim Engliken daiosis long Mosbi

VERONICA HATUTASHI i raitim

Distrik Kipusing long Mosbi long wanpela man long lukautim wok bilong sios.

Man ya em Pater Ron Baker na em i bilong London long Ingran. Em i namba wan taim tu insait long 40 yia we sios i kisim wanpela marit pater long holim wok Din long Engliken Sios long Mosbi.

Pater Baker i gat 58 kris-mas na em i marit wantaim foapela pikinini.

Ol pikinini bilong em i skul, tasol meri bilong em bai kam bihain long Mosbi long mun Desemba.

Dispela em i namba tu wok bilong Pater Baker long stap long PNG. Na em i amamas long stap wok namel long ol pipel bilong kantri long bringim ol i kam wantaim long famili bilong God.

Pater Baker i wok olsem pater bilong Engliken Sios

long distrik Kipusing long ol ples long Filipin, Ailan, long Asia na Najeria, long Afrika.

Em bai lukautim bikpela haus lotu bilong Engliken Sios, Sen Jons Katitrel long taun. Em i kisim ples bilong Pater John Titterington husat i bin holim dispela wok long las foapela yia.

Nupela din bai mekim wok bilong sios wantaim ol pipel long daiosis bilong em. Na tu long kisim Tok bilong God i go long ol skul sumatin husat i stap long ol institusen long Mosbi na go lukim ol sikman meri na pikinini long haus sik.

Sios i gat tingting tu long helpim ol man husat i save go i kam long ol sip insait na ausait long kantri. Sios bai kirapim wanpela sosol senta long Mosbi we ol wokman bilong ol sip i ken bung, amamas na malolo long en.

Wankain senta i stap long Lae we Engliken Sios long



• Pater Baker...nupela hetman bilong Engliken daiosis bilong Mosbi long narapela 4-pela yia. Em i bilong kantri Ingran.

hap i lukautim.

Pater Baker bai lukautim dispela senta sios i tingting long kirapim long Mosbi bilong sevim ol man bilong PNG na ol ovasis kantri.

Long wankain taim tu, Engliken Sios long Mosbi i kisim helpim wantaim mani inap long K12,000 i kam long dipatmen bilong Atoni Jenerel

long dispela wik.

Sios bai yusim dispela mani long baim wanpela bas bilong helpim ol long mekim wok bilong daunim hevi bilong lo na oda long siti. Sios i amamas long dipatmen bilong Atoni Jenerel husat i harim singaut long askim bilong ol na givim dispela helpim wantaim mani.



# Draipela san kukim Isten Hailans inap tripela mun

**SAPE METTA i raitim**

DRAIPELA san i kukim yet Isten Hailans provins inap long tripela mun nau.

Na dispela i kamapim tu bikipela hevi long

provinsal gavman. Bikos em i no gat mani moa insait long baset bilong disasta na imejensi riliv bilong givim long ol pipel husat i

laikim helpim.

Ol ripot i tok planti pipel husat i laikim helpim i bin bungim hevi long paia i kukim oi samting bilong ol. Paia i save kirap nating long bus na kukim ol gaden kaikai bilong ol, ol gaden kopi, haus na

ol arapela diwai em ol pipel i save kaikai pikinini bilong ol long en.

Tasol opis bilong provinsal dipatmen seketeri i tokaut olsem sampela bilong ol dispela paia i no kamap nating. Ol man yet i wokim paia na kukim ol samting bilong ol.

Na opis i tokaut tu olsem dispela kain hevi bilong draipela san i no

nupela samting. Olsem na ol pipel tu i mas redi olgeta yia long taim i gat kain hevi olsem. Na sapos ol i mekim olsem, no gat planti haus, gaden kaikai, gaden kopi na ol prut diwai bai bagarap olsem.

Ol paiaman bilong Goroka tu i askim gen ol pipel long no ken wokim nabaut paia baksait long haus

bilong ol o long ol bus klostu. Bikos draipela san i stap yet na paia inap kamap bikipela kwiktaim tru.

Long narapela ripot, Isten Hailans Kapitel Atoriti i bin askim tu ol pipel husat i stap long Goroka taun long no ken yusim nabaut wara. Bikos draipela san i wokim na wara i wok long sot nau.

Olsem na nogut wara bai pinis olgeta na kamapim bikipela hevi.

Olsem na sapos i gat sampela asua long ol paip na tep long haus o opis, ol ripot bilong dispela i mas go hariap long atoriti. Na dispela kain pasin bilong wasim tu ol ka na givim wara long ol plaua na diwai i mas pinis.

## Kiunga tu kisim taim long draipela san

**IAN KAKARERE i raitim**

LONG Kiunga, Westen provins i gat tupela kain wara i save ol manmeri. Dispela tupela kain wara em bia na wara tru bilong dring, kukim kaikai na wasim ol klos wantaim ol arapela samting.

Tasol long nau yet, dispela tupela wara i sot olgeta long Kiunga taun. Bikos san i wok long mekim save na Kiunga taun i go drai olgeta. Na long mak bilong wara long Flai Riva tu i surik i go daun olgeta. Na ol sip i no inap long bringim ol saplai samting i go long Kiunga.

Drai sisen i stap klostu moa long tripela mun nau.

Ol stua tu i sot nau long ol samting olsem kopi, suga, toilet pepa, rais wantaim ol arapela samting.

Long las wik Fraide, bia long olgeta stua long Kiunga i pinis. Wankain tu long suga.

Bikipela hevi tru ol manmeri long Kiunga taun i painim em long wara.

Bihainim dispela hevi, ol opisal bilong Ok Tedi Maining Limited (OTML) i tok save long ol manmeri bilong Kiunga taun long yusim gut wara. Bikos OTML i save saplaim wara i go long Kiunga taun.

Tok save ol opisal bilong OTML i givim i tok olsem ol manmeri long Kiunga taun i save yusim 48 milien lita wara long wan wan de. Dispela tok save i tambuim tu ol manmeri long yusim wara long gaden bilong ol, wasim rot na long mekim ol arapela samting.

Tripela oganaisesen i kisim bikipela tok save long yusim gut wara em Kiunga haus sik, vokesenel senta na Kiunga haikul.

Kiunga haus sik i save yusim 17 pesen bilong wara OTML i saplaim i go long ol manmeri long Kiunga taun. Kiunga vokesenel senta na haikul i save yusim 30 pesen.

## Wes Sepik tu daunim ripot bilong Micah

**FELIX RAMRAM i raitim**

SAMPELA bikman bilong Wes Sepik provins i no amamas long ripot bilong Micah komiti long rausim ol provinsal gavman na kirapim ol provinsal atoriti.

Ol i tok dispela i soim klia olsem komiti i laik rausim tasol pawa long han bilong ol pipel. Olsem bai ol pipel i no gat pawa bilong toktok long rait bilong ol.

Ol i tok planti hevi na trabel bai kamap insait long kantri sapos Nesenel Palamen i go het na pinisim ol provinsal gavman.

Namba tu primia na memba bilong Telefomin long Wes Sepik, Piamnok Lakurengin i tok nesenel gavman i no pinisim yet ol hevi bilong Bogenvil na lo na oda insait long kantri. Na nau em i laik kamapim wanpela bikipela hevi gen.

Em i sutim tu tok i go long Praim Minista Parais Wingti long harim ol gris toktok bilong ol ausait lain. Na i no lukim rot em kantri nau i wok long bihainim.

Mista Lakurengin i tok ol lida bilong kantri i wok long harim toktok bilong ol man bilong ol arapela kantri. Na klostu PNG bai kamap olsem ol kantri insait long Afrika em ol blakman i wok long pait wantaim gavman.

Em i tok, "Planti provinsal memba insait long kantri bai tok pait yet long rabisim dispela ripot bilong Micah komiti long pinisim ol provinsal gavman. Bikos provinsal gavman i stap moa klostu long ol pipel bilong ples."

Em i tok long sampela bilong ol dispela ples, ol nesenel memba tu i no save go lukim ol pipel liklik.

"Mipela ol provinsal politisen i wok long karim hevi na wok bilong ol nesenel politisen. Tasol planti bilong ol i save hait na stap tasol long Mosbi na i no go bek long ol provins na lukim ol pipel," memba bilong Telefomin i tok.

## TIMBER KAMPANI SAVE BRINGIM PLANTI WOKMONI




Environmental and Social Concern Group





*Antap:* Ol pikinini long Katlehong long Saut Afrika i tromoi han i go antap, lap na amamas long bikpela Nesenel De ov Pis long kantri bilong ol. *Sait-Raithan:* Tupela plisman bilong Thailand i ran long motobaik na patrol long wanpela provins long Thailand ol i kolim Yala.



*Antap:* Ol ami bilong Frens Yunalted Nesen i wok long putim pab waia long hetkwata bilong ol long Sentral Sarajevo.

*Daunbilo:* Tupela Palestain man i wok long algris na toktok long Gaza-Jericho pis plan na na tu mep we i soim ol setelmen long Israel.

*Antap:* Sampela man i karim wanpela man husat i kisim bagarap long taim bilong wanpela demonstresen long Witwatersand Yunivesiti. Man ya i kisim bagarap taim sampela man i tromoi tia gas long ol manmeri husat i protes. Dispela em long biktaun bilong Afrika-Johannesburg.

*Daunbilo:* Ol yangpela meri Thal Muslim i wok long lukluk i kam ausalt long windo bilong wanpela pasindia train ol i wok long ran long en. Dispela em long sauten Thailand. Planti taim ol birua bilong Muslim i save sutim ol pasindia train long sotgan na





# RESIS LONG GOL

## WINIM


# K20,000

### I STAP LONG GOL!!!

LONG WIN, BAIM WANPELA TOYOTA STOUT KA LONG ELA MOTORS NAMEL LONG JULAI 1, 1993, NA SEPTEMBER 30, 1993. NA MIPELA BAI GIVIM YU FRI PETROL INAP LONG K1,000 OLGETA!!! NA TU...YU GAT SANS BILONG WINIM GOL!!!



EMI ISI TRU!  
NEM BILONG OLGETA LAIN  
LONG KANTRI HUSAT I BAIM  
WANPELA NUPELA TOYOTA  
KA LONG ELA MOTORS  
PASTAIM LONG 30 SEPTEMBER  
1993 BAI GO INSAIT LONG  
DRO BILONG WINIM K20,000  
GOL...OLSEM NA RESIS LONG  
GOL NA BUNG WANTAIM  
ELA MOTORS TUDE!




 **TOYOTA**

**Ela Motors**

PORT MORESBY 229400 LAE 422322 RABAUL 921988 MADANG 822188 GOROKA 721844 MT HAGEN 521888 WEWAK 862255 KAVIENG 942132  
KIMBE 935155 TABUBIL 589060 VANIMO 871254 PORGERA 579367  
ALOTAU : WALTERS WORKSHOP PH 611174





*Antap:* Wanpela U-bot bilong Jemeni i brukim solwara. Sip ya i bin kisim bagarap long taim bilong Wol Woa 2 na stap aninit long solwara. Tasol wanpela sip kampani i pulim i kam antap na stretim gen. Na nau i wok long ron gen.

*Sait-Lephan:* Wanpela soldia i wok long sindaun na was long ol liklik pikinini i wok long pilal i stap. Dispela em long Nesenells Nu Los long hap bilong Belfast.

*Daunbilo-Lephan:* Tupela man na tupela meri i giaman olsem ol aipas, lek nogut na lapun manmeri na wokabaut. Ol i mekim dispela long painim laip bilong ol disebel manmeri i olsem wanem tru.

*Daunbilo:* Wanpela paitman bilong Palestain Liberesen Oganaisesen i hapim han bilong em na soim olsem lain bilong em i win. Dispela em long Sidon long hap bilong Saut Lebanon.





# **POWER**

## ***to the people!***

***IT'S THE GREAT RICE REVOLUTION  
IN YOUR STORE NOW!***





# BP I'M A WINNER

## Scratch-it



3 Easy steps to win

- 1 SCRATCH
- 2 ENTER
- 3 BE SEEN

Buy K5.00 of petrol or diesel and you get a BP "I'm a Winner" scratch-it-card. Scratch and win a bottle of Coke or a BP bumper sticker.

**BP TRIPLES YOUR CHANCES TO WIN**

Slap the sticker on your car and be seen out and about for a chance to win a Hi-Fi Stereo. Complete the back of the scratch-it to go in the BP "I'm a Winner" weekly draw to win a colour TV.



Check out your local BP outlet for further details.

## Spesel plis yunit bai stap long Isten Hailans provins

SAPE METTA i rattim

WANPELA Rapid Diploimen Plis (RDP) yunit bai stap long ples Kami ausait long Goroka taun.

Dispela bai kamap bihainim tok orait bilong Palamen long las bung bilong en.

Long dispela bung, memba bilong Lufa Mathias Karani i bin givim wanpela ripot bilong dispela askim.

Olsem na nesenel gavman bai givim mani bilong kirapim dispela plis yunit long hap.

Long ol toktok bilong em, Mista Karani i tok PNG i mas gat wanpela RPD yunit bes long ol ples em ol bikpela wok kamap i go het nau.

Memba i tok RDPU i mas stap bilong em yet. Na em i mas gat ol strongpela na gutpela man husat inap go insait long ol hap we i gat hevi long lukautim ol samting bilong gavman, ol kampani na ol pipel.

Em i tok long nau yet, RDPU i stap long ol ples we ol wok bilong painim gol, kopa na wel i wok long go het.

Na ol kampani husat i wok long ol dispela hap i save lukautim ol. Na tu ol i save tokim RDPU long wanem samting bilong mekim taim i gat liklik hevi namel kampani wantaim ol papa graun o ol wokman na meri.

Mista Karani i tok tinging bilong olupela gavman long kirapim RDPU long Goroka i bin gutpela tru. Olsem na i mas gat wanpela bikos hap graun bilong dispela projek i stap pinis long Kami. Bikos Goroka tu em i namel ples na bai isi long RDPU long go i kam nabaut long kantri.

## Man Isten Hailans kalabus 25 yia long kilim narapela

KOT i salim wanpela man Bena Bena i go kalabus long 25 yia. Bikos em i bin hait na toktok wantaim 5-pela poro bilong em na ol i go kilim wanpela man.

Roy Baleva Kayako husat i gat 25 krismas i bin laki tru na kisim 25 yia kalabus. Em inap long kisim bikpela mekim save stret. Tasol PNG i no gat lo bilong kilim ol kain bikhetman olsem.

Kot i painim olsem Kayako wantaim narapela 5-pela man i bin rong long kilim Peter Keapa. Kayako i bin plenim long kilim Keapa na kisim arapela 5-pela man long go wantaim em.

Ol kot ripot i tok olsem long Februari 10, 1992, Kayako wantaim arapela 5-pela man i bin go long haus bilong Peter Keapa long nait. Taim ol i kamap long haus, ol i banisim haus bilong Keapa na katim em long naip na tamiok. Ol i bin katim bodi bilong Keapa i go liklik liklik.

Kayako i bin sutim tok long Peter Keapa olsem Keapa i kilim papa bilong em long taim bilong pait. Olsem na em i bekim long kilim Keapa.

## Hanuabada komyuniti skul kisim fri klasrum

VERONICA HATUTASI i rattim

HEVI bilong klasrum long Sen Maikels komyuniti skul long ples Hanuabada insait long Sentrel provins i pinis.

Dispela i kamap bihainim long Telecom PNG i givim tupela haus bilong ol i go long dispela skul. Bipo Telecom PNG i save yusim ol dispela haus olsem hap opis bilong ol long Waigani. Tasol nau ol bai mekim olgeta wok long nupela Haus PTC.

Long mun Julai bilong dispela yia, bikpela paia i bin kukim tupela dabol klasrum bilong dispela skul. Wanpela bilong dispela tupela dabol klasrum i gat tupela gret 6, wanpela gret 5, opis na liklik stua bilong skul long en. Orait long narapela i gat tupela gret 4 klas long en.

Sen Maikels komyuniti skul i save kisim moa long 500 sumatin long

olgeta yia. Na long taim paia i kukim ol klasrum long dispela yia, dispela i kamapim bikpela hevi moa.

Olsem na ol bos bilong skul i senisim taim bilong ol pikinini tu long skul. Sampela bai skul long moning i go inap long belo na ol narapela bai statim gen long belo i go long apinun.

Bihainim askim bilong wanpela man, David Darby olgeta samting long Sen Maikels komyuniti skul bai orait gen.

Mista Darby i lukim kain hevi bilong dispela skul na askim Telecom PNG long givim sampela helpim. Ol bos bilong Telecom PNG i amamas tasol long dispela na givim tupela haus ya. Kos bilong wokim ol dispela haus em inap long K150,000.

Tasol Sen Maikels komyuniti skul i no inap tromoi wanpela mani long kisim dispela tupela haus. Ol i kisim fri tasol.

## Malala haiskul laikim K600,000

i kam long pes 5

stretim pastaim. Kain olsem wokim tupela moa haus bilong ol tisa, stretim ol klasrum na haus slip, wokim wanpela kompyuta klasrum, stretim ol paip wara na toilet na planti arapela samting," Sista Jane i tok.

Em i tok sampela samting em skul i kisim pinis em wanpela jenereta, 30

taiprait na 4-pela kompyuta.

Em i tok tu olsem skul bai salim ol tisa i go skul na kisim digri bilong ol. Orait taim ol i pinisim skul bilong ol, ol bai go na skulim ol sumatin taim Malala haiskul i kamap olsem wanpela nesenel haiskul.

Long nau yet, Malala haiskul i gat samting olsem 600 sumatin na 32 tisa.



# Isten Hailans provinsal asembli kisim tok orait bilong stap inap 5-pela yia

SAPE METTA i raitim

PROVINSAL Afeas na Viles Sevis minista, John Nilkare i sainim pinis ol pepa wok na givim tok orait long Isten Hailans provinsal asembli long skruim taim bilong en long 4-pela yia i go long 5-pela yia.

Aninit long dispela tok orait, provinsal gavman bai stap long opis inap

long 5-pela yia. Orait bihain long dispela 5-pela yia, nupela provinsal ileksen bai kamap long 1995.

Isten Hailans provinsal asembli i tok orait tu long oganaisim namba 15 Nesenel Primias Kaunsil Konprens long mun Oktoba. Konprens bai stat long Fonde, Oktoba 7

na pinis long Sande, Oktoba 10. Ol i makim pinis wanpela komiti long stretim ol saming bilong holim dispela konprens.

Provinsal asembli i tingting nau long strongim wanpela tingting bilong en long provinsal gavman long wokim wanpela haus bilong olgeta olpela primia bilong provinsal gavman long ples bilong ol yet.

Dispela i min olsem provinsal gavman bai lusim moa long K25,000 long wokim haus bilong tupela olpela primia olsem James Yanepa na Walter Nombe.

Primia bilong nau yet Robert Atiyafa, sapos em i lus long 1995 ileksen, provinsal gavman bai wokim wanpela K25,000 haus bilong em. Mani bilong wokim haus bilong olpela primia bai kamap long mani bilong dispela yia em provinsal gavman i no yusim.

## Morobe yut grup bai holim Kristen wokabaut

WANPELA sios yut grup bilong Morobe provins i wok long karimaut nau wanpela "Kristen Wokabaut" long hailans rijon bilong painim mani long wokim wanpela spesel memoriol haus.

Samting olsem 50 memba bilong Kulingfutu kongresen long Kote distrik i bihainim lekmak bilong ol namba wan Kote misineri em ol i bin kisim Tok bilong God i go long hailans rijon. Dispela em long 75 yia i go pinis.

Ol i statim wokabaut bilong ol long Kainantu. Na ol i go long ol ples olsem long Raipinka, Bena Bena, Goroka na Asaroka. Dispela em ol ples we ol namba wan Luteran misineri i bin go long en.

Long nau yet, ol dispela ples i stap olsem ol gutpela na strongpela Luteran misin stesin.

Dispela 50 memba grup i brukim ol yet i go long tupela hap. Namba wan grup bai kisim ka na go long Hagen.

## Moa helpim kapsait long Red Sil apil

VERONICA HATUTASI i raitim

RED Sil Apil program bilong Salvesen Ami i putim kamap long dispela yia i kisim gutpela helpim i kam long planti bisnis ples long Mosbi.

Na K1,000 helpim bilong Daltron Electronics i bin skruim mak bilong ol mani oganaisesen i kisim i go antap long K102,000.

Mak bilong mani em Salvesen Ami i laik kamapim long dispela yia em K135,000. Ol bikman bilong oganaisesen i bilip olsem ol bai bungim o abrusim dispela mak. Bikos planti

bisnis i wok long givim helpim bilong ol.

Bos bilong Daltron, Bruce Dahlenburg i bin amamas long givim hap mani ol i go long apil bilong Salvesen Ami. Em tok em i gutpela bikos oganaisesen ya i yusim mani bilong mekim ol wok bilong helpim ol pipel insait long kantri.


Long olgeta yia, Daltron i save givim helpim bilong en long mani i go long Red Sil Apil program bilong Salvesen Ami.

Mesa Tau Pala husat i seketeri bilong Salvesen Ami i tok amamas tru long helpim bilong Daltron Electronics.



• Mesa Tau Pala bilong Salvesen Ami (namba tri long raitan) i kisim sek mani long han bilong wanpela wokman bilong Daltron Electronics. Dispela mani em inap long K1,000 na bai go insait long program bilong 1993 Red Sil Apil.


# Namba 2 Johnson Autbot Moto Resis Bilong Yia



## HIRI MOALE 1993

Ela Beach hap pas 9 long moning (9.30 am)

Fraide, 17 Septemba



Husat ol lain i gat bot we i save yusim ol ensin i go inap long 40 hos pawa i ken resis. Long wan wan bot bai tupela kru tasol.

Pepa bilong resis bai stap long Ela Beach long de bilong resis. Kam na amamasim yu yet long Johnson Autbot Toba Motors bot resis...em hap bilong Hiri Moale 1993.

**FRI SEKAP LONG  
OL AUTOBOT  
MOTO ENSIN**

OMC **Johnson**  
OUTBOARDS

Namba wan prais: 40 hos pawa Johnson Autbot  
Namba tu prais: 25 hos pawa Johnson Autbot  
Namba tri prais: 15 hos pawa Johnson Autbot.



**TOBA**  
MOTORS

PORT MORESBY 21 7874  
LAE 42 2611  
RABAU 92 1866  
ALOTAU 61 1005

Agents: KIMBE 93 5035 WEWAK 86 2784 BALIMO 66 1495  
TABUBIL 58 9462 KIUNGA 581139 DARU 65 9129



# Marasin em samting bilong kisim fri

**Dia Edita,**  
Mi bilong Sepik na nau mi stap long Hagen.

Mi no amamas tumas long pasim em bikpela haus sik long Hagen i save mekim long sasim fi long ol manmeri taim ol i gat sik o bagarap long bodi bilong ol na ol i kam long kisim marasin.

Mi no save, ating long ol

narapela hap bilong kantri, dispela lo tu i stap. Tasol long provins bilong mi yet, mi no lukim kain lo olsem bilong ol haus sik bilong mipela.

Mi no save amamas taim mi lukim ol sik manmeri i baim K1 long kisim marasin long Hagen.

Mi yet i pilim olsem gavman i putim helt sevis bilong ol

pipel i mas kisim fri marasin long em taim ol i sik. Na i no bilong kisim mani long ol sik manmeri o pikinini.

Kain pasin olsem i kamap long ol helt atoriti, olsem na mi yet i lukim olsem planti man i dai pinis long ol haus sik na tu long ples bilong ol. Bikos haus sik i salim ol i go bek long wanem i no gat

mani bilong baim marasin.

Ol pipel bilong ples tu i save painim hat long painim ol liklik wansiling.

Tu, ol lapun i save painim hat na i moa gutpela sapos gavman i mas givim ol fri helt sevis.

**Leo Yansuan, Hagen.**

## Narakain kastam bilong WNB provins

**Dia Edita,**

Plis givim mi spes long autim liklik tingting bilong mi long *Wantok Niuspepa*. Na ol pipel long kantri i ken lukim na skelim.

Yumi gat ol kainkain kastam bilong yumi long olgeta inap bilong PNG. Tasol mi kirap no gut long wanpela pasin kastam bilong ol pipel long Wes Nu Briten we ol i soim amamas bilong ol long kamapim bilong nupela pikinini. Dispela em long pikinini husat i no gat papa bilong em.

Mi lukim dispela kastam long ai bilong mi no stret. Orait, taim wanpela meri husat i no gat man i karim pikinini, ol wanlain bilong em i save mekim bikpela kainkain long wanpela wik na givim presen i go long mama na pikinini.

Long hap bilong mi, mipela i save soim amamas bilong mipela na givim presen i go long pikinini husat i gat papamama bilong em.

Husat man i gat sampela tingting long dispela rait i kam tasol long *Wantok Niuspepa*.

**Kolosi Wasangao, KIMBE.**

# Ol Tolai singsing tumas long meri

**Dia Edita,**

Mi save les long harim ol musik bilong Papua Niugini we i save toktok long ol meri.

Bikpela tru em long ol pawa ben bilong Tolai. Planti taim mi save harim kaset bilong ol Tolai. Na mi save harim ol i singsing tasol long meri. Ol i no save singsing long ol arapela samting.

Olgeta taim ol i laik singsing long ol meri. Olsem tru ol meri tasol i stap long Tolai na i no gat ol man i stap. Sapos ol meri no gat ating yupela ol Tolai bai no inap stap.

# Wan wan sios i gat lo long bihainim

**Dia Edita,**

Mi laik bekim pas bilong Chassie Jotham bilong Biem ailan long Wewak. Pas bilong em i bin kamap long Julai 1 long dispela yia.

Chassie i bin rait na tok olsem Jisas i no kem long pinisim lo bilong God. No gat. Em i kam daun long inapim tasol. Na tu em i bin tok olsem Sarere em i trupela de bilong lotu.

Mi gat sampela toktok long bekim pas bilong em. Na tu long putim sampela poin bilong mi bikos mi no amamas long pas bilong em.

Namba wan poin bilong mi, mi laik tok klia long Chassie olsem lotu bilong mi em Baptis. Na em i sios bilong ol Jentail. Mi no inap long bihainim ol Jews. Bikos lo bilong ol em God yet i givim long Moses long taim bilong olpela Testamen.

Papua Niugini em i wanpela kantri i gat mama lo. Na mipela ol pipel i mas bihainim olgeta lo i stap insait long dispela mama lo. Mipela bai i no inap long bihainim lo bilong ol arapela kantri. Wankain tu long ol sios. Wan wan sios i gat lo bilong em yet. Wanpela arapela sios bai i no inap tru long bihainim lo bilong arapela sios.

Baibel i tok long Galesia 2: 16 olsem: Tasol yumi save, God i no ting long man i bihainim, na long dispela em i kolim em stretpela man. Nogat. Man i bilip long Krai Jisas, em tasol God i save kolim em stretpela man. Na yumi bilip pinis long Krai Jisas, olsem na God i ken kolim yumi stretpela man. Na yumi bilip pinis long Krai Jisas, olsem na God i ken kolim yumi stretpela man long dispela bilip long Krai, na i no long wok bilong bihainim lo. Long wanem i no gat wanpela man em i mekim wok bilong bihainim lo, na long dispela God i kolim em stretpela man. Nogat.

Galesia 3:13 i tok: Lo em i givim nem long yumi olsem man bilong lus long hel. Tasol bilong helpim yumi, Krai yet i kisim dispela nem "man bilong lus", na em i baim bek yumi. Yes, Baibel i tok "Olgeta man i hangamap long diwai ol i man

# Ol plisman long Kimbe wokim wantok sistem

**Dia Edita,**

Mi bilong Saten Hailans. Tasol nau mi stap long Wes Nu Briten provins.

Yes, mi laik tokaut long wanpela samting em i lukim ol Kimbe. Na i no stret long ai bilong mi.

Dispela samting em ol plisman long Kimbe i save wokim wantok sistem. Mi tok ol i save wokim wantok sistem bikos planti plisman taim ol i bungim ol wantok bilong ol i mekim rong, ol i no

save holimpasim ol na sasim ol. Ol plisman i save giaman toktok wantaim ol na larim ol i go. Na tu ol plisman i save tok em liklik samting.

Narapela samting tu i olsem ol plisman i save dring bia long taim bilong wok. Na sampela taim ol i save poromanim ol raskol man.

Olsem na mi laik askim yupela ol plisman long Kimbe long stapim dispela pasin em yupela i wok long mekim. Yupela i mas

save olsem wok bilong daunim hevi bilong lo na oda i stap long yupela ol plisman. Sapos yupela i go het na wokim wantok sistem na tu wokbung wantaim ol raskol man, husat bai daunim dispela hevi. Yupela i mas tingting na mekim samting.

Ol brata, yupela i mas save olsem gavman i save baim yupela long olgeta potnait long mekim wok long daunim hevi bilong lo na oda.

**Henry Kong Lui KIMBE**

Maski long singsing tumas long ol meri. Olsem wanem. Yupela i gat ol susa na mama tu o no gat. Traim na singsing long ol arapela samting.

Mi no kros o jeles long ben bilong yupela. Nogat. Mi laik autim tasol liklik tingting bilong mi. Mi save i gat ol gutpela samting yupela i ken singsing long em. I no singsing bilong ol meri tasol bai kamapim kaset bilong yupela. I gat arapela samting em ol man i save laik long harim long kaset.

**Fidelis Gorea KIMBE.**

# No ken sutim tok nating

**Dia Edita,**

Mi laik bekim pas bilong trupela de bilong lotu. Mi bilip olsem trupela de bilong lotu em i de yumi mas amamas long kirap bek bilong Krai Jisas long matmat. Jisas i bin kirap bek logng Sande. Olsem na long dispela de mipela i bung, amamas na singsing long liptimapim nem bilong Bikpela.

**Zachariah Anbei Tibong KOKOPO**

# No ken sutim tok nating

**Dia Edita,**

Mi laik bekim pas bilong John Mibigl. Pas bilong em i bin kamap long Februeri 2 long dispela yia.

Long pas bilong em, John i tok pasin pamuk i pulap tru long Tiauru sab-divisen long hap bilong Bialla distrik. Na tu em i tok olsem em i save go na autim tok bilong God long Tiauru.

Brata, sapos i tru olsem yu save autim tok bilong God o no gat. Sapos ansa bilong yu i yes, orait tok yu save autim i gat kain ol toktok tu o no gat? Sapos i gat orait yu mas beten long Bikpela i ken helpim eria bilong mipela. Na i no long bagarapim nating nem bilong ples.

Mi ken tokim yu stret olsem i no olgeta manmeri long Tiauru sab-divisen i save mekim pamuk pasin. Ating yu mas bel hevi long tambu na meri bilong yu long pasin bilong yu yet. Bikos meri bilong yu i lusim yu na i maritim nupela man.

Olgeta lain long Tiauru i save olsem yu wanpela man bilong pilai laki. Na tu yu wanpela man bilong kot stret ya.

Olsem na brata, sapos yu no save bihainim tok bilong God, orait no ken autim nating tok bilong God. Bikos yu wok long giamanim ol manmeri ya.

**William Sumuno Joel BIALLA**

# Ol meri dia tumas

**Dia Edita,**

Mi wanpela manki Wes Sepik tasol nau mi stap long Kimbe, Wes Nu Briten provins.

Mi laik autim liklik wari bilong mi i go long ol papamama husat i save sasim bikpela mani long ol man husat i laik maritim pikinini meri bilong ol.

Pasin bilong baim meri em i bikpela samting tru long Papua Niugini. Na mi lukim olsem dispela i wok long kamapim planti hevi namel long famili.

Sampela yangpela man i no wok na ol i save painim hat long baim meri. Taim papamama i askim tumas long pe bilong meri, ol i save lusim meri. Bikos ol i nogat mani long baim meri. Dispela i save mekim ol meri i karim pikinini i no gat papa.

Mi laikim ol papamama i mas daunim prais bilong pikinini meri bilong ol. Sapos no gat, ol i no ken sasim man long baim meri. Ol i mas larim dispela boi i kisim nating pikinini meri bilong ol.

Taim man na meri i gat bikpela laik long marit, papamama i no ken stapim tupela. Bikos sampela taim pikinini i ken bagarapim em yet.

**Peter Kuni KIMBE.**

## Rausim provinsal gavman sistem

**Dia Edita,**

Mipela ol grasrut long Vanimo long Sandaun provins i givim ful sapot long gavman bilong Praim Minista Paias Wingti long tingting bilong en long pinisim wok bilong olgeta provinsal gavman long kantri.

Long ol yia provinsal gavman i bin stap wok, no gat wanpela gutpela sevis i kam long mipela ol grasrut long ol ruel eria. No gat gutpela helpim i kam long ol sevis olsem et pos, skul na rot.

Olsem na mipela ol lain grasrut i sapotim tru tingting bilong Wingti gavman long pinisim ol provinsal gavman. Na kirapim gen wok bilong lokol gavman kaunsil.

**David Molai, VANIMO.**

# Ol liklik sios is autim tok tru

**Dia Edita,**

Mi laik sapotim pas bilong Pings Lu i bin kamap long Fonde, Mas 11, long dispela yia.

Pings Lu i bin bekim pas bilong John Kawi em i bin toktok long giaman profet.

Long bekim pas bilong Pings Lu, mi ken tok long nau yet, planti wokman na meri i lukim ol kain kain sios na i no gat bilip long God. Bikos ol bikpela sios i bin kam pas long Papua Niugini i kamapim ol bikpela

senis. Na i senisim tingting bilong ol manmeri.

I kam inap long nau, ol liklik sios i kam na autim trupela tok bilong God. Na dispela i senisim pasin bilong ol manmeri. Tasol planti manmeri i les tru long senisim pasin no gut bilong ol. Olsem na ol i save tok olsem ol nupela sios grup em ol giaman profet.

Baibel i tokim yumi olsem: Man husat i go pas bai kam bihain na man husat i kam bihain bai go pas (Luk 13:30

na Mak 10:31).

Tasol wari mi gat i olsem yumi i no ken hapim nem bilong wanpela bikpela o liklik sios. Yumi olgeta i mas bung wantaim na hapim nem bilong Bikpela Jisas Krai. Bikos papa bilong em i wokim yumi olgeta husat i stap long dispela graun. Na tu olgeta sios insait long dispela wol i lotuim wanpela God tasol. I no gat moa long wanpela God.

**Mat S Makain Lumi, SANDAUN**

# Pe bilong ol vilis kot opisa daun tumas

**Dia Edita,**

Mi wanpela viles kot majistret na mi laik autim wari bilong mi i go long *Wantok Niuspepa*.

Yes, mi wari long pe bilong mipela ol provinsal viles kot opisa long hap bilong Aitape, Lumi, Nuku na Vanimo long Sandaun provins. Pe bilong mipela ya i no gutpela liklik.

Mipela i mekim bikpela wok long sevim ol pipel long ples. Na nesenel gavman wantaim provinsal gavman i no luksave long wok bilong mipela.

Mi askim ol bikman insait long provinsal gavman long lukluk long hevi bilong mipela. Na traimekim sampela samting long en. No ken

sindaun olsem ol aipas man.

**G. Animo, Sissano, AITAPE**

# Ol Kristen i stap long nupela kontrak

**Dia Edita,**

Mi laik bekim pas bilong Gibson Enoch i bin kamap long *Wantok Niuspepa* long Ogas 12. Brata ya i stap long Lakimata haus kalabus long Wes Nu Briten provins.

Gibson i tok wanpela pater i tok olsem lotu long Sande i giaman tasol. Em tok yupela no ken tokaut long dispela samting bikos em i pret no gut ol bikbos long Rom i kilim em. Las long en, em i tok long lusim Katolik sios na lotu long SDA sios taim yupela i pinis long haus kalabus.

Gutpela stori bilong yu brata Gibson. Tasol bilong wanem na yu no laik autim nem bilong pater ya na yumi ken painim aut sapos hap tok bilong em i tru.

No gut man ya i wanpela pasto o wokman bilong SDA sios husat i laik grisim yu long joinim lotu bilong em.

**Sam Nawong, MADANG.**



# Ol risev plisman long Kimbe i no save long ol Kales ben no ken givap

**Dia Edita,**  
Komplen bilong mi i go long ol risev plisman long Kimbe. Mi save long nem bilong ol. Tasol bai mi no inap long autim nem bilong ol.

Olgeta manmeri long Kimbe i save dispela ol risev plisman i no bin go long Bomana Plis Koles long Mosbi long kisim kos long kamap olsem ol risev plisman. Tasol ol i save ekt olsem ol i save gut tru long lo.

Taim ol i holimpasim wanpela man i mekim rong, ol i save paitim dispela man krangi tru. Na taim ol i kisim em i go long plis stesin, ol i save askim em kain kain kwesten. Sapos em i no bekim dispela ol kwesten bilong ol gut, ol i save paitim em.

Olsem na mi laik tok dispela ol risev plisman long

Kimbe i no save long lo. Tasol ol i save so op stret. Ating yunifom bilong gavman i mekim na yupela i ting olsem yupela i save gut long lo.

Narapela samting tu i olsem taim ol i karim aut operesen wok, ol i save brukim haus bilong ol manmeri. Na kisim ol gutpela samting bilong ol olsem redio, klos, gita na ol arapela samting. Ol i save kisim dispela ol samting bikos ol i save tingting olsem ol manmeri i stilim. Na kam putim long haus bilong ol.

Wanpela arapela samting dispela ol risev plisman i save mekim em pasin bilong wantok sistem.

**Terence Tupali KIMBE**



## Ol plisman long Vanimo mekim gut wok

**Dia Edita,**

Mi laik givim tok amamas bilong mi i go long ol plisman long Vanimo long gutpela wok bilong ol.

Mi bin amamas tru long lukim ol plisman long Vanimo i holim ol manki husat i stil long Steamships Trening Kampani. Ol plis man i bin go hariap tru na holim ol dispela manki.

Narapela bikpela samting ol plis i bin mekim em long sutim ol raskol husat i bin stil long Westpac beng. Ol plisman i bin wokim gutpela wok tu long dispela taim. Ol i ranim ol raskol i go na kilim wanpela klostu long Vanimo haikul.

Dispela i soim tru olsem ol plisman long Vanimo i mekim wok bilong ol. Na mi laikim

**Dia Edita,**

Mi wanpela manki long ples Indamatasa. Ples bilong mi i stap namel long boda mak bilong Galv provins na Okapa distrik long Isten Hailans provins.

Mi laik salim bikpela toksori bilong mi i go long ol ben memba bilong Kales Gadagads long Madang. Bikos

long mun Jenueri long dispela yia, ben lida bilong ol, Sandie Gabriel i bin dai.

Sandie wantaim lain bilong em, mi ken tok i wanpela narapela kain ben insait long Papua Niugini. Bikos ol i save pilaim ol singsing i gat bikpela mining. Na tu i save singsing long stail na nek bilong ol Madang stret.

Narapela bikpela samting mi ken tok i olsem planti manmeri long Papua Niugini i save laikim ol singsing bilong Kales Gadagads. Bikos Sandie i save singim ol singsing long stail we i save kamapim wari long tingting na bel bilong ol manmeri.

Tasol Sandie i dai na lusim ol ben memba

bilong Kales Gadagads wantaim bikpela wari. Ol bai i no inap lusim tingting long em.

Wari bilong mi long nau yet, i olsem mi no laikim wari i mas daunim Kales Gadagads. Olsem na mi laik askim ol ben memba bilong Kales Gadagads long no ken givap. Ol i mas go het na bihainim lek-mak bilong Sandie.

Ol brata long Yabob, yupela i mas go het long hapim nem bilong Kales. Na katim sampela moa kaset long ol rekoding studio long kantri. Mi bai harim long bikbus bilong Okapa we ples bilong mi i stap. Na mi bai hapim nem bilong Kales.

**Wario Kiong Okapa, GOROKA**

## Sapos yu no amamas orait tokaut

**Dia Edita,**

Mi laik autim liklik wari bilong mi na ol pablik i ken ritim. Sampela taim long dispela yia sampela bikhet man i bin mekim nabaut long ol meri long Godens maket.

Dispela ol hevi long Godens maket long Mosbi i bin karim bikpela het tok long niuspepa na redio. Sampela bikhet man i bin holim ol meri na rausim klos bilong ol long pablik ples.

Taim mi lukim ol dispela kain ripot long niuspepa man, mi sem stret. Bikos mi save olsem Papua Niugini em i wanpela Kristen kantri. Planti pipel long arapela kantri i save tok PNG em i Kristen kantri.

Yupela ol man husat i save mekim dispela kain pasin i mas sem. Yupela i no pik na dok bai yupela mekim ol dispela kain pasin. Pikinini bilong man i mas sem.

Yumi stap nau long pasin bilong waitman na i no long pasin tumbuna bilong yumi. Mi bilip planti bilong yumi i go pinis long skul na yumi save long wok developmen em i wok long kamap.

Sapos yupela man i les long lukim ol meri i putim trausis o sotpela sket, gutpela yupela go na tokim em olsem yu no amamas long kain dres bilong em. Na maski long rausim koles bilong em long pablik.

**Omothy B Naz MOSBI.**

## God i no stapim man long kaikai wanpela samting

**Dia Edita,**

Mi laik bekim pas bilong wanpela brata i kamap long *Wantok Niuspepa* long sampela taim i go pinis. Brata ya i toktok long sampela kaikai we i save mekim man i doti. Mi no wanbel long toktok bilong em.

Mi askim yu olsem wanem Baibel ves tru i tok ol kaikai save mekim man i doti? Na wanem Baibel ves i tok olsem sin i stap long ol kaikai?

Baibel i tok olsem olgeta kaikai em God i wokim i gutpela na klinpela tasol. God yet i blesim na givim yumi long olgeta kaikai bilong kaikaim. Dispela kaikai i no pas i stap long bel bilong man. Nogat. Lukim long Mak 7: 14-23. Na tu long Matyu 15: 10-20.

Maus bilong Jisas yet i tokaut long dispela samting. Brata, yu harim gut pastaim. Samting tasol we i stap long bel bilong man na kam aut sait i save mekim man i doti. Em ol kain samting olsem bel hat, tok kros, tok nogut, tok beksait na ol arapela moa. Lukim moa long dispela samting long Matyu 7: 1-6.

Yu klinim o rausim hap piang long ai bilong yu pastaim na bihain klinim ai bilong brata bilong yu.

Long toktok bilong yu long bia, mi ken tok olsem dispela i rong na mi supotim yu. Bia save mekim man i doti.

**Api Kaware, Tawamo, Mosbi.**

## Painim Penpren

**Nem:** Georgina Frair  
**Krismas:** 24 (singel meri)  
**Adres:** P. O. Box 1167, Oguua, Ghana, West Africa.

**Save Laikim:** Pilai, kuk, bungim ol wanlain na poroman, rait na salim pas na ol poto i go long ol poroman.

**Nem:** Ellen Aggrey  
**Krismas:** 26 (singel meri)  
**Adres:** P.O. Box 1167, Oguua, Central Ghana, West Africa.

**Save Laikim:** Raun, bungim ol wanlain na ol poroman, kuk, rait na salim pas i go long ol poroman.

## Laikim Penpren

**Nem:** Odilia Wara  
**Krismas:** 19  
**Adres:** P O Box 372, Hawaiiin, Wewak, ESP

**Save Laikim:** Harim musik, lukim piksa, pilai volibal na ritim  
*Wantok Niuspepa*

**Nem:** Petro Paia Kots  
**Krismas:** 18  
**Adres:** P O Box 192 Mt Hagen, WHP

**Save Laikim:** Ritim niuspepa, pilai ragbi na go lotu

**Nem:** Tonny Aiyo  
**Krismas:** 19  
**Adres:** P O Box 655 Kimbe, WNPB


**Save Laikim:** Go lotu, singsing lotu, pilai ragbi pilai basketbal na pilai gita.






# ANDERSONS - ERIKU LAE ONLY SEPTEMBER WHOLESALE SPECIALS!

**ZENAG CHICKEN EGGS  
EXTRA LARGE 60g 10 DOZEN**




**K21.00  
PER CTN**

**ZENAG CHICKEN  
BREAST 500g x 22**



**K27.35  
PER CTN**

**ZENAG CHICKEN LIVERS  
500g x 22**




**K9.99  
PER CTN**

**ZENAG MEAL  
MAKER  
1Kg x 12**




**K29.15  
PER CTN**

**ZENAG CHICKEN  
SIZE 10 x 11**



**K28.85  
PER CTN**

**ZENAG CHICKEN  
SIZE 12 x 10**



**K31.75  
PER CTN**



# Neuendettelsau-strongim wok misin insait long PNG

**SANANG ZAZORING i raitim**

WOKMISIN dipatment bilong Luteran Sios insait long Bavaria long Jemani i mekim bikpela wok tru bilong salim na strongim wok misin long kirapim ol Luteran Sios long wol.

Dispela wok i karim planti kaikai insait long Afrika, Esia na Amerika. PNG i kisim Tok bilong God long dispela rot.

Neuendettelsau dipatment bilong wok misin i kirap long wok bilong wanpela man bihainim singaut bilong Luteran Sios Bavaria. Nem bilong dispela man em Wilhelm Loehe. Dispela i bihainim kain kain hevi i kamap na Luteran Sios Bavaria i statim long daunim ol dispela hevi.

Dispela taim hevi bilong nogat wok i kamap na planti manmeri i lusim ples bilong ol i go long Jemani. Taim ol dispela lain i kamap planti, ol i singaut long kisim pasto olsem na Bavaria i salim pasto Wilhelm Loehe.

Pasto Loehe i bin statim semineri na dikones long Neuendettelsau. Em i kamap

dispela skul bilong trenim ol man long go bek long ples na mekim peris na Sandeskul wok. Ol arapela wokmanmeri i stap bek long lukautim ol trangu long wok sori.

Pasto Loehe i trenim planti bilong ol na ol 1 go long ogeta hap bilong Bavaria. Em i statim ol skul na haus sik tu bilong helpim ol manmeri long ples. Narapela bikpela as em long salim ol misineri i go long ovasis kantri.

Long dispela taim Neuendettelsau i kamapim semineri na trenim ol pasto na salim ol i go long Amerika, Australia na Is Yurop. Namba wan taim Neuendettelsau i salim wokman em long 1942.

Long dispela taim Neuendettelsau i bin salim Johann Flierl i go long Australia long 1878. Insait long Australia Flierl i harim olsem Jemani i lukautim wanpela hap em ol i kolim Niugini.

Olsem na em i laik kam long Papua Niugini.

Neuendettelsau i strongim wok misin bilong em long salim ol misineri long ovasis kantri na PNG. Johann Flierl i wok long Australia inap long namba wan Wol Woa.

Bihain long dispela, ol i kirapim Papua Niugini na Brasil opis long Neuendettelsau. Ol wokman bilong PNG opis

Namba wan man husat i bin wok long Papua Niugini (ELC-PNG) opis em Christian Keysser.

Long 1919, Keysser i lusim Papua Niugini na i go bek long Jemani na wok long dispela opis. Na tu em i bin mekim wok tisa long semineri long Neuendettelsau. Long 1945, em i ritai long dispela opis na George Vicedon i kisim ples bilong em.

Na long 1955, Adam Metzner i kisim wok isnait long Papua Niugini opis i go inap long 1971. Bihain long Vicedon, Werner Jacobsen i wok inap long tripel yia. Bihain long em, Hannes Guensbauer i wok i kam inap long 1986, na long 1987, Gernod Fugmann i kisim opis.

Nemi i senis

I no longtaim nem Papua Niugini opis i senis na ol i givim nupela nem olsem PNG-Pacific East Asia opis. Dispela senis long nem i bin kamap. Long wanem, ol planti sios insait long Esia husat i sot long helpim ol bai yusim dispela opis long kisim helpim.

Wok bilong ol kongrigesen long Jemani Dispela wok i kamap long wok bilong ol kongrigesen na wan wan Kristen memba. Ol i amamas tru long mekim dispela wok. Ol i save putim ofa mani na prea tu long strongim dispela wok.

Long strongim dispela wok, wok poroman i bin kirap long wok wantaim ol Kristen manmeri bilong ELC-PNG. Long nau Karin Mueller i lukautim opis bilong wok poroman na dispela wok i ran gut.

Long salim ol wokman ovasis, ol i save kamapim spesel trenim long Neuendettelsau. tasol dispela trenim ol i bin stopim long 1983. Long kisim ples bilong en, ol i save singautim ol pasto bilong wan wan kongrigesen na salim ol long ovasis sios, planti bilong ol i save kam long Papua Niugini na wok insait long ELC-PNG.

Neuendettelsau i sanapim tu wok bilong skolasip long kamapim gutpela wokman na ol sios lida. Dispela wok em i sanap namba wan mak bilong wok misin bilong Luteran Sios Bavaria. Em i strongim poroman namel long Luteran Sios insait long Jemani na arapela luteran sios long ovasis olsem ELC-PNG.

# Wok skaut long Madang pundaun olgeta long 1993

INSAIT long tupela yia i go pinis, wok na nem bilong ol skaut long Madang provins i bin kamap bikpela tru.

Tasol long dispela yia, wok bilong skaut i go slek na planti memba i lusim asosiesen.

Madang provinsal gavman i bin givim K15,000 i go long Madang Skaut Asosiesen (MSA) long 1991 bihain long MSA i salim wanpela sabmisen i go long provinsal kabinet. Dispela mani i helpim MSA long mekim wok bilong en i go bikpela moa.

Milen Be, Mosbi na Morobe provins i bin go pas long kisim ol fil progrem. Madang i bin kam bihain taim ol i kisim James Noke long wok fultaim wantaim MSA olsem fil komisina.

Long wanpela bung bilong ol skaut komisina long Mosbi long 1992, ol i painimaut olsem Madang i bin winim ol arapela provins bikos em i gat planti skaut.

Long 1991 na 1992, Madang i bin gat moa long 1,000 skaut-memba na skaut lida, moa long

700 manmeri i kisim kos bilong kamap olsem ol skaut lida na i gat 27 skaut olgeta long Madang provins (Bogia, Karkar, Madang taun, Not Kos, Apa Ramu na Saidor).

Narapela samting tu i olsem MSA i go pas long kamapim ol redio progrem bilong givim skul, tok save na nius i go long ol skaut memba na tu long ol arapela manmeri.

Mista Noke i tok wok bilong MSA i pundaun long dispela yia bikos gavman i katim mani bilong

skaut long 1992 na 1993. Narapela hevi tu em i tok olsem hetkwata bilong skaut long Mosbi i bin saspenim olgeta fil progrem na fil komisina. Bikos i no gat inap mani bilong baim ol long ranim ol progrem bilong skaut asosiesen.

Em i tok ating sapos skaut asosiesen i ken mekim ol wok olsem disasta riliv wok, drag, helt, populesen kempen na ol arapela voluntia wok, gavman bai lukluk na givim sapot na helpim.

Noke i tok planti kantri i wok long yusim skaut asosiesen long

helpim ol oganaisesen bilong helt, edukesen, ami na plis long mekim wok. Olsem na em i ting olsem dispela em i wanpela rot bilong pulim planti yangpela i go insait long skaut progrem.

Noke i tok moa olsem long nau yet, ol skaut asosiesen i lainim planti gutpela samting. Tasol ol i no gat sans bilong traim na yusim ol samting ol i lainim. Bikos i no gat man o bos i gat tingting long lukluk gut na kamapim ol progrem em bai inap long helpim komyuniti sapos ol i yusim skaut asosiesen.



**Ol disebel woka...Ol dispela lain man na meri i bin stap insait long wanpela wok-sop long Rabaul las mun. Long dispela woksop, ol i skul long pasin bilong wok kwiktaitim na helpim ol disebel pikinini. Bihain long kos ol i kisim setifiket na soim ol nau i stap. Ol i save stap wok nabaut long Is Nu Briten provins. Foto: Nelsie Giraur.**

## Ol kindagaden tisa kamapim pinis skulbuk

KINDAGADEN Long Ples em i wanpela kain skul bilong ol liklik pikinini long Madang.

Long dispela skul, ol tisa i save lainim ol liklik pikinini long pilai, singsing, stori, aksasais, pilai drama, pilai papet, wokim ol samting long han, droim piksa, toktok, skulim ol liklik pikinini long Tok bilong God na tu redim ol liklik pikinini long go long skul.

Ol tisa i save lainim ol liklik pikinini long mekim planti arapela samting tu.

Orait i no longtaim i go pinis, 4-pela tisa bilong kindergaden Long Ples skul long Madang i raitim wanpela buk.

Ol 4-pela tisa husat i raitim dispela buk em Anastasia, Theresa, Meggie na Robyn.

Insait long dispela buk, i gat kain kain samting ol tisa i ken yusim long skulim na lainim ol pikinini. Dispela buk i toktok tu long wanem ol samting ol pikinini bilong ol Kindagaden skul i nidim.

## Madang drama grup amamasim stret ol Wau

**ARI GUH DANDEE i raitim**

MABORASA Tieta grup bilong Madang i bin kamapim kain kain pilai long amamasim ol pipel bilong Wau long las wik Tunde.

Ol pipel bilong Wau i no amamas tasol na lap. Ol i lainim tu sampela gutpela samting insait long ol pilai em Maborasa Tieta grup i soim long en.

Maborasa Tieta grup i putim kamap ol kain kain pilai long soim na skulim ol manmeri long pasin bilong lukautim bus na graun bilong ol. Na i no long bagarapim ol dispela samting.

Maborasa Tieta grup i bin go long Wau na putim kamap ol kain kain pilai bihainim wanpela askim i kam long Wau Ekoloji Institut.

Menesa bilong Maborasa Tieta grup, Adick Gulali i tok drama grup bilong em i save wok moa klostu wantaim ol papa graun long Madang provins. Na tu long ol arapela hap long soim na skulim ol pipel long rot em ol i ken bihainim long lukautim bus na graun bilong ol.

# Asples bilong tok pisin long Papua Niugini

**CASMIR GIRU i raitim**

INSAIT long kantri bilong yumi Papua Niugini, yumi gat planti kain tok ples na pasin tumbuna.

Long sampela kantri long wol ol i gat wanpela tok ples tasol. Olsem em i isi long ol long toktok wantaim wanpela na narapela. Tasol insait long PNG em i hat tru long ol pipel long toktok wantaim man bilong narapela hap bilong kantri long taim bilong ol tumbuna bilong yumi long bipo bipo tru. I tru olsem tok inglis bilong ol waitman i bin kamap long yumi. Tasol dispela toktok, em bai ol lain bilong go long skul tasol bai save long en, na ol man long ples olsem wanem. Papua Niugini i laki tru long gat dispela Tok Pisin we olgeta man long kantri i save long en stat long ol pikinini, bikpela manmeri na ol lapun tu. Insait tu long PNG tude, olgeta niuspepa ol i prinim long buk bilong ol waitman we ol man i go long skul tasol inap long ridim. Tasol yumi laki tu long Wantok Niuspepa we ol man long

ples tu i gat sans bilong ridim. Dispela em wanpela bikpela samting Pater Frank Mihalic i bin wokim insait long Papua Niugini.

Tok Pisin i bin kamap bipo tru long namba wan hap bilong dispela 100 yia. Dispela tok i bin kamap long tripela tok ples. Dispela em tok inglis, tok jemen na tok Tolai (Kuanua). Dispela i bin kamap long taim ol man bilong Niugini bikples em tupela Sepik provins, Madang na Morobe em ol waitman i bin kisim ol bipo long go wok long ol kokonas plantesin insait long ol hap bilong Rabaul.

Dispela taim ol lain bilong bikples Niugini i no save long ol toktok bilong ol lain Niugini ailan. Taim ol leba i wok, ol i toktok tu long ol tok ples bilong ol yet. Ol Jemen i givim tok ples bilong ol, ol Australia i givim bilong ol na ol Tolai em ol man bilong tok ples tru long olgeta hap. Dispela taim ol i kamap tumas long dispela tripela toktok, na tang bilong ol i save lain long en. Taim ol plantesin menesa i toktok ol i yusim tok inglis bilong ol

Jemen. Dispela i wok long go i go na Tok Pisin i kam long ol dispela tripela tok. Insait long sampela Tok Pisin bai yumi les. Long tok Tolai (Kuanua), yumi gat sampela tok olsem i stap insait long Tok Pisin - tambaran, alip, lagar, bugi na sampela moa. Long tok inglis, yumi gat ol tok olsem - come - kam, swim - swuvim, come here - kam hia, go - go, sleep - slip, night - nait, na planti moa. Na long tok Jemen em swain - suain we planti long lapun bipo i save yusim long tok nogut em i min olsem pik.

Dispela tok i stat long Rabaul namel long ol plantesin leba tasol na i no bin kamap yet long ol ples kanaka. Long dispela taim, Tok Pisin i kamap strong moa namel long ol wokman. Taim ol leba i pinisim taim bilong ol o kontrak, ol i lusim ol plantesin long Rabaul na go bek long ol wan wan hap bilong ol.

Ol lain long Niugini bikples i go bek na stat toktok.



# BISNIS LONG PAPUA NIUGINI

## KOPRA

Pe bilong kopra i go antap nau long K50 long wan wan tan long dispela yia. Pe bilong ol bikipela depo olsem Mosbi, Alotau, Lae, Madang, Wewak, Kavieng, Toboi, Kimbe na Kieta i stap olsem:

Smoke	K250
F.M.S	K250
Hot Air	K255

Na pe bilong kopra long ol liklik depo i stap olsem:

SAMARAI	Smoke	K218
	F.M.S	K220
	Hot Air	K203

KANDRIAN na NAMATANAI	Smoke	K215
	F.M.S	K217
	Hot Air	K220

BUKA	Smoke	K214
	F.M.S	K216
	Hot Air	K219

FINSCHHAFEN	Smoke	K210
	F.M.S	K212
	Hot Air	K215

LORENGAU	Smoke	K205
	F.M.S	K207
	Hot Air	K210

KARKAR	Smoke	K215
	F.M.S	K217
	Hot Air	K220

CMB nau bai i no inap long kisim moa prais sapat long Gavman. Dispela i stat long Janueri 1, 1993.

## KAKAO

PRAIS bilong drai kakao long wanwan tan long Rabaul long Mande inap long Fraide long las wik.

Mande	Tunde	Trinde	Fonde	Fraide
15/8	16/8	17/8	18/8	19/8

Pe ol baiya sasim long papa bilong femetri

K713	K711	K719	K719	K707
------	------	------	------	------

Sapot prais

K500	K585	K585	K585	K585
------	------	------	------	------

Prais ol papa bilong femetri i kisim

K1213	K1296	K1304	K1304	K1292
-------	-------	-------	-------	-------

Sapot prais bilong kakao long dispela mun em K628.95. Dispela prais i no wankain olsem pe bilong kakao long ol narapela hap bilong kantri.

## KOPI

Pe bilong drai arabika na robusta kopi long wanwan kilogrem long Ogas 9, 1993. Dispela i karamapim prais bilong kopi long dua bilong faktori, na i no long sait bilong rot.

Arabika :

Kainantu	K145
Goroka	K147 to 155
Minz na Banz	K135
Hagen	K120 to 135
Lae	K130 to 140
Mumeng	K140
Wau/Bulolo	K0
Madang	K120

Ol ripot i kam long Kopi Industri Kopresen. Mipela i no kisim ripot bilong Kundiawa, Wapenamanda, Mendi, Erap, Aseki, na Wasu.

Robusta :

Is Sepik	K90
Madang	K70

Ripot bilong ol arapela senta husat i save groim robusta kopi i no kamap.

## RABA

Gavien faktori (ESP) - 21V/kg  
Doa faktori (Sentril) - 36 V/kg inap long 39V/kg

## KADAMON

Prais bilong kadamon em A. T. Agri Agency Pty Limited long Madang i tokaut long en i stap olsem:  
Drai long san: K1.40  
Hot Air Drai: Yelo/Wait - K2.25  
Hot Air Drai: Grin - K3.25  
Pikinini Kadamon: K2.50  
Lombo gret wan: K1.60  
Lombo gret tu: K1.40  
Lombo gret tri: K0.80  
A. T. Agri i lukautim Kobum Spice em i stap long Bundi we planti ol kadamon i save kam long en.

## PRAIS BILONG OL BENSIN

Kos long wanpela lita

Ex Pump (wantaim takis)	
Petrol	50.5 toea
Disil	39.3 toea
Kerosin	45.5 toea

# Bisnis bilong Lutheran Sios helpim olgeta pipel

## SANANG ZAZORING i raitim

WANPELA bung bilong Lutheran Sios i sindaun na lukim na skelim wok bisnis bilong sios.

Dispela em spesel komiti Nesenel Sios kaunsil i makim long lukim wok bisnis bilong sios i ran olsem wanem long stat bilong dispela mun.

Ol komiti i makim het bilong bisnis, het bilong Nesenel Sios, sampela distrik lida na ol arapela sios memba i making maus bilong olgeta Kristen manmeri insait long ELC-PNG.

Dispela komiti i painimaut olsem bisnis bilong sios i no save helpim ol Lutheran Sios memba tasol. Dispela komiti tu i lukluk long wanem rot ol Kristen memba inap givim mani long sapatim sios i ken sanap strong long lek bilong em yet.

Planti taim ol pipel i ting Lutheran Siping olsem bisnis han bilong Lutheran Sios i save helpim wok Gutnius. Na ol i no save givim moa mani long mekim wok bilong sios. Dispela komiti i glasim na lukim olsem sios bisnis i save helpim ol pipel olsem wanem, na bisnis i save givim wanem hevi long sios.

Hia em sampela wok dispela bung i painimaut.

**Profit bilong Sios bisnis i givim sosol sevis**

Ol pipel bilong Papua Niugini i

mas save nau olsem, olgeta winmani bilong Lutheran Siping i save go long helpim ol pipel long rot bilong ol sosol sevis. Ol sevis olsem helt, edukesen na bisnis sevis olsem wok egrikalsa, ples balus, waia bris, rot na ol arapela projek long ples.

Tasol wanpela mani bilong bisnis i no save helpim wok bilong Gutnius olsem trenim ol pasto, baim ol pasto na evanjelis wantaim ol arapela wok bilong sios. Long wanem, gavman i putim tambu long sios i mas yusim mani bilong bisnis long sosol sevis tasol.

Bisnis bilong sios i helpim ol arapela sios olsem wanem? Dispela rot em i klia.

Wanem hap Lutheran Sios i gat ol komyuniti na haikul-maski em i skul bilong Lutheran Sios, pikinini bilong ol kain kain lotu tu i save kisim save long en. Wankain long ol koles, ol nasing skul na haus sik bilong sios. Long dispela as, Lutheran Sios i lukim olsem em i sanapim mak bilong helpim olgeta pipel bilong Papua Niugini.

Bisnis i save helpim ol kampani na gavman tu. Lutheran Siping i save karim kago bilong ol kampani, karim kain kain manmeri i go i kam, na bisnis i givim wok long kain kain manmeri bilong ol arapela lotu tu. Em i save karim ol wokmanmeri bilong ol arapela lotu tu long go i kam na mekim



• Ol bikman bilong Lutheran sios i sindaun na paitim tok-tok long lukluk na skelim wok bisnis bilong sios.

wok bilong ol.

Bung i tok tu olsem, i gat bikipela wok bilong skulim ol manmeri i stap long kliaim ol long givim ofa i go long wok bilong sios. Planti taim kranksi tingting bilong ol pipel i save kamap na ol i sutim tok long Lutheran Siping na i no save givim ofa long wok sios. Pasin bilong wok stuadsip tu i mas kamap strong long skulim ol long lukautim gut wanem samting ol i gat na givim wok.

Planti taim ol sios wokman yet i save givim giaman skul long ol manmeri na ol i save kisim kranksi tingting. Olsem na ol i no save givim ofa.

Long wanem ol pipel i save tok, sios i gat bisnis olsem na yumi no ken givim. Tasol long nau, ol pipel i ken save olsem winmani bilong sios bisnis i no save mekim wok Gutnius. Em i save givim sosol sevis tasol.

# Niugini Maining redi long salim ol sea

## RUDOLF AYU i raitim

NIUGINI Maining Limited (NML) i redi nau long salim ol sea bilong ol.

Na ol i tokaut olsem ol i makim pinis wanpela kampani bilong Australia long stap olsem edvaisa bilong ol long wok bilong salim ol sea bilong kampani.

Long las wik Fonde, Niugini Maining i mekim dispela tok save long Australia Stok Eksens, wanpela bikipela bisnis ples bilong lukluk long wok bilong ol kain kain bikipela kampani na tu ol kampani i save baim sea long dispela hap.

Siaman bilong Niugini Maining, Geoff Loudon i tok ol i makim BZW (Australia) Limited long kamap olsem edvaisa na andaraita bilong ol. Andaraita em wok bilong lukautim ol sea na tu dispela wok i min olsem sapos Niugini Maining i painim hevi, ol andaraita bai helpim ol long baim ol sea sapos ol kampani o pablik i no baim olgeta sea.

Nau yet, ol i wok long redim ol wok pepa bilong dispela agrimen. Tasol Mista Loudon i tok ol i wok long redi nau long salim ol sea sapos gavman bilong Papua Niugini i givim Spesel Maining Lis long ol join venja kampani husat i

wok nau long Lihir.

Niugini Maining em i wanpela bilong ol dispela kampani husat i bung wantaim long wokim Lihir Join Venja.

Niugini Maining i mekim dispela agrimen wantaim BZW bikos ol i wetim tasol tok save bilong gavman bilong Papua Niugini husat i ken givim tok orait long Niugini Maining long baim 16 pesen bilong ol wok bisnis bilong Lihir projek.

Ol sampela ripot i tok klostu bai gavman i painim wanpela patna bilong wok wantaim Kennecott, RTZ na gavman bilong Papua Niugini long Lihir projek.

# Nupela stail bilong wokim saksak kamap long Kikori

OL PIPEL bilong Kikori long Galp provins i wok long lainim wanpela nupela stail bilong wokim saksak. Na planti manmeri long dispela hap i wok long soim bikipela laik long dispela stail.

Dispela nupela we bilong wokim saksak i kam yet long Malesia. Na dispela stail em ol i save yusim wanpela samting i gat ol tit olsem ras fail.

Bipo tru long Kutubu, ol manmeri bilong dispela hap i save yusim kain kain samting long paitim na wasim saksak. Sampela i save yusim ol samting olsem ston o paip bilong katim o paitim saksak.

Ol dispela hatwok bai pinis nau

long dispela eria, bikos i no long taim tumas, Yunaited Nesens i bringim kamap dispela nupela stail wantaim helpim bilong Kutubu Join Venja.

Dispela samting ol i kolim rasp em ol i wokim long hap plang na ol i nilim planti nil klostu klostu long mekim kamap dispela nupela tul.

Long sampela hap bilong provins, olsem long Sepik na Madang, ol i wok long yusim dispela stail tude.

Long hap bilong Malesia na Indonesia tu i save yusim dispela stail na dispela stail i wok long kamap strong bikos dispela nupela samting i ken mekim sak-

sak igo liklik olgeta na isi long wasim.

Taim wanpela saveman bilong wok gaden na kaikai bilong Unaitet Nesen, John Cecil i bringim kamap dispela nupela aidia long Kikori, planti manmeri i bin kamap long lukim em long kisim save long dispela samting.

Tasol wanpela bikipela samting we dispela tul i halivim long kamapim em long planti saksak yu ken kisim taim yu wasim ol pipia bilong saksak yu wokim wantaim dispela ras.


Nau yet ol i wok long mekim ol arapela tes long dispela nupela tul.

## PE BILONG AIR NIUGINI LONG PNG TASOL

KISIM LONG I GO LONG	PE BILONG	PE BILONG
	BALUS	KAGO
POM	Alotau	K101
POM	Daru	K117
POM	Goroka	K114
POM	Hoskins	K140
POM	Kavieng	K234
POM	Kundiawa	K113
POM	Lae	K96
POM	Madang	K129
POM	Manus	K206
POM	Mendi	K136
POM	Misima	K155
POM	Mount Hagen	K132
POM	Popondetta	K58
POM	Rabaul	K187
POM	Tabubil	K189
POM	Tari	K153
POM	Vanimo	K234
POM	Wapenamanda	K141
POM	Wewak	K180

Ol kago em hevi abrusim 16kg bai gat pe

## Exchange Rates



Bank buys at:	Notes	T/T
Australia	1.5968	1.5638
USA	1.0471	1.0191
UK	0.6913	0.6646

Bank sells at:	
Australia	1.5528
UK	0.6514
USA	1.0111
Solomon Islands	3.1980
China	5.7687
Fiji	1.5399
Hong Kong	7.7667
India	31.059
Japan	104.23
New Zealand	1.8218
Philippines	27.895
Singapore	1.6049
Switzerland	1.4204
Germany	1.6157
Gold rates (In US\$):	
per ounce	\$350.38
per gramme	\$11.27



# Hevi kamap nau long skul bilong ol meri Sissano

## ARI HABA i raitim

PLANTI sumatin bilong Sissano Gels Vokesenel Senta long Wes Sepik provins i no save sapos ol bai go bek long skul long neks yia o nogat.

Long wanem ol papa bilong graun em skul i stap i laik kisim bek graun. Ol papa graun i laikim Katolik misin i givim bek graun bilong

ol wantaim olgeta arapela samting on i stap antap long en olsem ol klasrum.

Dispela hevi i kirapim tingting bilong skul bod long sindaun wantaim ol papamama bilong paitim toktok long painim nupela graun ken bilong kirapim skul. Na yet ol i no save ol bai putim skul long we sapos ol papa graun i tingting strong long kisim bek graun.

Sissano Gels

Vokesinela Senta i bin stat long 1992, na nau em i namba tu yia bilong ol. Dispela skul i gat 30 sumatin. Ol i bin kirapim skul bihain long Katolik Edukesen Bod na Edukesen Dipatmen i givim tok orait long.

Tingting bilong kirapim vokesenel skul em long helpim ol meri husat i lusim skul long gret 6 na i no go long haikul. Ol dispela meri i ken lainim sampela samting em bai helpim

ol long taim ol i marit.

Tasol nau dispela hevi bilong graun bai stapim tru planti yangpela meri, na ol bai stap nating long ples. Planti skulmeri i no klia sapos ol bai stap na pinisim skul gut o nogat.

Nau yet pater husat i lukautim Sissano peris, Pater Giles i laikim ol papa bilong graun long givim K8,000 long misin. Dispela em long baim ol samting bilong misin i stap antap long graun.

Sissano Vokesenel Skul instrakta, Jenat Kelwei i tok ol sumatin bilong em i wari tru long harim dispela toktok. Em i tok planti i bin amamas tru taim ol i go skul bikos ol i lanim planti gutpela

samting bilong helpim ol long taim bihain. Em i tok skul i helpim pinis planti yangpela meri long dispela tupela yia. Na ol i bin tingting strong long helpim moa yangpela bilong Sissano.

## Bikpela konpemasio lotu long Mosbi

LONG Sande namba 5 de bilong dispela mun, ol Katolik manmeri bilong Gerehu Peris i bin holim wanpela bikpela misa ausait long Sen Charles haus lotu.

Dispela misa em bilong givim sakramen bilong konpemasio long 130 gret 6 pikinini bilong Sen Pols komyuniti skul na tu longsampela yangpela manmeri.

Asbisop bilong Mosbi asdaiosis i go pas long dispela misa. Na Pater Francis Tilo bilong lain MSC i bin helpim em. Moa long 600 manmeri na pikinini i kamap long dispela misa. Planti arapela manmeri tu i bin kam long ol arapela peris.

Long toktok skul bilong Sir Peter Kurongku, em i tok long dispela misa, yumi bung na tenkim God long ol dispela pikinini i laik kisim konpemasio na askim God long givim Spirit long strongim yumi na kamap fri long ol kain kain pasin nogut bilong


graun long no ken bagarapim bilip bilong mipela.

Na long ol lain bilong kisim konpemasio, em i tok long baptismo yupela i no bin save. Yupela i pikinini yet na papamama i bin askim sios na sios i givim long yupela. Tasol long konpemasio, yupela yet i askim sios long givim yupela nau.

Na yupela i save long wanem samting em yupela i laik kisim. Yupela i mas sanap strong long bilip bilong yupela em Katolik Sios i givim long yupela skruim i go long ol narapela manmeri na kamap gutpela Katolik manmeri long taim bihain.

Sir Peter i amamas tru long dispela taim bikos em i tok dispela em i namba wan taim insait long asdaiosis bilong Mosbi long kisim bikpela namba bilong ol manmeri i kisim konpemasio.

Em i tenkim ol pikinini na ol papamama na ol tisa.



• Sampela seken yla studen bilong Sissano Girls Vokesenel Senta i sanap wantaim tisa bilong ol, Janet Kelwe ausait long wanpela klasrum bilong ol. Ol i no klia nau sapos ol bai skul yet o nogat long 1994.



• Ol yangpela i sindaun na redi tasol long kisim blesing bilong konpemasio long Sen Charles haus lotu long Gerehu las Sande.

Poto na stori: Steven Rex.

## Tupela skul holim wanbel bung long Divain Wod

### DANIEL MONA i raitim

BIPO Madang em i wanpela gutpela liklik taun insait long kantri. Na hevi bilong lo na oda i no bin bikpela tumas.

Tasol nau, Madang i no moa olsem bipo. Planti pipel i lusim ples na provins bilong ol na i go stap long Madang. Na dispela i mekim hevi bilong lo na oda i kamap bikpela moa.

Provinsal Plis Komanda, Sief Inspekta Robert Kalasim i

mekim dispela toktok long haus lotu bilong Divain Wod Institut (DWI) long Madang.

Komanda Kalasim i mekim dispela toktok taim ol sumatin bilong DWI na Madang Teknikel Koles (MTC) i holim wanpela wanbel bung na sekan bihainim wanpela hevi em i bin kamap namel long ol.

Komanda Kalasim i tok ol sumatin i mas save olsem ol bai

kamap olsem ol lida bilong dispela kantri long taim bihain. Olsem na ol i no ken kisim lo i go long han bilong ol yet.

"Ol manmeri husat i kam na stap long Madang i mas lukautim gutnem bilong Madang. Na ol i mas lukautim taun na no ken bikhet nabaut long taun," Sief Inspekta Kalasim i tok.

Ol sumatin bilong DWI na MTC i holim dispela wanbel na bel isi bung bihain long wanpela pait em i bin kamap namel long ol.

# Winfield Cup Rugby League Finals



SAT 11/9	MAJOR SEMI FINAL	3.00PM - 5.00PM
SUN 12/9	MAJOR SEMI FINAL	3.00PM - 5.00PM
SUN 19/9	FINAL	3.00PM - 5.00PM
SUN 26/9	GRAND FINAL	2.00PM - 5.00PM



Sponsored by:



Air Niugini



BOROKO MOTORS



SEETO KUI GROUP OF COMPANIES



PACIFIC INSTANT MILK





KANAGE i bilong Menyama long hap bilong Morobe provins. Na em i gat wanpeala liklik redio. Wanpela taim ol wanpin bilong Kanage i pait wantaim ol pipel long wanpela ples i stap klostu long ples bilong Kanage. Pait i go kamap bikpela tru na lain bilong Kanage i ranawe i go long bus na hait. Kanage tu i pret na kisim liklik redio bilong em na tekov i go long bus. Em i go na hait long as bilong wanpela bikpela diwai na sindaun i stap. Kanage i no bin stapim redio. Redio i wok long toktok yet taim em i lusim ples na ranawe i go long bus. Taim em i sindaun long as bilong dispela bikpela diwai, em i harim redio i toktok. Em nau Kanage i kirap na tokim redio bilong em: "Olsem wanem ya. Yu no inap long pasim dispela liklik maus bilong yu. Yu no save olsem i gat bikpela hevi na mitupela lusim ples na kam hait long hia?" Tasol redio i wok long toktok yet. Na tu kain kain singsing tumbuna i kamap long redio. Kanage i pret olgeta bikos no gut ol birua i harim redio i toktok na bai ol i go painim husat tru i wok long toktok. Na ol bai kilim em. Kanage tingting i go no gat na tokim liklik redio bilong em: "Yu harim. Em las toktok bilong mi nau. Sapos nau yu no pasim dispela liklik maus bilong yu, mi bai lusim yu long hia na i go painim narapela hap na hait. Sapos ol birua i kam kilim yu, no ken ting olsem mi bai wari na kra i long yu. Na tu mi bai i no inap long wokim kastam pasin na givim liklik wansiling i go long ol lain tumbuna na kandre long ples." Em i tok olsem na lusim redio na tekov i go long painim nupela hap long hait.

Lorraine Godfrey  
Boroko, MOSBI

□ KANAGE i maritim wanpela meri Goroka. Na tupela i gat wanpela dok. Nem bilong dispela dok em Sex. Ol i stap long Goroka i go na ol i go holide long Mosbi. Taim ol i kamap long Jacksons ples balus, ol i kalap long wanpela, teksi na go long Pot Mosbi Travelodge hotel. Ol i go kamap na Kanage i tokim wanpela wokman bilong hotel: "Bras, mi laikim wanpela eakondisen rum bilong mi wantaim meri bilong mi. Na wanpela spesel rum bilong Sex." Man ya i harim olsem na kirap tokim Kanage: "Olgeta rum long hia i gat eakondisen. Na tu i bilong sex." Kanage kirap na tokim man ya olsem: "Yu no klia long wanem samting mi toktok long en. Sex i save lukautim mi go tulait." Man ya kirap na bekim "Mi tu bos."

Yahetomo Andrew,  
Burns Peak, MOSBI.

## Meri kamapim dai long tupela brata

BIBO, bipo tru long wanpela liklik ailan long hap bilong Not Solomons provins i gat tupela brata i stap.

Papamama bilong tupela i dai na tupela yet i save stap. Dispela tupela manki i no gat gaden. Dispela ples i no gat ol arapela man i stap long helpim tupela.

Wanpela taim tupela i lusim haus na go raunim ailan. Tupela i kamap long arapela sait bilong ailan na lukim wanpela liklik ailan namel long solwara. Dispela liklik ailan i gat wanpela haus tasol i stap.

Tupela brata i tanim bek na go long haus bilong tupela long kisim kanu. Tupela i pulim kanu i go daun long nambis na pul i go long ailan. Taim tupela i kamap long ailan tupela i pulim kanu i go antap. Na bikpela brata i tokim liklik bilong em long stap na was long kanu.

Bikpela brata i go long haus na lukim wanpela lapun man i stap. Na em i tokim em olsem, em i hangre na painim kaikai. Lapun manki singautim dispela yangpela boi i go insait na givim em sampela kaukau long kaikai.

Bihain bikpela brata i askim em long sampela abus. Na



bikman i tok, em i no gat abus. Tasol em i kisim dispela kaukau bilong boi ya na putim kus bilong em antap na givim em long kaikai.

Dispela yangpela boi i no wari na mekim save stret long kaikai kaukau wantaim kus bilong lapun. Taim em i pinis, em i tok tenkyu long lapun na lusim em.

Tasol bipo long em i lusim haus, lapun man i tokim em olsem em bai bungim sam-

pela samting long rot. Na em i tokim em long kisim i go long haus.

Boi nogut i lusim haus na wokabout i go bek long liklik brata bilong em. Em i wokabout yet long rot na lukim wanpela kum katim meri i sanap i stap. Dispela meri i luk narakain tru na em i smat tru. Boi ya i go na holim pasim meri ya na kisim em i go long liklik brata bilong em.

Liklik brata i lukim na askim wanem em i bin kisim dispela meri. Em nau bikpela brata i strong long olgeta samting em i mas mekim taim em i kamap long haus bilong lapun.

Baga, i lusim tupela na wokabout i go long haus bilong lapun. Lapun i givim em kaikai wantaim kus. Tasol taim dispela liklik brata i wok long kaikai em i tromoi sampela i go daun em i no pinisim olgeta kaikai. Na taim em i pinis long kaikai em i no tok tenkyu long lapun.

Liklik brata i lusim haus na wokabout i go bek long nambis. Taim em i wokabout yet, em i lukim wanpela kaskas meri i sanap long rot. Em i lukim dispela meri na sutim meri ya long ston na ronim em i go.

Liklik brata i go kamap long nambis na pait wantaim bikpela brata bilong em. Tupela i pait i go na bikpela brata i salim meri bilong em i go bek. Tupela i mekim save yet long pait na bikpela i kirap na kilim liklik brata bilong em. Bikpela brata i wari long brata bilong em na kilim em yet.

Dispela stori i kam long Buka Ailan.

## Olgeta bekim stap long ol tingting bilong pas

Dia Laiplain,

Taim mi pinisim skul, mi bin kisim wanpela hap setifiket pepa. Maski ol mak bilong mi long skul i no bin gutpela tumas, mi painim wok.

Nau mi wok wantaim wanpela gavman dipat men. Mi marit na i gat ol pikinini. Mi save lukautim ol wantaim planti arapela wantok. Tasol dispela i givim mi moa hevi. Pe bilong mi long potnait i no bikpela na mi save no gat mani bilong putim long beng.

Ol narapela lain

husat em mipela i bin skul wantaim i gat ol bikpela wok. Na pe bilong ol tu i bikpela.

Tasol pe bilong mi em i stap wankain yet. Mi tingting long lusim ples na go wok long narapela provins. Olsem bai mi inap lusim ol dispela lain wantok bilong mi. Tasol dispela i no gutpela bikos em i min bai mi stat gen long olgeta samting.

Mi laik wok wantaim ol praivet kampani, tasol mi harim ol stori olsem kain helpim em ol i save givim i no gutpela tumas. Bilong

pablik sevis em i moa gutpela.

Na tu sapos mi lusim ples, mi no inap stap long planim tupela lapun bilong mi taim ol i dai. Bai mi wokim wanem tru?

PRESSURES  
Dia Pren,

I luk olsem ol wantok i save givim yu bikpela hevi tru. Yu inap putim bikpela mani long beng sapos yu no tromoi sampela bilong helpim ol.

Bilong wanem na ol i stap wantaim yu? I luk olsem ol dispela lain wantok i no wok, tasol ol i stap na kaikai mani bilong yu. Tasol bilong wanem tru na ol i stap wantaim yu?

Long pasin tumbuna, wanpela man i mas helpim ol wantok bilong em taim ol i nidim helpim. Tasol bihain, ol i mas baim em bek.

Olsem na ol dispela lain wantok bilong yu bai bekim hatwok bilong yu o ol i lesman na i wok long pinisim tasol mani bilong yu? Yu bin traim toktok wantaim ol long dispela hevi yu gat tu o nogat? Na yu bin askim ol long wanem as tru na ol i kam stap wantaim yu o noqat?

Namba tu hevi bilong yu em yu yet i no kisim namba long wok hariap olsem ol wanskul bilong yu. Ating dispela i kamap bikos ol dispela lain i bin kisim gutpela mak long skul.

Ating yu inap senisim dispela sapos yu traim kisim sampela ekstra kos. Yu bin traim toktok long dispela wantaim trening opisa o bos bilong yu tu o nogat?

Long wankain taim, mipela mas luksave olsem i no olgeta man bai kisim namba na biknem long wankain taim tasol. Nogat. Ol arapela i mas wet sampela taim inap sans bilong ol i kamap. Tasol narapela rot bilong kamapim dispela em long kisim moa ekspiriens na save long wok.

Long pas, yu tokaut tu long sampela rot em yu inap stretim dispela hevi. Wanpela bikpela rot em long lusim ples na go wok long narapela provins. Na dispela bai daunim tru hevi bilong ol wantok em nau yu gat long en, olsem na yu mas tingim dispela gut pastaim.

Tasol long wankain taim, yu ting olsem taim yu go long narapela hap, yu bai stat

gen long daunbilo na go antap. Mipela tu i no klia tumas bikos dispela i tru o nogat.

Inap long yu traim toktok wantaim bos long salim yu go mekim wankain wok bilong yu long narapela provins o nogat? Bikos dispela em i isi na i wankain tasol. O nogat, yu traim aplai long wanpela bikpela wok long narapela provins.

Yu bin wari tu long tupela lapun. Bikos taim ol i dai, yu i no inap stap klostu long planim ol.

Tasol dispela ating i no tru. Bikos yu inap kisim spesel lip kwiktait tru na go bek long ples bilong planim ol.

Yu bin toktok tu long traim painim wok wantaim wanpela praivet kampani. Tasol i luk olsem yu no traim mekim dispela yet. Sapos yu gat laik tru long dispela, orait, em i mobeta yu traim aplai long sampela wok em ol kampani i putim long niuspepa. Nogat, yu ken raitim pas o ringim ol kain kain lain na askim sapos ol inap long kisim yu.

MI Laiplain.



Buka slip sore...Olgeta wok na laip long Buka allan long Not Solomons provins i wok long go gut gen isi isi. Na long bris bilong Buka, ol sip tu i wok long go pas bilong kisim kopra na bringim ol arapela kago i go long allan. Long dispela wiken, bikpela bel isi bung bai kamap long Siwal. Foto: Aloysius Sami.

Salim ol hevi na wari bilong yu i kam long LAIPLAIN, P.O. Box 6047, BOROKO, N.C.D. Yu ken toktok wantaim mipela tu long telipon namba 26 0011. Mipela i no inap autim trupela nem bilong yu long hia.



# WANTOK

NIUSPEPA BILONG OL PAPUA NIUGINI STRET

# PABLIK NOTIS

Sapos yu laik advertais, telepon 25 2500 na askim long

PH: Miri Aiori Ext. 203  
John Iagata Ext. 232  
Kosinto Fosagu Ext. 216  
Vetovo Maguli Ext. 215

## FRI BAIBEL KOS YU KEN KISIM SKUL LONG SALIM PAS

Salim num na edres long:  
WORLD BIBLE SCHOOL, Dept. PNG4  
P.O. Box 9346, Austin, TX 78766 USA



## 1993 MOROBE PROVINSAL EGRIKALSA SO

### OL SINGSING

MOROBE SOSAITI BILONG OL TUMBUNA DANIS

wantaim

#### MOROBE PROVINS EGRIKALSA SOSAITI

I laik tok save olsem nominesen fom bilong ol Grup, ol Skul o wanem ples insait long Morobe Provins wantaim ol Grup i makim ol arapela ples long PNG husat i stap long Lae i redi pinis. Dispela tok save i go long ol lain husat i laik stap insait long 1993 Lae So. Olgeta fom i stap wantaim Kodineta bilong So. Long kisim wanpela nominesen fom, salim pas i kam long adres i stap daunbilo o ringim mipela long telipon namba ya

**LAE SO BAI KAMAP LONG NAMBA 30 na 31 de BILONG MUN OKTOBA.**

Kodineta, Tumbuna Danis,  
Lae So 1993, P.O. Box 222, LAE.  
Telipon: 42 6908 Fax: 42 5141



### Tok save: KOPI SAPOT PRAIS GO DAUN

Kopi Indastri Kopresen i laik tok save long olgeta kopi groa, ol fektori na lain husat i save salim kopi i go long ovasis olsem sapot prais em Kopresen i save givim nau i go daun. Dispela i kamap long wanem liklik senis i bin kamap long strongim ol F.O.B. prais bilong kopi long las tripela mun.

Stat long namba wan de bilong mun Septemba, sapot prais long olgeta kopi em i lusim PNG bai stap long mak bilong K1 long wan wan kilogrem grin bin na 75 toea long wan wan kilogrem kopi em i kamap long dua bilong fektori.

Kain F.O.B. prais nau long Lae i soim gutpela mak long wanem samting nau i kamap long Wol maket. Olsem na dispela mak bilong 15 toea sapot prais em Kopresen i rausim i no inap kamapim bikpela senis long ol maket insait long kantri.

**DAVID FREYNE**  
Ekting Sief Eksekyutiv.



# 1993 KRISMAS PAS

Dispela tok save i go long olgeta lain husat i laik salim ol pas i go long ovasis long Krismas 1993. Olgeta pas bilong go long ovasis i mas go insait long ol bokis long ol dispela Pos Opis long Nesenel Kapitel Distrik, Lae, Rabaul, Goroka na Hagen bihainim ol de i stap long bokis daunbilo:

PAS BILONG GO LONG	PUTIM LONG				
	NCD	LAE	RABAU	GOROKA	HAGEN
Australia na New Zealand	2 Novemba	9 Novemba	1 Novemba	2 Novemba	2 Novemba
United Kingdom, Germany na Europe	3 Septemba	13 Septemba	10 Septemba	10 Septemba	10 Septemba
Ol narapela kantri, USA, Canada na Asia	24 Septemba	28 Septemba	17 Septemba	24 Septemba	24 Septemba

#### Tok save:

- ☐ Senis inap kamap long ol dispela de sapos ron bilong ol sip i senis
- ☐ Husat ol lain i laik salim ol pas long ol narapela ples em i no stap long lista i ken toktok wantaim ol wokman long Pos Opis bilong ol.
- ☐ Tingim, Post PNG i gat planti kain kain envelop, pasol, beg na bokis bilong pulimapim ol samting gut na salim. Olsem na askim tu long dispela servis long Pos Opis em i stap klostu long hap bilong yu.

**Post PNG**  
MIPELA I SAVE GO OLSEM ROCKET



**WANTOK**

NIUSPEPA BILONG OL PAPUA NIUGINI STRET

**PABLIK NOTIS**

Sapos yu laik advertais, telepon 25 2500 na askim long

PH: Miri Alori Ext. 203  
John Iagata Ext. 232  
Kosinto Fosagu Ext. 216  
Vetovo Maguli Ext. 215**TOK SAVE**

Dispela tok save i kam long 16 strong-pela lain pipel bilong Australia husat i laik kam na lukim stret laip bilong PNG insait long ples. Ol i laikim ol haus pasindia bilong ples long givim ol moa tok save long wanem kain sevis ol i save givim, kain progrem ol i gat long en na ol samting olsem bilong amamasim ol turis. Ol dispela lain pipel bilong Australia i laik lukim tru tru PNG laip, raun long PMV ka, go long kanu na wokabaut brukim bus nabaut. Mipela bai amamas long kisim dispela kain tok save i kam stret long ol grasrut.

Salim pas i go long RICK STEWART long dispela adres: P.O. Box 4014, BOROKO, N.C.D.


**MINISTRI BILONG EDUKESAN  
DIPATMEN BILONG EDUKESAN**
**KARIKULEM DIVELOPMEN DIVISEN****OPEN DE**

Dispela tok save i go long olgeta man, meri na pikinini insait long Nesenel Kapitel Distrik. Long 10 Septemba, 1993, Karikulem Dvelopmen Divisen bilong Edukesen Dipatmen bai holim OPEN DE bilong en. Dispela Open De bai stat long 10 klok long moning na stap i go inap long 3 klok long apinun. Ples bilong holim dispela Open De em long Stendets Biding long Pot Mosbi Insevis Koles.

**Kam na lukim:**

- rot bilong wokim buk bilong ol tisa long yusim na skulim ol pikinini olsem wanem;
- ol man i save raitim, droim piksa na prinim olsem wanem;
- pasin bilong wokim ol skul redio progrem bilong ol pikinini; na
- kain wok bilong televisen stesin bilong yumi.

**INDIPENDEN STET BILONG PAPUA NIUGINI**

Mama Lo i karamapim ol Nesenel Ileksen

Tok orait bilong holim ileksen bilong wanpela memba bilong Nesenel Palamen long kisim wanpela sia em i stap nating.

I go long: Thomas Luaina  
Ritening Opisa bilong Abau Open Ilettret.

Gutde long yu:

Dispela pas i bilong tok save long yu long holim wanpela ileksen bilong makim wanpela Memba bilong kisim sia bilong Abau Open Ilettret nau i stap nating long Nesenel Palamen. Olsem na mi makim ol dispela de bilong holim bai-ileksen:-


1. Salim ol tok save pepa: Ogas 30, 1993
2. Las de bilong kisim ol Nominesen: Spetemba 28, 1993.
3. Taim bilong stat kisim vot: Oktoba 23, 1993.
4. Las de bilong kisim ol vot: Oktoba 28, 1993.
5. Kisim bek olgeta pepa bilong vot: Novemba 1, 1993.

GAVANA JENEREL i mekim olsem bihainim toktok na tok orait bilong Ilettrel Komisen.









*Bungim mani...*Wanpela bikman bilong soka long Madang, Bonny Pongo ong lephan wantaim ol boi bilong em i kukim mit na salim long ol manmeri long pilai graun. Ol i mekim olsem bilong bungim mani bilong helpim Madang tim. *Poto: Ben Taumai.*

• Wanpela risev gret pilala bilong Kallbobo long Hagen i redi tasol long sutim bal long golmak bilong Sunam. Long dispela pilai, Kallbobo i bin winim gem, 7-1. *Poto: Alphonse Pu.*



• Golkipa bilong Blu Kumuls long Hagen husat i bin sevim planti bal tru taim ol i bungim Elcom. Tasol ol pawabol i bin winim pilai, 3-1.

• Mosbi soka (antap) tu i wok long go het, tasol planti man i tok stended bilong pilai i go daun nau.

*PS bilong Nabassa...*Kas nogut ya bilong Nabassa soka klap long Madang i saltim gut tru na banisim birua bilong em long baksait. Kain olsem tasol na Nabassa save wokim ol arapela tim i tingting planti taim ol i bung long fil. Dispela pilai i bin kamap long sampela wik i go pinis. *Poto: Ben Taumai.*



*Buka basketbal resis...*Hevi long Bogenvil allan i wok long pinis isi isi nau. Olsem na ol man tu i go bek long pilai basketbal.

• Hagen Kallbobo risev gret tim i amamas i stap bihaln long ol i autim Sunam, 7-1.



• Sampela ol yangpela husat i save yusim wiken bilong ol long pilai soka na traim bun long soka graun. Madang i gat nem long kamapim planti gutpela nem soka pilala.



• Ol sapota bilong Elcom long Hagen i kamap lukim tim bilong ol i bagarapim ol plisman, 3-1. Soka resis long hap tu i wok long go het strong yet. *Poto: Alphonse Pu.*



**NETBALL PROFILE**



**Name:** Regina Ralai  
**Village:** Paramana, Marshall Lagoon  
**Province:** Central  
**Occupation:** Grade 4 student, St Theresa Community School, Badili  
**Team:** St Theresa Under 13  
**Other Interests:** Swimming & Athletics  
**Favourite Food:** Chicken & Chips  
**Favourite Drink:** Pepsi Cola  
**Favourite senior team:** Telstars  
**Reason:** Because I like their style of play and want to be like them in future.  
**Dislikes:** Gossips and fights  
**Likes:** Good sportsmanship  
**Ambition:** To be a star netballer in future.

Compiled by LIONEL YOGOMIN.

# Namba wan spot de bilong ol pikinini bai kamap long Lae

LONG dispela mun, ol pikinini insait long Lae bai gat sans bilong pilaim ol kain kain gem.

Ol lain bilong Momase Rijonal Senta bilong PNG Spots Komisen bai kamapim ol dispela pilai. Ol pilai bai stat long Septemba 13 na pinis long 15.

Dispela skul holide spots progrem i bihainim tasol

nupela polisi bilong komisen long kamapim pilai bilong ol pikinini.

Spot dairekta bilong Momase rijon, Bruce Bernard i tok dispela em i namba wan taim bilong kain progrem olsem long kamap long Lae. Dispela progrem i bilong olgeta pikinini na i no karamapim ol wanpela lain pikinini tasol. Nogat. Em i

kamap tu bilong sutim bel bilong olgeta tisa, papamama na ol spot tisa long wokbung na mekim em i kamap gut.

Spot developmen opisa, Philip Lavatu bai go pas long dispela progrem. Na ol pikinini husat em krismas bilong ol i stap namel long 8 na 14 yia i ken pilai, maski sapos ol i go skul o nogat.

Lavatu i tok dispela progrem i bilong helpim ol pikini-

ni long luksave long kain kain nupela samting nau i stap long stedium bilong yusim long pilai. Na tu long soim save bilong ol long pilai.

Na em i ting olsem bikpela lain pikinini bai kamap long ol pilai long dispela tripela de. Pilai bai karamapim netbal na volibal long Mande, resis long swim na pilai basketbal long Tunde na atletik long Trinde.

## Moa man kisim pepa bilong wok soka referi

**WINIS MAP i raitim**

MOA long 10-pela man i bin kisim besik soka referi setifiket bilong ol long las wik Fraide. Pastalm long dispela, ol i bin stap long wanpela wik kos.

Spot seksen bilong NCDC i bin go pas long sponsaim dispela kos na askim ol lain long nesenel spot komisen long ranim. Wanpela sinia opisa bilong spot komisin, Scott Vavine i bin ranim dispela kos.

NCDC i bilip olsem spot em i wanpela rot bilong bungim ol yangpela i kam wantaim. Olsem na ol i save traim long helpim long ranim ol liklik kos bilong helpim ol yangpela insait long siti na ol ples i stap klostu long ranim gut kain

kain pilai long ol komyuniti bilong ol.

Planti bilong ol lain husat i kamap long dispela besik referi kos i kam long ol ples i stap

klostu long Mosbi siti. Tasol i gat sampela tu i bin kam long ol ples insait long Sentrel provins. Wanpela sumatin tasol i bin kam long Mosbi soka. Dis-

pela man em Alex. Em i save kik wantaim PS Roots long Mosbi soka. Alex i bin amamas tru bihain long em i pinisim kos bilong em. Em i tok dispela bai helpim em

long traim lukautim sampela kik. Dispela ol lain nau bai redi long wokim level 1 referi kos em NCDC bai ranim sampela taim long neks yia.



• Alex wanpela long ol sumatin husat i bin kisim hap pepa bilong besik referi kos. *Poto Winis Map*

## Sinia kosa bilong Madang sapatim nesenel soka tim bilong Turia

**BEN TAUMAI i raitim**

WANPELA sinia kosa bilong Madang, John Girigo i no amamas long ol toktok em wanpela sinia referi bilong Madang soka i bin

wokim long nesenel soka skwat em nesenel kosa Joe Turia i bin tokaut long em long las mun.

Girigo i tok em i no wanbel long referi Alphonse Magim long ol toktok bilong em. Alphonse i tok dispela

skwat ol i makim em i no gutpela. Na ol i mas makim gen nupela skwat. Magim wantaim tupela sinia kosa bilong Lae, Aron Mungalion na Ludwig Peka kompelen na askim Joe Turia long makim gen nupela tim.

"Dispela kain toktok i bagarapim nem bilong Madang soka. Na Papua Niugini Futbol Asosiesen (PNGFA) bai ting mipela i sapatim dispela tingting," Girigo i tok.

"Mi laikim Magim i pasim maus na stretim em yet pastaim."

Em i mekim dispela toktok bikos Magim i no stretim ol dro bilong Madang soka. Dispela tasol i mekim na klostu soka bai pundaun long Madang.

Girigo i sapatim Turia na tok em i bin yusim save bilong em olsem kosa na makim tim. Na em i askim Turia long no ken harim toktok bilong sampela lain.

Nau yet em i askim Magim long pasim maus na no ken mekim ol toktok long yusim nem bilong Madang soka. Bikos dispela bai kamapim nem nogut long Madang soka.

## PNGFA laik saisim tu ol Lae

i kam long pes 28 tru hamas mani PNGFA i makim long karim wok bilong em long ranim ol tonamen.

Ripot *Wantok Niuspepa* i kisim long Gems Kaunsela bilong Lae, Aaron Mungalion i tok olsem Lae i no inap salim tim bilong em bikos ol klap long asosiesen i sot tru long mahi.

Mungalion i tok planti klap i bin pilai long dispela resis ol i stat holim long sampela mun i go pinis.

Tasol long lukluk bilong em, ol klap husat i resis i no gat bikpela tingting bilong pilai long dispela B&H Gol Lig. Bikos ol i no gat mani.

Em i tok Lae nau yet i pilaim ol gem bilong asosiesen. Ol i skurim taim long ol gem bilong B&H Gol Lig i go bihain liklik.

Mungalion i tok Lae bai pilaim mesa semi fainal bilong em long dispela wiken.

Tupela tim husat bai pilai em Mopi na Westpac. Wina bilong tupela bai bungim Sobou long gren fainel.

Mungalion i tok Lae i tingting long go pilai long nesenel klap sempionsip. Tasol presiden bilong PNGFA i tok sapos ol i no peim rejistresen fi, ol bai no gat sans long stap long nesenel resis.





# Vanimo bringim draipela sem long Wes Sepik nau

**ARI HABA** i raitim

VANIMO soka yia i dai pinis. Ol i no bin statim kik bilong dispela yia.

Dispela i no nupela samting long Vanimo. Klostu long olgeta yia, Vanimo Soka Asosiesen i save bungim hevi. Long las yia, kik resis i no bin pinis gut na ol i no pilaim gren fainal.

Kain pasin asosiesen i mekim i bringim tasol sem long ol yet. Bikos nau yet, ol arapela distrik na sab distrit long provins i wok long holim kain kain pilai. Planti bilong ol i ranim gut kik bilong ol na sampela klostu bai go long gren fainal.

Long sampela distrik olsem Lumi, Nuku, Telefomin, Amanab, Grin Riva na Bewani, ol i mekim save yet long kik. Aitape i bin statim kik bilong ol tasol sampela asua i kamap na ol i stapim pilai gen.

Sapos ol liklik distrik inap ranim gut soka asosiesen bilong ol long distrik level, bilong wanem na Vanimo i no inap kamapim gutpela kik.

Dispela em i wanpela gutpela askim, tasol asua i stap long husat? Ol klap na opisal bilong asosiesen o ol pilai.

Ol klap opisal na Vanimo soka asosiesen opisal i mas bung wantaim na stretim ol toktok.

Tasol long stat bilong dispela yia, ol opisal i no bin wokbung na olgeta samting i bagarap. Olsem na soka i dai olgeta long Vanimo.

I tru olsem kik long ol distrik i wok long go het. Tasol ol tu i gat sampela hevi em ol i painim hat long stretim. Planti referi long distrik i no gat setifiket bilong lukautim kik.

Olsem na provinsal spot opis long Vanimo i mas go aut long ranim ol kos. Planti soka opisal bilong ol distrik ya i tok ol i no save kisim inap helpim i kam long provinsal spot opis.

Taim *Wantok* i askim provinsal spot opisa, em i tok olsem opis bilong em i no gat mani bilong go long ol distrik.

"Spot opis i sot long mani long go aut long ol distrik," Aron Dupnai i tok.

*Mama lek bilong mi ya.....*Dispela pilala bilong Keezhang (Ilephan) i kalkal tit bilong em na putim narapela lek bilong em antap stret long wanpela pilai bilong Rapatona. Susa ya i larim bal i stap namel long lek bilong em na mekim save long birua pilai bilong em. Kain stail bilong ol meri Keezhang i mekim na ol i lus long Rapatona. Rapatona i bin winim dispela pilai 2-0.

# Madang soka no gat dro bilong pilai

**BEN TAUMAI** i raitim

KIK bilong Madang soka i no ran gut. Na klostu tripela wik nau na ol i no holim kik long Madang.

Ol kik long Madang i wok long paul yet bikos planti pilai i no save long taim bilong ol long pilai.

Hevi i kamap long wanem ol i no gat dro long bihainim long taim bilong kik. Planti tim i no save wanem taim ol bai kik, wanem fil ol bai yusim na wanem tim ol bai pilai wantaim.

Dispela hevi bilong redim dro tasol i mekim olge-

ta pilai i paul na klostu tripela wik nau kik i no bin kamap long Madang.

Wanpela sinia kosa bilong Madang skwat, John Girigo i tok ol tim i bin bungim dispela hevi long tupela wik i go pinis. Na wankain pasin i bin kamap long las wiken.

Long las wiken, planti pilai i bin raun nating long ples bilong pilai na wok long wetim ol eksekutiv long go givim ol sampela toktok. Planti i bin raun raun tasol na go bek long haus bikos ol opisal i no bin kamap long fil.

Ol eksekutiv bilong Madang soka i save wokim

dro na givim long wan wan klap opisal. Tasol ol i save wokim long Sarere na dispela i save mekim planti tim i paul. Planti lain i no save redi bikos ol i no save wanem tim ol bai bungim.

Dispela kain pasin ol opisal i mekim i wokim planti pilai na klap opisal i bel het. Na planti i bilip olsem Madang i no inap pilaim fainal bilong dispela yia.

Sampela i wok long askim long tropi bilong las yia na ol i laik save em i stap we tru.

Presiden bilong MSA i bin sik long dispela taim na Wantok i no bin kisim toktok bilong em.

**Biaru redi gen long Independens spot de**

**ARI GUH DANDEE** i raitim

PLES Biaru long Wau distrik i redi pinis long holim kain kain pilai long taim bilong Independens Wiken.


Dispela ol pilai long Biaru bai pulim planti spotman na meri bilong Wau na Bulolo long go na pilai.

Long las yia, planti spotman na meri long Wau na Bulolo i bin go long Biaru na amamas wantaim ol pipel bilong ples.

Na long dispela yia, i luk olsem bai i gat planti samting i kamap winim bilong las yia. Ol opisal i bilip olsem planti man tu bai kamap long pilai. Ol pilai em bai kamap em soka, volibal na basketbal.

Nau yet ol opisal i wokim pinis program na salim i go long ol lain em ol i ting bai kamap long dispela pilai. Ol i bin askim tu distrik spot opis long Wau long salim sampela lain bilong em long go na lukautim ol pilai.

Wanem ol lain i laik stap insait i mas givim nem bilong wanpela tim long olgeta pilai. Ol man bai pilaim olgeta gem, na ol meri bai pilai volibal na basketbal tasol.



• Dispela man i wanpela man i save laik lukim soka long Hagen. Na long las wiken em i sapatim tru ol tim husat i kik. *Foto Alphonse Pu*



# Nesenel B & H sempionsip bai kamap long Indipendens Wiken



• Wanpela lainsmen husat i bin helpim long kamapim gutpela kik long Hagen long las wiken.

## WINIS MAP I raitim

BISINI soka graun long Mosbi bai paia lait stret long Septemba 16 i go inap long Septemba 19. Taim ol soka klap long kantri i kamap long kik bilong Benson na Hedges Gol Lig sempionsip.

Benson na Hedges

smok kampani i bin sponsaim dispela kik na Papua Niugini Futbol Asosiesen (PNGFA) i go pas long lukautim dispela kik.

PNGFA i bin givim sampela mani i go long ol senta husat i afiliet wantaim ol. Na askim ol dispela senta long holim kik bilong Benson na Hedges. Na wanem ol tim i winim

kik long wan wan asosiesen ol dispela klap bai go long gol lig kik long Mosbi long Septemba 16.

Nau yet samting olsem 8-pela senta i tokaut pinis long ol tim husat bai go long dispela kik. Dispela ol senta i bin holim kik bilong gol lig na taim kik i pinis ol i bin tokaut long nem bilong klap

husat i win.

Ol senta husat i givim nem bilong klap i winim Benson na Hedges gol lig em Kimbe (South Coast), Rabaul (PTC), Goroka (PTC), Hagen (Wantoks), Wabeg (Moku), Manus (Pitilu), Madang (Nabasa) na Morobe Kantri (Intuap).

I gat narapela ol senta i tingting tu long stap insait long dispela kik tasol ol i no givin nem bilong tim husat i winim Benson na Hedges gol lig kik. Ol dispela senta husat i no givim nem yet em Kerema, Higitru Oil Palm na Kiunga.

Mosbi i baim pinis nominesen fi long stap insait long kik tasol ol i no tokaut long tim husat bai kik long gol lig sempionsip. Fainal

bilong Benson na Hedges gol lig kik long Mosbi bai kamap long dispela wiken. Bihain long dispela wiken ol bai tokaut wanem tim bai go kik.

Lae tasol i gat hevi olsem na ol i no inap salim tim i go long Mosbi. Lae i no pinisim yet pilaia registresen fi olsem na PNGFA i stopim tim bilong ol long kik long Benson na Hedges gol lig sempionsip.

Narapela samting em PNGFA bai no inap holim nesenel klap sempionsip long Lae. Ol i senisim ples bilong holim dispela kik i go long Rabaul bikos Lae i no baim olgeta pilaia registresen fi i go long PNGFA.

## PNGFA stapim kik bilong 1993 inta rijonal tonamen

PAPUA Niugini Futbol Asosiesen (PNGFA) i stopim pinis kik bilong Inta Rijinol Sempionsip long kamap.

PNGFA i bin makim Septemba 6 na Septemba 8, olsem taim bilong holim inta rijinol sempionsip. Tasol sampela asua i kamap na ol i stopim dispela kik.

Ol i bin tingting long larim 4-pela rijon long stap insait long sempionsip. Ol dispela rijon em Momase, Hailans, Sauten na Niugini Ailan.

Nesenel soka tonamen dairekta, Edris Kumbuwah i tok PNGFA i stopim kik bikos tripela rijon tasol i tokaut long kik. PNGFA i laikim olgeta 4-pela rijon long kik.

Tripela rijon husat i tokaut long kik em Momase, Hailans na Niugini ailan. Ol lain long Sauten rijon tasol i no bin tokaut long stap insait long kik.

Dispela as tasol i mekim ol eksekutiv bilong PNGFA long stopim kik. Mista Kumbuwah i tok, em bai no inap luk gut sapos ol tripela rijon tasol i kik. Ol i laikim olgeta 4-pela rijon long kik na dis-

pela bai wokim kik i kamap gut.

Ol lain bilong Sauten rijon tu i no bin holim wanpela soka tonamen bilong ol tu long makim skwat. Taim PNGFA i tokaut long holim inta rijinol sempionsip ol soka senta insait long Sauten rijon i no bin kibung na tokaut long holim tonamen bilong ol. Bikos long dispela tonamen ol i ken lukluk na makim skwat long makim Sauten rijon.

Long dispela yia ol tripela rijon tasol i bin wok hat tru long holim rijinol sempionsip bilong ol yet. Ol lain long Momase i bin holim gutpela tonamen tru long Madang na makim skwat bilong. Taim ol lain long Hailans i bin holim bilong ol long Goroka na makim tu skwat.

Niugini ailan tu i bin kamapim gutpela kik long Rabaul. Dispela kik bilong ol i bin pulim ol senta olsem Buka, Kavieng, Rabaul na Kimbe. Manus tasol i no bin salim skwat i go long dispela tonamen.

Long dispela rijinol tonamen ol i bin makim ol skwat bilong ol.



## Ol Aitape wes kos bung long Sissano

### ARI HABA I raitim

OL pipel bilong Aitape wes kos long Wes Sepik provins bai holim kain kain pilai long taim bilong Indipendens

Wiken.

Olgeta lain long Aitape wes kos bai go bung long Sissano sab distrik na amamasim Indipendens Wiken bilong ol. Ol ples husat bai kamap long stap

insait long dispela pilai em Malol, Arop, Pou, Romei, Ramo, Warapu, Sera, na Sissano.

Dispela i namba wan taim ol pipel bilong Sissano i holim wanpela bikipela pilai olsem. Na

planti ol pipel long ples i amamas tru bikos ol bai bungim planti ol pipel bilong arapela ples.

Man husat i go pas long stretim ol samting, John Ainep i tok ol komiti bilong em i stretim progrem pinis. Na ol i lukluk tasol long taim bilong dispela pilai i kamap. Ol bai holim kain kain pilai olsem soka, ragbi tas, basketbal na volibal.

Rijonal memba bilong Wes Sepik, John Tekwe i givim pinis K1,000 long helpim ol komiti long stretim samting. Mista Ainep i givim bikipela tok amamas bilong em i go long mista Tekwe long helpim em i givim. Na ol bai askim tu memba long go na tukim dispela pilai.

Ol komiti i bilip bai i gat samting olsem 14 tim long olgeta pilai bikos wan wan ples bai putim tupela tim. Na ol i askim olgeta spot kodineta bilong wan wan ples long givim nem bilong tim.



• Dispela em stail bilong Madang soka. Dispela tupela tim i mekim save stret long kik.





# BENSON & HEDGES SOKA

## Wantok

# MOMASE RIJON INAP TRU LONG SANAP LONG LEK BILONG EM

### JAMES KILA i raitim

SINIA kosa na gem kaunsela bilong Lae, Aaron Mungalion i tokaut olsem Momase rijon i ken sanap strong sapos em i bruk lusim Papua Niugini Futbol Asosesin (PNGFA) na statim asosenen bilong em yet.

Em i tok olsem Momase i gat ol save-man husat i ken karim wanpela federesen bilong ol yet. Dispela asosenen i ken sanap long em yet sapos em i aplai i go long Oseania Futbol Federesen na bihain long intansenel soka bodi, FIFA.

Em i tokaut tu olsem Momase i gat ol pilaia husat i ken pilai long bringim gutpela nem bilong federesen bilong

ol. Mungalion i tok em i no hat tumas long Momase long bruk lusim PNGFA na sanap em yet.

Ol asosenen husat i stap long Momase em Lae, Madang, Ramu, Morobe Kantri, Wewak na Vanimo.

Mungalion i tokaut long dispela bihain long kain kain ol wansait pasin PNGFA i bin mekim. Em i tokaut olsem planti ol wok bilong soka long kantri i wok long go tasol long Mosbi. Na PNGFA i no tingting long ol narapela liklik senta.

Presiden bilong PNGFA, Peter Mommers i tokim *Wantok Niuspepa* olsem dispela ol toktok i no tru olsem PNGFA i wansait long Mosbi tasol. Em i tok i gat ol man ol

i makim husat i stap long ol rijon long kantri long lukautim wok bilong soka long hap.

Mommers i tok long Mosbi yet, tripela man i karim wok bilong soka long hap.


Mungalion i tok em i klia pinis olsem PNGFA na Mosbi i laik karim wok bilong soka long kantri. Dispela i no gutpela tru long developmen bilong dispela gem long kantri.

Em i tok sampela ol asua em taim Mosbi kosa na PNG nesenel kosa, Joe Turia i makim planti pilaia bilong Mosbi long PNG tim bilong go pilai long mini SP Gems long Vanuatu. Na bihain wanpela kosa gen bilong Mosbi, John Davani i kisim planti pilaia meri long Mosbi.

Em i tok olsem long stat bilong 1990, ol resis long Mosbi i bin go daunbilo tru. Ol narapela rijon olsem Momase, Ailans na Hailans tasol i karim nem bilong soka.

Long dispela taim tu i no bin gat wanpela kain pilai o tonamen long sauten rijon. Nogat tru. Tasol nau yet PNGFA i laik givim olgeta wok i go long ol lain bilong Mosbi tasol.

Mungalion i tok Mosbi i save mekim rabis pasin taim em i no singautim ol liklik senta long Papua rijon olsem Tabubil, Daru, Kerema, Popondetta na Alotau long wanpela bikpela soka tonamen. Ol dispela man PNGFA i makim i no mekim wok bilong ol.



• Dispela susa bilong Keezhang i kalap long hetim bal taim birua bilong em long Rapatona i redi tasol long beksalt. Rapatona i win 2-0. Dispela em stall bilong Mosbi soka long las wiken.

## Lae bungim bikpela hevi ...PNGFA i tingting tu long sasim ol Lae pilaia long nesenel tim.

BIKPELA soka senta long Papua Niugini, Lae i no inap salim tim bilong em long pilai insait long ol bikpela Papua Niugini Futbol Asosenen (PNGFA) sempionsip long 1993.

Presiden bilong PNGFA, Peter Mommers i tokaut olsem Lae i no inap pilai long ol bikpela soka tonamen long dispela yia bikos ol i no peim pilaia rejistresen fi. Ol i no bin peim K4 kos bilong wan wan pilaia i go long PNGFA.

Mommers i tok ol pilaia bilong Lae husat i stap long PNG tim tu bai painim hevi. Dispela em bikos ol pilaia ya i no bin rejista pastaim long ol i makim ol.

Mommers i tok olsem sapos olsem wanem, ol pilaia bilong Lae i no inap stap long PNG skwat bilong go pilai long mini SP Gems long Vanuatu.

Em i tok olsem ol i no stretim gut

tok yet long lukluk long ol pilaia. Tasol ol PNGFA opisal bai sindaun na lukluk bek long ol lo bilong ol na mekim fainal tok orait.

Mommers i tok tu olsem Lae i no inap holim dispela nesenel klap sempionsip PNGFA i makim long mun Novemba long Lae. Sempion tim bilong ol tu i no inap stap insait long nesenel klap sempionsip.

Em i tok olsem Lae i bin tok olsem ol bai peim tasol rejistresen bilong ol pilaia husat i stap long wanem tim bai i makim Lae. Dispela em tim husat bai i pilai long B&H Gol Lig.

Tasol Mommers i tok dispela i no gutpela tumas. Bikos em i daunim i go moa long pes 25

Printed and published by Anna Bernadette Solomon, of Bitten Place, Gordons, at Allotment 2, Section 209, Hohola.

**BENSON & HEDGES SOCCER**

### INSAIT

• Lae gat bikpela spot de...p25

• Vanimo bringim sem...p26

• Indipendens B&H sempionsip ...p27

• Madang bin no gat ol wiken soka dro ...p26





# RAGBI

Fonde, Sept 9, 1993

LIG NIUS

## DRIMAN BILONG BABOI BAGARAP



• Em i hapman bilong skelim bia na strongpela dring i go long ol kain kain lain husat i go long Bird of Paradise Hotel long Goroka. Na long ragbi lig, lalibu Yoma bilong Sauten Hailans provins i ful sapota bilong Brothers ragbi lig klap. Olgeta taim long olgeta wiken em Brothers i pilai, dispela man bilong Sauten Hailans i mas stap long fil bilong lukim ol lain bilong em i traim bun. Na wanpela driman bilong em oltaim em long Brothers i mas stap insait long fainal na go olgeta long gren fainal. Tasol long dispela yia, i luk olsem driman bilong em i wara nating nau. Ating stori inap tanim long narapela yia. Long ol arapela hap bilong kantri, i gat ol kain man olsem Yoma tu i stap.

### ... em i no abrusim wanpela gem insait long 11-pela yia

#### SAPE METTA i raitim

BIKPELA tingting bilong ol ragbi lig pilai na sapota em long pilai long gren fainal na winim primiasip taitel.

Dispela tingting bilong win i no save

stap tasol long ol pilai na sapota, ol klap opisal tu i save laikim tim bilong ol long win.

Wanpela long ol opisal em wokman bilong Bird of Paradise Hotel long Goroka, lalibu Yomba.

lalibu em i bilong Sauten Hailans provins tasol em i stap long-

pela taim tru long Goroka na wok long hap i stap. Em i wanpela ful sapota bilong Angco Brothers ragbi lig klap long Goroka.

Long 11-pela yia nau, Yoma i wok long sapotim yet Brothers. Em i no save abrusim wanpela gem, oltaim em i mas stap long lukim

tim bilong em i pilai.

Na long dispela yia taim sisen i stat, em i save go long fil na lukim pilai. Maski em i gat planti wok bilong mekim long wiken, em i save go yet long fil bilong lukim Brothers i pilai.

Tasol long dispela yia, em i bin tingting

planti sapos tim bilong em bai go insait long fainal. Brothers i no kamapim gutpela pilai long stat bilong sisen na em i bin wari planti.

Brothers i bin kamapim pilai bilong ol long namel bilong sisen na i bin mekim rot bilong ol i kam antap long poin lata.

Tasol ol i no strong na i no i go insait long fainal.

"Mipela i bin kisim taim liklik, tasol mipela i kam antap long namba tu na tri raun. Na mi bin bilip olsem ol boi bilong mi bai pilai wantaim Royals long gren fainal.

Tasol samting i no bin go stret long mipela," Yoma i tok.

"Mi bin gat bikpela bilip olsem mipela bai go long gren fainal na win na go stret na pilai long Cambridge Kap. Tasol nau drimman bilong mi i no kamap tru."



**PORT MORESBY**

Grand final

**Results**  
Wests 26 def Air Niugini 16

**Comment**  
No Hassles!!

**RABAU**

Grand Final

**Results**  
Norths 12 def Muruks 10

**GOROKA**

Grand Final

**Results**  
Tarangau 16 def Tigers 6

**Comments**  
Good crowd - trouble free!!

**MT HAGEN**

Grand Final

**Results**  
Tigers 18 def Tarangau 9

**Comment**  
Trouble - free!!



Gut taim pilala bilong Brothers long Madang, Mathias Dayo husat i bin dal upela wik i go pinis.



*Hure long ol...* Walter Taule bilong Wests i kisim Man of the Match prais bilong em long han bilong patron bilong Mosbi Ragbi Futbal Lig, David Unagi. Walter i bin kisim K300 long gutpela pilal em i kamapim na helpim Wests long winim gren fainal las wiken. *Poto: Ivan Bayagau.*




Maski ragbi lig sisen i pinis, ol lokol resis olsem long Goroka nsait long Isten Hallans provins i stap yet. Bikos long hailans, agbi lig em kalkal tru bilong ol man. *Poto: Sape Metta.*



• Ol bikipela lain manmeri husat i brum i go daun bilong lukim pilal long Hagen ragbi lig long las wiken. Nau gren fainal i pinis, ol bal go gen long Cambridge Kap.



**DOWN TO BASICS**



by IVAN RAVU  
Rugby League National Coaching Director

WELL, it is good to hear that clubs and some league representative teams are getting into the right direction to prepare their teams early for the next season. Goroka Lahanis, the Inter City Champions of 1993, are in the swing of things to retain

the Cup in 1994. Several clubs in Port Moresby are already planning for 1993 off-season training towards better team preparations for the 1994 season. Congratulations to Buddy Dou and the Souths Club for achieving an almost per-

fect record of having four grades in the Port Moresby Winfield Cup Competition. Great effort from the coaches, players, managers, sponsors and the supporters. Air Niugini made it in three grade, well done. There are few rule changes in

1994 so coaches, referees and players get your new copy when it is available in late November. The main change is the ten metre rule. Players of the defending team must be ten metres from the play the ball, but the attacking team have to

remain five metres. This will apply in 1994 in Papua New Guinea. The new gloss and colour cover rule book will be with the printers in early October. A rugby leagued Drill manual will also be available in early 1994.



*Antap... Joe Gispe i painin hat long ranawe long takel bilong Robert Muri. Lephah... Oi pilala bilong Air Niugini i hapim wampela pilala bilong Wests.*



• Falvet bilong Air Niugini, Simon Manet (lephan) i salim bal i go long wampela poro bilong em. Tim bilong em i no strong na Wests i winim ol 26-16 long gren fainal.

• Dispela mama i bin amamasim ol manmeri pastaim long gren fainal pilal namel long Westsna Air Niugini.





• Oi risev gret pilaia bilong Souths (lephan) i sekhan wantaim ol pilala bilong Air Niugini. Souths i bin winim risev gret gren fainal 24-22.



• Dickson Lunafe bilong Wests wantaim bal i brukim banis bilong ol bot Air Niugini taim ol i bung long gren fainal las wiken. Oi putpuk i win.



• Kumul kepten Kera Ngaffin i karim i karim fleg na wokabautim raunim Mosbi ragbi lig pilal graun long las Sande.



• Mark Agi i kism prais bilong rana ap Man of the Match prais. Em i bin kism K200 long las wiken. Agi i save pilal wantaim Mosbi Air Niugini.

# Winfield League





**Junia tropi...Kepten bilong anda 19 tim bilong Brothers long Madang i kisim junia Pepsi tropi long han bilong Dadarai Logona bilong Pepsi sofdring. Brothers i bin winim resis bilong anda 19.**  
Foto: Ben Taumai.

## Ol woda sutim nus bilong Royals

### GOROKA RIPOT

#### SAPE METTA i raitim

SEMPION tim bilong las yia, Paragon Royals long las wiken i bin kisim taim stret long Bilati Tarangau taim dispela tupela tim i bung long gren fainal bilong Goroka Winfield Lig long las wik Sande.

Bipo long pilai planti sapota na ol lain i bihainim ragbi lig long Goroka i bilip olsem Royals bai winim pilai. Tasol sampela asua i kamap na Tarangau i win, 16-6.

Presiden bilong Goroka lig, James Korarome i givim bikpela tok amamas bilong em i go long tupela tim wantaim. Bikos tupela i bin kamapim gutpela pilai na wokim olgeta sapota i amamas inap pilai i pinis.

Korarome i givim bikpela tok amamas i go long ol klap opisal na sapota bilong tupela tim. Bikos ol i bin larim pilai i pinis gut wantaim no gat pait o

kros namel long ol sapota. Em i tok dispela i namba wan taim wanpela ragbi lig gren fainal i pinis gut. Lopng planti yia i go pinis ol sapota i save mekim nabaut na ol i save bagarapim pilai.

Tarangau i bin yusim ol yangpela pilaia bilong ol long Sande. Planti bilong ol dispela pilaia i no bin pilai long gren fainal na dispela i bin namba wan taim bilong ol. Tasol ol dispela yangpela pilaia i bin kamapim gutpela pilai tru winim ol ekspirens pilaia bilong Royals.

Wanpela samting i helpim Tarangau long win em ol pilaia i bin wok bung wantaim olsem wanpela tim. Ol yangpela pilaia tu i bin gat bilip long ol yet olsem ol inap stopim ol ekspirens pilaia bilong Royals.

Tarangau i bin kamapim gutpela pilai tru long 15 minit bilong pilai long namba wan hap. Ol i strong banis na mekim Royals i wokim planti

paul na dispela i givim sans long yusim dispela long stopim Royals.

Ol boi Tarangau i bin skoa pastaim long namba wan hap taim Ivan Mosoca i go na skoa. Narapela trai bilong Tarangau i bin kamap sampela minit i go moa long pes 6

long pes 6

#### WINIS MAP i raitim

NORTH Raiders i nupela sempion nau bilong Rabaul ragbi lig bihain long ol i winim NGIP Muruks, 12-10.

Muruks i bin holim primiasip taitel bilong Rabaul Winfield Lig long 6-pela yia olgeta stat long 1987 i kam inap long 1992. Long las wiken, ol i bin pundaun long han bilong Norths. Norths i kamapim strongpela pilai na winim taitel bilong dispela yia.

Long 1984, Muruks i bin go long gren fainal na winim long namba wan taim. Muruks i no laki long 1985 na 1986. Tasol ol i bin holim pas taitel stat long 1987 i kam inap long 1992.

Norths i bin go long gren

# Beon haus kalabus tingting long wokim tim

## MADANG RIPOT

#### BEN TAUMAI i raitim

OL woda plis long Beon haus kalabus i tingting pinis long kirapim gen Tarangau ragbi lig klap na stap insait long Madang Winfield Lig resis long neks yia.

Mausman bilong ol, John Loi i tok ol boi bilong em i gat bikpela laik tru long statim ken Tarangau klap long neks na pilai long

Madang lig resis.

Bipo ol i save pilai wantaim ol plisman na pilai long nem Tarakum. Tasol long las yia ol i bin bungim hevi taim ol plisman i rausim ol long pilai wantaim ol. Na nau planti pilaia bilong ol i pilai wantaim ol arapela klap.

"Mipela i holim ol paiti nabaut pinis long pulim mani long baim tripela set yunifom bilong mipela," Loi i

tok.

Em i tok, ol i salim pinis ol pas i go long ol bisnis man long helpim ol long givim sampela helpim. Ol i bin askim tu sampela kamapim long sponsaim ol long neks yia tasol ol i no kisim bekim yet.

Sampela biknem pilaia bilong Madang long bipo olsem John Aisa, Paiuio na em yet bai go pas long kirapim ken Tarangau klap long neks yia. Ol dispela lain nau bai go pas long ol yangpela blut olsem Lela long strongim Tarangau

klap.

Ol i bin pasim toktok pinis wantaim ol sumatin long Diwai ragbi lig klap joinim ol long neks yia. Ol sumatin bai pilai long risev gret, anda 19 na anda 17. Bikos ol i harim sampela toktok olsem Diwai bai no gat tim long neks yia.

Presiden bilong Madang lig, John Kuk i tok Madang lig bai amamas tasol long kisim ol nupela klap long neks yia.

"Tasol wanpela samting ol i mas mekim em long tok-save kwik long lig eksekutiv." Kuk i tok.

Em i mekim dispela toktok bikos long stat bilong 1993 sisen, Souths i bin tingting long putim tim bilong ol. Ol i bin baim olgeta afiliesen fi bilong ol. Tasol sampela samting i rong na ol i no pilai long dispela yia. I kam inap nau lig i no bekim mani bilong ol tasol dispela hevi i stap namel long ol lig opisal na klap opisal long stretim.

Kuk i tok em i no kisim wanpela pas i kam long Diwai opisal olsem ol bai no inap pilai long neks yia. Tasol em i harim sampela tok win olsem ol sumatin bai no inap pilai.

Ol sumatin i les bikos planti long taim bilong skul holide o prektikol planti pilaia bilong ol i save go aut na sampela tim i save popitim ol. Na dispela i no luk gut tumas.

## Stail bilong anda 19 winim ol A gret

## KIUNGA RIPOT

#### IAN KAKARERE i raitim

OL anda 19 pilaia bilong Kiunga i bin soim gutpela stail bilong pilai winim kain pilai ol sinia gret i save soim.

Gren fainal namel long United na Magani i bin kamap gut tru. Tupela tim wantaim i bin kamapim top klas futbol na planti man na meri i bin amamas long lukim gem bilong ol yangpela. Long dispela pilai United i bin winim Magani 20-16.

Ol yangpela i bin wokim gutpela bal wok tru ol i bin autim bal na larim olgeta pilai bilong ol i tasim bal. Difens bilong tupela tim tu i bin strong tru. Taim ol i takelim birua pilai ol i takel gut na i no mekim ol takel nogut long bagarapim arapela pilaia.

Long fultaim ol pilaia bilong Magani i bin stap bek long fil na sekhan wantaim ol pilaia bilong United. Dispela i bin soim tru pasin bilong ol gutpela spotman na meri.

Planti pilaia bilong dispela tupela tim em ol sumatin bilong Kiunga haikul, Kiunga vokesinel senta na Kiunga bois taun.

Wanpela gret 10 sumatin long Kiunga haikul, Leo Mala i bin kisim man of the match. Mala i bin kikim 4-pela gol taim hap bek Unam Elia i putim tupela trai taim fulbek Ali James i putim wanpela trai.

Long Magani hap bek Clifford Kambaki i bin wok hat tru na putim wanpela trai. Taim faivet Touta lakoe i putim wanpela trai na kepten Maiva John i amamasim 18 birth de bilong em wantaim wanpela trai.

Kosa bilong United Siri Purari i tok junia lig em i namba wan samting long kamapim pilai. Ragbi lig bai kamap gut sapos ol yangpela i save long pilai gut taim ol i yangpela yet.

## Klostu Norths brukim rekot long Rabaul

fainal wantaim Muruks long 4-pela yia olgeta na ol i lus. Stat long 1989 i kam inap long 1992, Norths i bin lus long Muruks.

Tasol long dispela yia, Norths i no larim Muruks i winim ol isi. Ol i gat bikpela tingting tru long win na stapim Muruks.

Tupela tim wantaim i kamapim gutpela pilai tru long sanapim banis na ranim bal. Muruks inap winim pilai sapos Normoyle Eremas i kikim gut tupela konvesen kik.

Norths i bin go pas 12-6 long hap taim. Namba wan trai bilong Norths long namba wan hap i bin kam long kepten, Jessie Alunga. Taim bikpela fowat, Ben Lakur i putim namba tu trai long kisim skoa i go antap long 12.

Muruks i bin kisim penalti kik taim ol pilaia bilong Norths i bin opsait na Eremas i kikim gut long kisim tu poin. Bihain long dispela teksi bilong Muruks, Lipirin Palangat i go na skoa. Eremas i abus long konvesen kik na skoa i stap 12-6 longhap taim.

Tasol bihain long hap taim Muruks i pasim olgeta rot bilong Norths long skoa. Ol i no givim wanpela sans long Norths long skoa inap fultaim. Muruks yet i bin kisim wanpela sans taim risev fowat, Rio Aniu i brukim banis bilong Norths na skoa klostu long sait bilong tupela pos. Tasol Eremas i abrus long kikim konvesen kik.

Pastaim long dispela trai, Palangat i bin das long sait-lain long skoa tasol referi Joel Paak i tok no gat long

dispela trai. Paak i bilip wanpela pilaia i bin wokim fowat pas i go long Eremas.

Na tupela tim i skram na Muruks i winim skram. Bal i kam aut stret long skram na pas long han bilong Aniu husat i das i go long banis bilong Norths na skoa. Tasol Lek bilong Eremas i abrus ken long kikim gut konvesen.

Sapos Muruks i bin kikim gut wanpela konvesen kik ating ol inap dro long fultaim na tupela tim i ken pilai long ekstra taim. Dispela i ken givim sans long Muruks long stopim Norths.

Long ol arapela gret, Norths i bin winim Muruks long gren fainal bilong B gret. PTC Easts i nekim Norths long anda 19 divisen 16-8 taim anda 17 bilong Norths i winim Scangulls 8-4.





*Nokondi stail...Wanpela graunman bilong Asaro husat i bin amamasim ol man long fil pastalm long gren fainal namel long Wests na Air Niugini.*

# Lig kros long rabis pasin bilong ol bisnisman

## MADANG RIPOT

**BEN TAUMAI i raitim**

OL eksekutiv bilong Madang Winfield Lig i no amamas long pasin ol bisnisman long Mandang i bin mekim.

Long Ogas 26, lig i bin holim wanela paiti na askim ol bisnisman long kamap long dispela pati. Tasol ol i no bin lukim wanpela bisnisman i kamap.

Ol lain husat i kamap em ol klap opisal bilong wan wan klap na tupela nesanel memba, Stanley Pil na Peter Yama.

As bilong holim dispela pati em long larim ol bisnisman i toktok wantaim Papua Niugini Ragbi Futbal Lig menesa Martin Adamson. PNGRFL i tingting nau long larim Madang i stap insait long SF inta siti resis long neks yia.

Na Adamson i bin tingting long toktok wantaim ol bisnisman na askim ol long spon-

saim Madang. Tasol long dispela nait, i no gat wanpela bisnisman i kamap long pati.

Madang lig i tingting nau long salim wanpela pas i go long presiden bilong Komes long Madang, David

King long dispela hevi. "Em i no gutpela ol dispela bikpela bisnis long Madang i pulim mani long ol pipel bilong Madang na bihain go na sponsaim ol tim long Mosbi," wanpela opisal i tok.

"Dispela i no gutpela ol kamapni o bisnis i wok long Madang i mas putim ken sampela samting i go bek long provins. Sapos ol i no mekim dispela ol

samting i gutpela long ol long kisim samting na go," dispela opisal i tok.

Mista Pil i bin givim bikpela tok amamas i go long Adamson long givim taim bilong em long go raun long Madang. Na lukim stret long ai bilong em long stended bilong pilai long Madang.

Adamson i tok em i laik lukim Madang i

stap insait long inta siti resis long neks yia. Tasol em i askim ol long painim sponsa husat bai helpim ol.

Narapela samting em i askim ol long baim klap na pilaia afiliesen hariap i go long PNGRFL long neks yia. Long bipo na long dispela yia, Madang i bin isi tru long baim ol klap na pilaia afiliesen fi.

# Mosbi Wests putim ai long Cambridge Kap

**WINIS MAP i raitim**

FAIRDEAL Wests i redi nau long Cambridge Kap salens bihain long ol i winim Coca-Cola Air Niugini 26-16 long gren fainal bilong Mosbi Winfield Lig resis long las wiken.

Wests nau i kisim tiket long pilai long Cambridge Kap resis.

Las taim Wests i pilai long Cambridge Kap em long 1985 taim ol i bin winim kap. Bihain long 1986 i go inap long 1992 Wests i bin painim hat tru long daunim ol arapela tim long Mosbi Winfield Lig reis. Na dispela i bin stopim ol long banisim Cambridge kap em ol i winim long 1985.

Ol i bin go long gren fainal long 1991 tasol Tarangau i rausim tiket bilong ol. Na long las yia Defence i bin winim ol na dispela i bin stopim tru sans bilong ol long pilai long Cambridge Kap.

Tasol long las wiken, Wests i bin kirapim stret das na winim pilai. Long tupela yia i go pinis long 1991 na 1992, Wests i no laki long winim gren fainal.

Longpela taim tru Wests i no go insait long Cambridge Kap na nau ol i bel kaskas tru long winim dispela kap em ol i bin winim long 1985. Long las yia Wests i smelim tasol taim Defence i winim ol long gren fainal. Defence yet i bin winim Mosbi lig na Cambridge Kap gren fainal.

Tasol long dispela yia, Wests i bin rausim Defence husat i bin maina primia. Defence i pilai ken wantai Air Niugini na PX i winim pilai. Dispela nau i bin stopim sans bilong Defence long banisim kap em ol i winim long las yia.

Wests nau i redi tasol long bungim salens bilong ol arapela tim long kisim kap em ol i bin kisim long 1985. Na ol lain bai helpim Wests long kisim bek dispela kam em Gideon Kouoru, Tati Ivara na Danny Moi, dispela ol pilaia i bin stap taim Wests i winim gren fainal bilong Mosbi lig na Cambridge kam long 1985.

Ol yangpela blut olsem Michael Toivita, Obert Bati, Tuksy Karu na Walter Taule bai givim bikpela sapot tru long Wests. Dispela ol lain i bin kamapim gutpela strongpela beklain pilai long Wests long dispela sisen na dispela bai strongim Wests long bungim salens bilong arapela ol senta.



# Ol woda sutim nus bilong Royals

i kam long pes 5 bipo long hap taim. Dispela trai i bin kisim skoa bilong Tarangau i go long 10 na Royals 0.


Long namba tu hap bilong pilai tupela tim wantaim i strong banis na putim wan wan trai. Trai bilong Tarangau

long namba tu hap i bin kam long Michael Mondo. Dispela i bin kisim skoa bilong Tarangau i go long 16 na Royals 0.

Tasol Royals i bin laki long putim wanpela trai long kisim skoa bilong ol i go antap long 6. dispela

tra i bin kam long Stanley Gene na Ferdinand Nogkas i kikim konvesen.

Tarangau nau bai bungim Royals bilong Madang long dispela wik Sande long pilai long raun wan bilong Cambridge Kap em bai kamap long Goroka.



• Dispela em bikpela Cambridge Kap em ol senta bai resis long em. Husat i go long gren fainal na win bai kisim dispela kap. Long las yia Mosbi Defence i bin autim na dispela yia yumi no save husat bai win.

# CAMBRIDGE CUP

## P.N.G. Big League





# THE BIG ONE



## CAMBRIDGE CUP P.N.G. Big League

# First Round Sunday 12th September 1993

NORTH RAIDERS vs NEWTOWN RAIDERS  
(Rabaul) (Buka)

TARANGAU vs TIGERS  
(Minj) (Mt Hagen)

DEFENCE vs SOUTHS  
(Lae) (KUNDIAWA)

TARANGAU vs ROYALS  
(Goroka) (Madang)

TARANGAU vs RAIDERS  
(Mendi) (Wabag)

BYE: PORT MORESBY WESTS  
TABUBIL TARANGAU  
KIUNGA SOUTHS





# 1993 Mosbi taitel indai long Wests

## WINIS MAP i raitim

BIKPELA tingting bilong winim 1993 Mosbi Winfield Lig resis i bin kam tru long Wests taim ol i winim Air Niugini, 26-16.

Wests i bin tingting strong tru long winim gren fainal bilong 1993. Bikos ol i laik bekim dinau bilong 1991 na 1992.

Long 1991 Tarangau i bin winim ol. Na long 1992, Defence i bagarapim gen sindaun bilong ol long gren fainal.

Olsem na long dispela yia, Wests i no laik kisim sem na wokbung wantaim long winim pilai. Wests i bin kamapim gutpela pilai tru long namba wan hap na stapim tru Air Niugini. Long hap-taim, Wests i bin go pas long skoa long 18-12.

Air Niugini i bin opim skoabuk pastaim taim hapbek John Domu i kikim penalti kik. PX i kisim penaltim taim fulbek bilong Wests Wesley Paul i no holim gut bal na bal i lus long han bilong

em. Dispela i bin kamap taim PX i kikim bal long statim pilai.

Tasol Wests i no wari na pilai tasol i go na ol i wokim wanpela gutpela bal wok na Michael Toivita i setim Obert Batia long skoa. Stail mangi bilong Wests Tuksy Karu i kisim narapela wan poin taim em i kik fil gol.

PX i traim sanapim banis tasol Wests i paia yet long putim trai. Ol bikpela fowat olsem Robert Muri, Tati Ivara, Gidcon Kouoru, Ralph



• Ol sapota bilong Wests i amamas bihain long Wests i winim 1993 Wingfield Lig gren fainal.

Wagam na Dickson Lunafe i bin wok hat tru long brukim difens bilong PX.

Ol boi PX i no stopim Wests na Manso Oa i skoa ken taim Tuksy i setim em long skoa. Tasol bihain long dispela trai Bob Tolick i no laikim tim bilong em PX i lus na go skoa long PX. PX i kisim narapela poin long ol penalti na dispela i bin kisim skoa bilong ol i go antap long 12.

Wests i bin kisim narapela trai i kam long huka Danny Moi na Karu i kikim gut konvesen. Kumul faivet, Tuksy Karu i bin kikim ken penalti na kisim skoa i go antap long 18-12 long hap-taim.

Ol pukpuk i hangre yet na kisim narapela 8-pela poin long namba tu hap bilong

pilai taim PX i kisim tasol 4 poin.

Long namba tu hap tupela tim i strong tru long stopim birua tim long skoa. Tupela tim i bin wokim planti paul pilai long dispela taim bikos difens bilong tupela i bin wan kain tru.

Tasol Wests i bin skoa taim Toivita i wokim strongpela ran i go na klostu long trailain em i setim winga, Stanley Posa long skoa. Karu i no bin abrus long kikim konvesen. Karu yet i bin pasim skoabuk bilong Wests taim em i kikim wanpela filgol.

Sampela minit bipo long pilai i pinis PX i bin putim wanpela trai. Dispela trai i bin kam long Evara Mai.

## Pawa bilong Norths em moa moa yet

### RABAUl RIPOT

WANPELA klap long Rabaul long dispela yia klostu i brukim rekot long winim olgeta gren fainal pilai bilong olgeta divisen long resis bilong Rabaul Winfield Lig long las wiken.

North Raiders ragbi lig klap long las wiken klostu i winim gren fainal bilong olgeta divisen. Long dispela yia olgeta divisen bilong Norths i bin go insait long gren fainal.

bihain long pilai bilong ren fainal long las wiken tripela divisen i bin win taim wanpela divisen i lus. Ol tripel divisen husat i win em A gret, risev gret na and 17. Anda 19 tasol i bin lus long PTC Easts 8-16.

Ol skoa bilong wan wan divisen i sanap olsem A gret Norths 12 winim NGIP Muruks 10. Long risev gret Norths 18 winim Muruks 12. PTC Easts anda 19 i bin winim Norths 16-8 na long anda 17 Norths 8 na Muruks 4.

Dispela i soim tru olsem ol klap oposal bilong Norths in bin mekim gutpela wok tru long larim olgeta divisen bilong ol i go long gren fainal. Wokbung wantaim ol klap opisal na pilaia i givim i helpim tru Norths long daunim ol arapela tim husat i resis wantaim ol long dispela yia.

Long A gret, Norths i bin kisim sampela nupela pilaia bilong arapela tim long kirapim nem bilong klap. Ol kain pilaia olsem kBen Lakur, Willie Langa na Savex Alipas i bin helpim tru klap.

Norths husat i bin kamapim gutpela pilai long 4-pela yia i go pinis i no larim Muruks long winim ol ken long dispela yia. Dispela tupela tim i save bung long gren fainal tasol Muruks i save winim ol.

Tasol long dispela yia Norths i pasim tok na strongim banis bilong ol na stopim ol manki Kokopo long win.

# CAMBRIDGE

## KING SIZE



# CAMBRIDGE

GOVERNMENT WARNING - SMOKING IS DANGEROUS TO HEALTH



# SPAK MAN MAIK

MI NOGLIT OZ?



NAU BAGA IGO ... EM KAMAP STRET TASOL EM I GO INSAIT LONG RONG TOILET...

(hic!) BIIRIM WAARA BIRIM WARAAA..

EM SINGSING WANTAM NA GO INSAIT LONG TOILET BILONG OL MERI...

(hic!) DRAIVAA DRAIVAA GIVIM SIKSTI 27

SAMPELA MERI STAP INSAIT.. WANPELA PATPELA MERI I LUKIM EM NA SINGAIT WANTAM NA EMBAMIM EM NA RONOWE IGO AULT...

**AEEEEEE!! SPAP MAN YAAAH!!**

NAU OL ARAPELA MERI I RONIKAM NA KRUNGUTIM LAPUN TAMBU NA OL I RONOWE NABALIT...

**AAAH!! EMILUK OL SEM MASALAI!**

**IINNNOOO! PIRIPOU IA KARAI LASH!!**

OL MAN LONG NARAPELA SAIT LONG TOILET I HARIM NOIS NA OL I GO SEKAP...

HUUUUU! (GROAN!) AAHH.. AEEYOOOOHH!

MI TING OL MERI LUKIM WANPELA SINEK NA OL I RONOWE, ATINGZ?

UMN.. I LUK OL SEM PIS-PIS I PULAP LONG PLUA.

TASOL NOGAT, EM BUS LOYA BILONG MINISTA MAIK I SILIP KRANGI I STAP...

**AAAH!... (GROAN) HUUUUU!.. MI.. FAKARAP FINISHU.**

**HEY?! EM WANPELA LAPUN MAN YAH!**





# REBO



Sapos yu no save long tok Inlish, bilong wanem na yu wari!

## WANTOK i stap!

Em niuspepa bilong yumi stret ol Papua Niugini, em long tok pisin na yu ken ritim.

BAIM WANPELA NAU, EM

# 40<sup>t</sup> tasol!!



# Musik Televison na Komik

## AMERICAN TOP 40

AS AT 11/09/93

CUR.	TITLE	ACT NAME
1.	Can't Help Falling In Love	UB 40
2.	Runaway	Soul Asylum
3.	Dreamlover	Mariah Carey
4.	Ooh Child	Dino
5.	If I Had No Loot	Tony! Toni! Tone!
6.	Weak	SWV
7.	I Don't Wanna Fight	Tina Turner
8.	I'm Gonna Be (500 Miles)	The Proclaimers
9.	Will You Be There	Michael Jackson
10.	Rain	Madonna
11.	IF	Janet Jackson
12.	Show Me Love	Robin S
13.	Break It Down Again	Tears For Fears
14.	Come Undone	Duran Duran
15.	That's The Way Love Goes	Janet Jackson
16.	Baby I'm Yours	Shal
17.	I'm Free	Jon Secada
18.	Right Here (Human Nature)	SWV
19.	Two Princes	Spin Doctors
20.	The River Of Dreams	Billy Joel
21.	The Ways Of The Wind	P.M. Dawn
22.	One Last Cry	Brian McKnight
23.	Plush	Stone Temple Pilots
24.	I'll Never Get Over You (Getting Over Me)	Expose
25.	What's Up	4 Non Blondes
26.	Lately	Jodeci
27.	More And More	Captain Hollywood Project
28.	Looking Through Patient Eyes	SWV
29.	Have I Told You Lately	Rod Stewart
30.	Sweat	Inner Circle
31.	Cryin'	Aerosmith
32.	Two Steps Behind	Def Leppard
33.	Fields Of Gold	Sting
34.	Happy	Legacy Of Sound featuring Meja
35.	Step It Up	Stereo MC's
36.	Another Sad Love Song	Toni Braxton
37.	I'm So Into You	SWV
38.	Whoomp! (There It Is)	Tag Team
39.	Reason To Believe	Rod Stewart
40.	Creep	Radiohead

## Ol Solomon aigris long tripela boi PNG

JAMES KILA i raitim

LONG Papua Niugini, tripela yangpela boi i gat biknem pinis long oi kain stail bilong ol long singsing. Planti manmeri long narapela wan solwara kantri tu i laikim tru musik bilong ol. Tru olsem i gat ol narapela yangpela tu i stat bihainim ol long katim ol kaset bilong ol yet. Tasol dispela tripela boi Tolai em long Henry Kuskus, Chris Kuskus na Charles Kivovon i bringing stret senis long PNG musik taim ol i bin katim ol kaset bilong ol. Long las wik Sarere, tupela brata Henry na Chris wantaim Charles i go wantaim ol narapela musikman na wanpela top meri bilong singsing, Cathy Lee Chan i go long Solomon Ailan. Chris, husat i bin tok-tok wantaim *Wantok Niuspepa* pastaim long ol i go i tok olsem, planti manmeri long Solomon Ailan i no save sindaun gut taim em wantaim brata bilong em Henry i singsing. Planti i save kalap na singaut strong tru olsem, "Wanfela moa taim, wanfela moa

taim." Dispela em taim ol i laik pinis pilai.

Chris i tok long namba wan em taim tru taim ol i go, ol lain man meri bilong Solomon Ailan i guria nogut tru taim ol i lukim ol.

"Bara, sampela ol lain i seksek nogut tru long mipela taim mipela i raun o sanap long pilai graun. Sampela i kam na askim kain kain kwesten nabaut long mipela. Tasol mipela i stap isi tasol," Chris i tok.

Ol lain long Solomon Ailan i save laikim tru ol singsing bilong PNG bikos ol i save baim ol kaset bilong yumi long wanpela ejen bilong Chin H Meen Supasauns long hap. Nem bilong kampani ya em Systems Computers.

Chris wantaim Henry i bin katim wanpela nupela kaset bilong ol long dispela yia. Nem bilong dispela kaset em "Back to



□ Tripela yangpela musik man (lep han) Henry Kuskus, Charles Kivovon na Chris Kuskus.

Back" na Charles tu i bin katim wanpela kaset bilong em.

Long Solomon Ailan taim ol i bin go sampela mun i go pinis, ol manmeri i singaut

strong tru na askim Henry long singim gen dispela song bilong em, *Tutu Areng*.

Taim em i go ausait na narapela man i laik go singsing, ol i save

singaut na tok," Mifela i laikim *Tutu Areng* wanfela moa taim," dispela em kain *Tok Pisin* bilong ol lain wan solwara long Solomon Ailan.

## Pawa bilong Marabe stap laip yet

SANANG ZAZORING i raitim

PLANTI manmeri i save long Anton Sil Bal.

Anton Sil i gat nem long tupela muvi em i bin ektim 15 yia i go pinis.

Em i bin kamap olsem Aki long muvi ol i kolim, "Wokabout Bilong Tonten." Em i bin ektim tu muvi ol i kolim long, "Marabe," insait long Tari, Sauten Hailans province long 1978.

Anton i kam long ples Dumun insait long Sinesine eria long Simbu provins. Em i marit na i gat tripela pikinini. Nem bilong ol pikinini em Ralph

husat i wok wantaim Fisheris Divisen long Lae. Niwapapa husat i wok olsem seketeri wantaim Provinsal Afeas long Kundiawa na Junior Sil, nau em i wokim gret 9 long Kerowagi haikui insait long Simbu provins.

Anton Sil yet i wok nau olsem supevaise bilong Sivil Woks wantaim Divisen bilong Simbu provinsal gavman insait long Kundiawa. Em i gat bikpela save bilong wok wantaim Woks Dipatmen inap long 9-pela yia nau.

Pastaim em i bin wok wantaim Lae Siti Kaunsil insait long Morobe provins inap long 9-pela yia. Na em i wok tupela wok yia nau wantaim Dipatmen bilong Simbu.

Em i wanpela Kristen man na em i save helpim tu long mekim wok bilong sios. Niusman bilong sios i bin bungim em long Simbu Luteran Sios Distrik komprens long Yondomugl na kisim stori bilong em.



• Boiros bilong wokim muvi bilong Marabe, Anton Sil i stailim liklik i stap.

## PNG TOP 20

AS AT 4/09/93

NO.	SONG	ARTIST
1 (2)	Sauga Mei	Sauga Band
2 (1)	Josephine	Leonard Kania
3 (4)	Five Toea Scone	M.C.Y.
4 (3)	Swit Finche	Reks Band
5 (8)	No Compromise	Max Manimbi
6 (9)	Pavora Easo	Paraisa Band
7 (7)	10 x Pekitona	Pongoros '93
8 (5)	Mountain Meri	Hollie Maia
9 (6)	Kogoc Kogoc	Sugic Kuwic
10 (11)	Eye Bilong Yu	Leonard Kania
11 (20)	Lukluk Tamavatur	Barike
12 (10)	Kas Out	Leonard Kania
13 (12)	Island Meri	Brasil Greg
14 (13)	Meri Nakanai	Chris Kuskus
15 (19)	Pinky Pinky Ponky	Darkends
16 (17)	Lavi Seida	Helgas
17 (15)	Evaga	Sugic Kuwic
18 (16)	Aihi Afa	Blutfane
19 (0)	Opa Tivu Tari	Banditz
20 (0)	Bihain Taim B'Ville	Crisis Survivors

• Ratings based on requests on Radio Kalang and not cassette sales.

THURSDAY 9TH SEPTEMBER, 1993		EM TV		8.55 SUPER SOUND NEW RELEASE	
5.57	STATION OPEN	4.30	SCOOBY DOO & SCRAPY DOO	9.00	BURKE'S BACKYARD (G)
6.00	1993 US OPEN TENNIS	5.00	MAGILLA GORILLA (G)	10.00	HAWAII 5-0: "Target A Cop" (PGR)
7.00	TODAY SHOW (G)	5.27	EMTY TOK SAVE	11.00	NATIONAL EMTV NEWS REPLAY
9.00	STATION CLOSE (G)	5.29	EMTY NEWS BREAK	11.27	MEDIATION WITH PASTOR WALO ARNI
1.27	STATION RE-OPEN	5.30	HOME AND AWAY (G)	11.30	STATION CLOSE
1.30	RAY MARTIN (PGR)	6.00	NATIONAL EMTV NEWS	SUNDAY 12TH SEPTEMBER, 1993	
3.00	AT MIDDAY	6.30	A CURRENT AFFAIR (G)	7.57	STATION OPEN
3.00	KIDS KONA	7.00	SALE OF THE CENTURY (G)	8.00	1993 US OPEN TENNIS
4.00	SESAME STREET (G)	7.27	SCOOBY DOO AND SCRAPY DOO (G)	9.00	SUNDAY
4.00	FAT CAT (G)	7.30	NEIGHBOURS (G)	11.00	WIDE WORLD OF SPORTS
4.30	SCOOBY DOO AND SCRAPY DOO (G)	8.00	RESCUE 911 (G)	12.00	THE FOOTY SHOW (G)
5.00	MAGILLA GORILLA (G)	8.27	PACIFIC GOLD STUDIO VIDEO CLIP	12.57	SUPER SOUND MUSIC RELEASE
5.27	EMTY TOK SAVE	8.30	MAGGIE CASH SURPRISE DRAW	1.00	T.B.A
5.29	EMTY NEWS BREAK	8.32	AUSTRALIA'S FUNNIEST HOME VIDEO (PGR)	2.00	MUSIC & THE SPOKEN WORD (G)
5.30	HOME AND AWAY (G)	9.00	FRIDAY NIGHT MOVIE: "The Deep" (M)	2.30	LUMEN 2000 - PNG (G)
6.00	NATIONAL EMTV NEWS	10.30	EMTY TOK SAVE	3.00	WINFIELD CUP (G)
6.30	A CURRENT AFFAIR (G)	10.33	FOCUS (G)	5.00	SPORTS SUNDAY (G)
7.00	SALE OF THE CENTURY (G)	11.00	NATIONAL EMTV NEWS REPLAY	5.57	SUPER SOUND NEW RELEASE
7.30	LOTTO DRAW (G)	11.27	MEDIATION WITH PASTOR WALO ARNI	6.00	NATIONAL EMTV NEWS
7.35	NEIGHBOURS (G)	12.30	STATION CLOSE	6.30	WONDERFUL WORLD OF DISNEY (G)
8.00	EMTY TOK SAVE	12.57	PACIFIC GOLD VIDEO CLIP	7.25	EMTY TOK SAVE
8.05	FIZZ (G)	1.00	WIDE WORLD OF SPORTS (G)	7.30	60 MINUTES (G)
9.15	WINFIELD LEAGUE (G)	3.00	WINFIELD CUP (G)	8.27	PACIFIC GOLD STUDIOS VIDEO CLIP
9.30	MARRIED WITH CHILDREN (PGR)	5.00	BEYOND 2000 (G)	8.30	SUNDAY NIGHT MOVIE: "Flame Of Calcutta"
10.00	MARRIED WITH CHILDREN (PGR)	5.55	SUPER SOUND NEW RELEASE	9.57	CHIT CHAT WITH SIR PAULIAS MATANE BONANZA: "Blind Hinch" (G)
10.30	A COUNTRY PRACTICE (G)	6.00	NATIONAL EMTV NEWS	10.00	NATIONAL EMTV NEWS REPLAY
11.00	NATIONAL EMTV NEWS REPLAY	6.30	HEY HEY	11.00	NATIONAL EMTV NEWS REPLAY
11.27	MEDIATION WITH PASTOR WALO ARNI	6.30	IT'S SATURDAY	11.27	MEDIATION WITH PASTOR WALO ARNI
11.30	STATION CLOSE	8.30	NCDC NEWS (G)	11.30	STATION CLOSE
FRIDAY 10TH SEPTEMBER, 1993		8.50	TOK SAVE		
5.57	STATION OPEN				
6.00	1993 US OPEN TENNIS				
7.00	TODAY SHOW (G)				
9.00	STATION CLOSE				
1.20	STATION RE-OPEN				
1.27	EMTY TOKSAVE				
1.30	RAY MARTIN AT MIDDAY				
3.00	KIDS KONA				
3.00	SESAME STREET				
4.00	FAT CAT				



# Ol namba wan misineri krungutim Kabwum long 1919

**HENZY YAKHAM i raitim**

TOK bilong God na pasin Kristen i stap longpela taim long sampela hap bilong Papua Niugini. Tasol long Kabwum distrik insait long Morobe provins, dispela i no longtaim tumas.

I gat sampela lapun bilong Kabwum husat cin krismas bilong ol i wankaim olsem krismas bilong taim ol misineri i bringim tok bilong God i go long dispela hap.

Wanpela mun i go pinis long wanpela wiken, ol pipel bilong Kabwum i amamasim de Ogas 9. Dispela em long makim de ol namba wan misineri i go long dispela hap.

Story i tok olsem long Ogas 9, 1919, wanpela Luteran misineri, Reveren Sawaroka i kamap long ples Indagen wantaim 7-pela lokal misineri. Taim ol i go ol i kisim sampela

man bilong Kalasa long ilektret bilong Tewae-Siassi long helpim ol.

Taim Reveren Sawaroka i laik statim wokabaut bilong em i go insait long ol ples haiden, em bai beten long Holi Spirit long helpim em.

Na beten bilong Reveren Sawaroka i helpim ol wokabaut bilong ol. Tasol taim ol i laik i go, ol i kisim tok save olsem i gat wanpela man nem bilong em Guerope Kanga, na bipo tru ol lain bilong dispela man i bin stap long Kalasa.

Reveren Sawaroka wantaim ol lain bilong em i kamap long Indagen tasol long dispela taim tu i gat bikpela pait namel long Indagen na ol ples bilong Waran.

Reveren Sawaroka i bungim Guerope Kanga na poromanim em. Taim Rev-

eren i kamap long hap, hausman bilong Indagen i save sanap long ples nau helt senta bilong Indagen i stap long en.

Em nau, taim Reveren Sawaroka i kisim tok bilong pait, em i go insait long ol dispela ples bilong pait long stapim ol.

Tasol taim ol man bilong pait i lukim Sawaroka, ol i pret nabaut na ol i ting olsem ol i lukim ol tewel bilong ol tumbuna bilong ol. Taim ol i pret yet, Reveren Sawaroka i pairapim gan bilong em na ol i surik long dispela.

Kwiktaim ol i stapim pait na i wet long lukim wanem kain samting bai kamap. Ol dispela samting i kamap long de namba wan bilong Reveren Sawaroka na ol i painim bikpela hevi long toktok wantaim ol dispela lain. Tasol ol i wokim ol toktok bilong ol long sain tasol. Long namba tu de,

Reveren Sawaroka i painim ples bilong wokim haus bilong slip na bilong wokim haus lotu. Long namba tri de, ol manmeri bilong ples i helpim Reveren Sawaroka long wokim liklik haus bilong em wantaim ol lain bilong em.

Long Ogas 26, 1919, ol manmeri bilong Indagen i wokim wanpela gutpela haus misineri bilong slip. Foapela yia bihain, long Me 12, 1926, ol i mekim ol wok bilong kirapim haus lotu.

Reveren Sawaroka wantaim ol lain bilong em i wokim haus bilong ol misineri na haus lotu long Indagen long wanpela ples nau ol i save kolim Taranbarange.

Long Me 12, 1926, Reveren Sawaroka i baptaisim ol namba wan Kristen bilong dispela hap. Long dispela de, 14 man na 7-pela meri wantaim 7-pela pikinini i kisim baptaisim.

Em nau, Tok bilong



• Tupela lapun husat i bin lukim Reveren Sawaroka long namba wan taim tru em i go insait long Kalasa, Fotone Bosat na Ziwu Kana. Tupela i sanap klostu long ston matmat bilong em.

God i wok long go long ol narapela ples klostu long Kabwum distrik. Ol lain husat i go pas long ol dispela kain wok em Forenuka Legiwo, Akikepe, Honenu, Mamuwec, Firiapa, Nonorawa na Borisien.

Long dispela taim ol i save kolim ol dispela namba wan Kristen, Ulap seket na planti bilong ol i kamap olsem ol misineri. Bihain ol i senisimm Ulap seket i go long Kabwum seket na i stap aninit long Kote distrik bilong Envegelikel Luteran Sios bilong Niugini.

Mi bin bungim tupela lapun man long Indagen long Ogas 7 long dispela yia.

Dispela tupela lapun man em Fotone Bosat na Ziwu Kana. Na tupela wantaim i bin lukim Reveren Sawaroka i kam insait long Kalasa.

Tupela lapun i tok ol misineri i lainim ol long tok ples Kote bikos long dispela taim, ol misineri i save yusim dispela tok ples long planti

hap bilong Morobe. Na ol i save yusim long ol singsing tu.

Nau yet, yau bilong Kana i bagarap liklik tasol taim em i yangpela yet, em i save helpim Reveren Sawaroka long klinim haus bilong em wantaim ol sampela lain misineri.

Em tok ol misineri i lainim ol long autim Tok bilong God na long stap olsem mak bilong God long ol arapela manmeri.

Kana i tok bikos long ol wok bilong ol dispela misineri, planti pipel i kamapim pasin pren wantaim ol birua bilong ol.

Insait long Kabwum, dispela yia ol i makim 74 yia long Tok bilong God i go kamap long hap. Long makim kamap bilong ol namba wan misineri long Kabwum, Luteran Sios i holim wanpela bung long Indagen long Ogas 1 i go inap long Ogas 8.

Long las yia, het bilong Luteran Sios i givim tok orait long mekim Ukata i kamap wanpela Lutheran

distrik. Nau i gat 215 congrikesen, 50 peris na 9-pela seket insait long Ukata Distrik.

Taim ol i holim bung long Indagen, 31 man i kisim setifiket long wok olsem ol hetman bilong sios long hap bilong ol. Na planti wokman bilong sios wantaim ol sios lida i kam long wokim ol plen bilong ranim dispela nupela distrik.

Deputi Praim Minista, Sir Julius Chan i bin go long Lae long opim dispela bung. Tasol i gat bikpela ren na helikopta i no inap pundaun long Kabwum na em i no kamap long dispela bung.

Ol arapela lain husat i tok long go wantaim Julius Chan em: hetman bilong Luteran Sios Bishop Getake Gam; memba bilong Kabwum Ginson Saunu na memba bilong Finsafen, Yaip Avini.

Ol dispela lain i traim long go long Kabwum long helikopta tasol taim i nogut na ol i no inap i go daun long hap.



• Foapela meri bilong ples i sanap fran long wanpela haus long Indagen misin stesin. Wanpela bikpela bung i bin kamap long dispela hap long las mun.

# Fridom na pawa bilong wan wan long kantri

**i kam long las wik**

**HET TOK: REVERSING THE ONUS OF PROOF:**

LONG nau yet, pastaim long wanpela kot i tokaut olsem wanpela man o meri i rong, ol plisman i mas givim toktok long kot long soim olsem dispela man o meri i mekim rong. Dispela i bihainim mama lo bilong kantri.

Dispela em long stapim kot long kalabusim o givim mekim save nating long ol manmeri husat i no mekim wanpela rong. Bikos taim ol plisman i sasim wanpela man, dispela man bai kisim bikpela mekim save.

Gavman i laik senisim mama lo na kalabusim ol man husat i kamap long kot long sas bilong kilim man, bagarapim meri, pasin stil na kukim haus.

Sapos gavman i kamapim dispela senis, planti manmeri bai kisim bikpela mekim save nating. Na planti bai kisim nating mekim save long rong ol i no wokim. Wok lo bilong dispela kantri i yangpela tumas. Pablik Solisita i no gat mani na risoses. Ol

jas tu i save painim hat tru long painim rong bilong wanpela man. Bikos i no gat ol arapela lain bilong helpim ol long skelim hevi o rong wanpela man i mekim. Mipela olgeta i save mekim rong. Ol jas na loya tu i save mekim rong.

Kriminal lo em i bilong yusim long mekim politikel wok. Long sampela provins, pasin bilong sutim nating tok long wanpela man i mekim rong i kamap pinis. Na bihain man husat i sutim nating tok i save givim ol giaman toktok long kot i mas givim mekim save long man husat i sanap long ai bilong kot. Ol jas tu i save painim hatpela taim long painimaut husat i tok tru na husat i no tok tru. Dispela i save kamap taim wanpela man o meri i givim toktok i go long kot long tok ples. Na bihain ol bai tanim i go long Tok Pisin na inglis. Sapos kot i painim olsem wanpela man i mekim rong, orait, em bai gat bikpela sans long kisim mekim save. Dispela rot bilong yusim long kotim man long politikel wok i ken kamap long rausim ol oposisen politisen.

Mista Namaliu, Mista Pora na Mista Diro olgeta i bin komplem olsem ol i bin kisim

nating hevi long rong em ol i no bin mekim. Bikos taim ol i kamap long kot, kot i painim olsem ol i no gat rong. Ol tromoi bikpela mani long kisim ol loya bilong tokaut long kot olsem ol i no gat rong. Wanpela samting em i nogut long sanap long ai bilong kot em dispela i ken bagarapim wok bilong wanpela politisen. Na tu em i ken mekim ol politisen i lusim bikpela mani. Na bihain kot i painim olsem ol i nogat rong.

Long ol arapela kantri, wok bilong kriminal lo em long kilim ol politisen.

Planti lain husat i save kamap long kot i save kisim mekim save. Wok bilong ol plisman long givim evidens em long taim man i mekim rong i kamap long kot. Long senisim dispela samting bai i no inap long kamapim wanpela gutpela samting long givim mekimsave long ol manmeri husat i mekim rong.

Bikpela samting i olsem yumi i no inap long bringim kain kain samting long stretim hevi. Na kamapim jastis long sosaiti. Long bipo, ol manmeri long Papua Niugini i no save yusim ol teknikel lo long soim olsem wanpela man i mekim rong. Na traim long

stretim hevi. Tasol dispela i no stret. Lo bilong soim evidens i kamap long banisim wanpela man o meri long no gut em bai kisim nating mekimsave long rong em i no mekim. Tredisenel rot long stretim hevi i narakain long rot bilong Nesanel Kot long stretim hevi. Tredisenel rot em long sindaun na paitim toktok. Na painim tingting long stretim wanem hevi i kamap. Rot Nesanel Kot i yusim em long soim olsem wanpela man i mas win long kot na arapela i mas lus. Manhusat i lus i mas kisim mekimsave long baim rong em i mekim.

Long soim tru olsem wanpela man i mekim rong, i no lo bilong Papua Niugini. Dispela lo em i bilong ol arapela kantri. Dispela toktok i no bihainim histori bilong dispela lo. Na tu wok bilong em long kamapim fridom na demokrasi. Dispela i no wanpela gutpela na stretpela toktok. Bikos dispela bai i no inap long stretim wanpela hevi. Long em i wanpela hap bilong demokrasi.

B. D. Brunton, Director, Individual Community Rights Advocacy Forum Inc. P.O. Box 49, University.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.